

MESYUARAT PERTAMA, PENGGAL KELIMA  
PARLIMEN KEEMPAT BELAS  
2022

**HARI KHAMIS : 17 MAC 2022**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 11 HINGGA NO. 86 )**

**NOTA : [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK ZAKARIA BIN MOHD. EDRIS  
@ TUBAU [ LIBARAN ]**

**TARIKH : 17 MAC 2022 (KHAMIS)**

**SOALAN**

**DATUK ZAKARIA BIN MOHD. EDRIS @ TUBAU** minta **MENTERI KESIHATAN** menyatakan :-

- (a) sejauh manakah isu pemberian sijil vaksinasi palsu mengancam dan menggugat integriti sistem kesihatan negara; dan
- (b) apakah langkah yang diambil Kementerian untuk membendung kegiatan tersebut daripada berlaku.

**JAWAPAN**

Tuan Yang di-Pertua,

1. Untuk makluman Ahli Yang Berhormat, masalah sijil MySejahtera digital palsu seperti yang ditularkan sebenarnya adalah berpunca daripada penyalahgunaan sistem MyVAS oleh pengguna MYVAS yang berdaftar.
2. Sijil vaksin COVID-19 yang dikeluarkan oleh Kementerian Kesihatan Malaysia menggunakan kaedah *blockchain* melalui *Vaccine Administration System* atau MyVAS yang telah diiktiraf oleh perbadanan antarabangsa dan setiap transaksi boleh diaudit untuk tujuan

keselamatan atau penyalahgunaan.

3. Berhubung dengan penyalahgunaan sistem MyVAS, Kementerian Kesihatan memandang serius tentang perkara ini dan akan mengambil tindakan yang tegas ke atas pihak yang bertanggungjawab. Untuk makluman Ahli Yang Berhormat, berdasarkan siasatan yang masih dijalankan dan semakan bersama-sama pihak PDRM didapati semua kes yang dikesan adalah melibatkan pelaksanaan vaksinasi berbayar yang dijalankan oleh pihak swasta (*Private Purchase Vaccination*).

4. Mengikut Akta Perubatan (pindaan) 2012 dan Peraturan-peraturan Perubatan (Pindaan) 2017, mana-mana pengamal perubatan yang membuat salah laku tertakluk kepada jenis kesalahan dan tertakluk kepada intipati kes, boleh dikenakan hukuman maksimum termasuklah di bawah Seksyen 30(1)(e) iaitu dibuang dari daftar Majlis Perubatan Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : TUAN LIM KIT SIANG [ISKANDAR PUTERI]**

**TARIKH : 17 MAC 2022 (KHAMIS)**

**SOALAN**

**TUAN LIM KIT SIANG [ ISKANDAR PUTERI ]** minta **MENTERI SUMBER MANUSIA** menyatakan berapa jumlah tenaga kerja yang telah meninggalkan pasaran pekerjaan selepas hilang kerja akibat pandemik COVID-19 sejak daripada bulan Mac 2020.

**JAWAPAN**

**Tuan Yang Di Pertua,**

Berdasarkan Kaji selidik Tenaga Buruh oleh Jabatan Perangkaan Malaysia, bilangan penganggur bagi suku keempat 2020 adalah 760,700 dan angka ini telah menurun kepada 696,400 orang pada suku keempat 2021. Daripada jumlah tersebut orang berinsurans yang telah kehilangan pekerjaan daripada Mac 2020 sehingga 31 Disember 2021, seramai 158,044 orang pekerja. Manakala pada tahun 2022 pula, daripada Januari sehingga 4 Mac seramai 8,469 turut kehilangan pekerjaan.

Melalui pelbagai usaha yang dilaksanakan oleh Kementerian Sumber Manusia, telah berjaya menempatkan seramai 477,108 iaitu mulai Mac 2020 sehingga 31 Disember 2021. Manakala pada tahun 2022 pula, dari Januari sehingga 4 Mac, sebanyak 38,476 telah berjaya ditempatkan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' SRI HASAN BIN ARIFIN [ ROMPIN ]**

**TARIKH : 17 MAC 2022 (KHAMIS)**

**SOALAN**

**DATO' SRI HASAN BIN ARIFIN [ ROMPIN ]** minta **MENTERI BELIA DAN SUKAN** menyatakan apakah **strategi dan inisiatif** Kementerian terutamanya kesiapsiagaan para atlet dan petugas sukan dalam menghadapi temasya sukan antarabangsa tahun ini seperti Sukan SEA di Hanoi, Vietnam, Sukan Komanwel di Birmingham, England, serta Sukan Asia di Hangzhou, China.

**JAWAPAN**

**Tan Sri Yang di-Pertua,**

Untuk makluman YB Rompin, MSN telahpun mula melaksanakan Program Khas di bawah Program Podium yang dikenali sebagai **Projek AsiaComm dan Program Sukan SEA pada awal tahun 2021** khusus bagi atlet ke SukanAsia/Para Asia Hangzhou pada 10 hingga 25 September 2022, Sukan Komanwel Birmingham pada 28 Julai hingga 8 Ogos 2022 dan Sukan SEA Vietnam pada 12 hingga 23 Mei 2022. Tumpuan diberikan kepada atlet-atlet yang mampu meraih pingat di ketiga-tiga temasya tersebut.

MSN telah menyusun **strategi dengan kolaborasi erat** bersama para pemegang taruh utama seperti Majlis Olimpik Malaysia (MOM), Majlis Paralimpik Malaysia (MPM), Persatuan Sukan Kebangsaan (PSK), Institut Sukan Negara (ISN), Kementerian Pendidikan Malaysia (KPM) dan Kementerian Pengajian Tinggi (KPT) untuk memastikan persiapan atlet berada di tahap yang optima.

Dengan suntikan dana berjumlah RM60 juta setahun (RM240 juta dari tahun 2022 hingga 2025) bagi Program Podium, seramai **581 atlet** daripada **26 jenis sukan** akan mendapat manfaat bagi menjalani program latihan sepenuh masa dan berfasa di bawah bimbingan 101 jurulatih.

Pada masa yang sama, **beberapa inisiatif akan diberi penekanan dan penambahbaikan** untuk memastikan atlet-atlet dapat mempamerkan prestasi yang cemerlang antaranya adalah:

- a. **Peningkatan kerjasama** dengan negara-negara yang mendominasi sukan di peringkat Asia dan dunia bagi pelaksanaan program tindak (attachment) dan sparring program;
- b. **Forward Base** di luar negara mengikut keperluan sukan-sukan tertentu;
- c. Perkhidmatan **jurulatih yang khusus**;

## SOALAN NO : 13

- d. Penambahbaikan **proses pemantauan** prestasi atlet menggunakan **kaedah data driven**;
- e. Memperkasakan pelaksanaan **program psikologi** dengan penekanan kepada elemen winning mentality, ketahanan mental, keyakinan diri dan lain-lain.
- f. **Geran latihan khusus** kepada atlet mengikut keperluan program latihan yang dirancang;
- g. **Program tindik** bersama performance dan strategy experts bagi memastikan peningkatan;
- h. **Penyertaan ke pertandingan/kejohanan antarabangsa** yang terpilih dan kompetitif bagi membantu meningkatkan prestasi atau ranking semasa atlet;
- i. **Perkhidmatan sains dan perubatan sukan** yang khusus (dedicated team); dan
- j. **Kriteria pemilihan yang lebih ketat** seperti tiada had umur, pemenang pingat di Sukan Olimpik Tokyo 2020, pemenang pingat di Sukan Asia dan Komanwel 2018/ Kejohanan Dunia dan menduduki ranking 8 terbaik dunia;

Kementerian akan sentiasa memberikan sepenuh komitmen di dalam usaha mempersiapkan atlet bertaraf dunia sekaligus meningkatkan mutu sukan negara di pentas antarabangsa.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN HASSAN BIN ABDUL KARIM  
(PASIR GUDANG)**

**TARIKH : 17 MAC 2022 (KHAMIS)**

**SOALAN**

**TUAN HASSAN BIN ABDUL KARIM (PASIR GUDANG)** minta **MENTERI PERUMAHAN DAN KERAJAAN TEMPATAN** menyatakan apakah rancangan Kementerian untuk menyediakan Projek Perumahan Rakyat (PPR) di Pasir Gudang di bawah Rancangan Malaysia Ke-12.

**JAWAPAN**

**Tuan Yang di-Pertua,**

Untuk makluman Ahli Yang Berhormat, pada masa ini terdapat tiga projek Program Perumahan Rakyat (PPR) di Pasir Gudang iaitu di Plentong, Permas Jaya dan Masai. Projek PPR Plentong telah siap dibina manakala projek PPR Permas Jaya dan PPR Masai sedang dalam pembinaan.

Projek PPR Permas Jaya melibatkan pembinaan 400 unit rumah pangsa berbilang tingkat dengan kos keseluruhan berjumlah RM83,696,735. Tahap pelaksanaannya pada masa ini ialah 95% dan dijangka siap pada bulan Mei 2022. PPR Masai pula melibatkan pembinaan 330 unit rumah pangsa berbilang tingkat dengan kos keseluruhan berjumlah RM59,167,353. Kemajuan projek tersebut adalah 77% dan tarikh siap asal yang ditetapkan adalah pada bulan November 2021. Walau bagaimanapun, berlaku kelewatan dalam menyiapkan projek ini disebabkan masalah yang dihadapi oleh pihak kontraktor. Kementerian kini sedang dalam tindakan untuk melantik kontraktor penyelamat bagi memastikan projek ini dapat disiapkan. Jumlah keseluruhan unit rumah PPR yang sedang dalam pembinaan di Pasir Gudang adalah berjumlah 730 unit.

Untuk makluman Ahli Yang Berhormat, PPR Plentong yang telah siap dibina pada tahun 2002 merangkumi 240 unit telah diserahkan sepenuhnya pengurusan PPR ini kepada pihak Kerajaan Negeri.

Kementerian Perumahan dan Kerajaan Tempatan (KPKT) sentiasa bersedia mempertimbangkan sebarang cadangan pembangunan PPR daripada kerajaan negeri. Cadangan tersebut akan diteliti oleh KPKT berdasarkan kepada keutamaan yang dicadang oleh kerajaan negeri, kesesuaian tapak dan keperluan penduduk setempat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB DATO' SRI ROHANI BT. ABDUL KARIM  
(BATANG LUPAR)**

**TARIKH : 17 MAC 2022 (KHAMIS)**

**SOALAN**

**DATO' SRI HAJAH ROHANI BINTI HAJI ABDUL KARIM ( BATANG LUPAR )** minta **MENTERI DALAM NEGERI** menyatakan apakah usaha yang telah diambil untuk meningkatkan status Malaysia bagi tahun 2022 dalam Laporan TIP yang mana Malaysia kini berada di Tahap 3. Apakah langkah responsif gender yang telah diambil rnementandakan 72% daripada rnangsa yang diperdagangkan secara global adalah wanita dan kanak-kanak perempuan.

**JAWAPAN**

**Tuan Yang Di Pertua,**

Kementerian Dalam Negeri (KDN) selaku peneraju Majlis Antipemerdagangan Orang dan Antipenyeludupan Migran (MAPO) yang turut dianggotai 22 kementerian dan agensi sentiasa melaksanakan pelbagai bentuk tindakan bagi membanteras jenayah pemerdagangan orang selaras dengan Akta Antipemerdagangan Orang dan Antipenyeludupan Migran 2007 (Akta 670).

Segala usaha dan hala tuju Kerajaan dalam membanteras jenayah pemerdagangan orang di Malaysia adalah berpandukan kepada Pelan Tindakan Kebangsaan Antipemerdagangan Orang 2021-2025 (*National Anti-Trafficking in Persons and Anti-Smuggling of Migrants* atau NAPTIP 3.0). NAPTIP 3.0 telah dilancarkan secara rasminya oleh YB Menteri Dalam Negeri (MDN) pada 31 Mac 2021. NAPTIP 3.0 jelas menerangkan visi negara, lima prinsip panduan, sembilan matlamat strategik, 34 objektif dengan 78 output serta 210 aktiviti berkaitan antipemerdagangan orang bagi tempoh lima tahun akan datang.

Secara asasnya, antara tindakan serta perancangan kerajaan dalam memperkasakan usaha membanteras jenayah pemerdagangan orang di Malaysia adalah seperti berikut:

- i. **memperkukuhkan mekanisme undang-undang.** Usaha Malaysia dalam memerangi jenayah pemerdagangan orang dan penyeludupan migran adalah berdasarkan Akta 670. Akta ini mula dikuatkuasa pada tahun 2007 dan telah dipinda sebanyak tiga kali iaitu pada tahun 2010, 2015 dan 2022 bagi memperkukuhkan kerangka perundangannya serta menerapkan pendekatan berpaksikan mangsa (*victim centered approach*). Pindaan terkini kepada Akta 670 pada tahun 2022 telah memberi tumpuan kepada beberapa penambahbaikan termasuk mengenai definisi pemerdagangan orang, yang bertujuan untuk menambah baik pengenalpastian mangsa serta meningkatkan

bilangan pendakwaan dan sabitan kes pemerdagangan orang. Selain itu, pindaan tersebut juga memberi tumpuan kepada aspek pencegahan dengan memberikan hukuman yang lebih berat kepada pesalah jenayah ini.

- ii. **memperkasakan usaha dalam aspek penjagaan dan perlindungan mangsa pemerdagangan orang.** Seiring dengan pendekatan responsif gender, Kerajaan telah menyediakan lapan (8) buah rumah perlindungan (RP) mangsa pemerdagangan orang iaitu 5 buah RP untuk wanita dan masing-masing sebuah RP untuk lelaki, kanak-kanak perempuan dan kanak-kanak lelaki. Selain itu, bagi mengiktiraf peranan penting badan bukan Kerajaan (NGO) dan organisasi lain dalam aspek ini, sebanyak dua (2) buah RP di bawah seliaan NGO telah diisytiharkan sebagai tempat perlindungan. Kerajaan juga merancang untuk membangunkan dua (2) buah tempat perlindungan baharu di negeri atau zon yang belum mempunyai RP. Sebagai tambahan, Kerajaan juga telah melaksanakan program *Victim Assistant Specialist (VAS)* yang berperanan sebagai perantara di antara mangsa, pegawai pelindung, ahli psikologi dan pegawai penyiasat di samping memberikan perkhidmatan sokongan kepada mangsa.
- iii. **meningkatkan tindakan bersepadu di antara agensi penguatkuasaan.** Tindakan bersepadu dalam kalangan agensi-agensi penguatkuasaan merupakan satu usaha yang berterusan dalam melengkapkan usaha secara unilateral yang telah dijalankan oleh agensi-agensi penguatkuasaan di bawah organisasi masing-masing.
- iv. **memberi penekanan kepada tindakan penguatkuasaan dan perundangan yang lebih tegas dalam isu-isu pemerdagangan buruh** yang dikatakan berlaku di sektor ekonomi sebagai contoh sarung tangan getah dan perladangan sawit;

- v. **meningkatkan kapasitas, sumber dan kemahiran** anggota penguatkuasa, pasukan pendakwaraya, pegawai pelindung serta entiti khusus di kementerian dan jabatan yang terlibat secara langsung dalam penggubalan dasar dan hal ehwal pengoperasian berkaitan pemerdagangan orang;
- vi. **menambah baik sistem dokumentasi dan pelaporan berkaitan warga asing serta pengurusan golongan berisiko** termasuk pekerja asing secara holistik bagi memastikan kebajikan dan hak pekerja terutama pekerja asing dapat dilindungi; dan
- vii. **meningkatkan kesedaran awam dan aspek pencegahan.** Kerajaan melalui Majlis Antipemerdagangan Orang dan Antipenyeludupan Migran (MAPO) sedang dalam tindakan melaksanakan kempen kesedaran antipemerdagangan orang dan antipenyeludupan migran bersama-sama dengan pelbagai pemegang taruh bagi meningkatkan tahap kefahaman masyarakat mengenai jenayah ini. Antara platform promosi dan publisiti yang akan dimanfaatkan adalah temubual TV dan radio, penerbitan (risalah, artikel, rencana), paparan (*billboard*, skrin digital), program *outreach* dan media sosial (infografik, videografik). Dalam masa yang sama, Kerajaan juga sedang giat melaksanakan penerangan pindaan terkini Akta 670 yang telah berkuatkuasa pada 22 Februari 2022.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHANG LIH KANG  
[ TANJONG MALIM ]**

**TARIKH : 17 MAC 2022 (KHAMIS)**

**SOALAN**

**TUAN CHANG LIH KANG** minta **MENTERI KESIHATAN** menyatakan cara penyelarasan maklumat aplikasi MySejahtera dan KKM, terutamanya berkaitan dengan pengumuman SOP baru oleh pihak KKM.

**JAWAPAN**

Tuan Yang di-Pertua,

Maklumat dan algoritma di dalam MySejahtera adalah selaras dengan pengumuman SOP baru oleh pihak KKM. Semua SOP baru yang hendak dilaksanakan berkuatkuasa pada satu tarikh yang telah ditetapkan dan ini memberi ruang kepada pengemaskinian aplikasi.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN ANYI NGAU (BARAM)**

**TARIKH : 17 MAC 2022 (KHAMIS)**

**SOALAN**

**TUAN ANYI NGAU (BARAM)** minta **MENTERI PEMBANGUNAN LUAR BANDAR** menyatakan status pelaksanaan Skim Bekalan Elektrik Luar Bandar (BELB) di kawasan Peking, Long Teran, Long Jegan dan kawasan Pengelayan serta Projek Bekalan Air Luar Bandar (BALB) di kawasan Peking dan Pengelayan setakat ini.

**JAWAPAN**

**Tuan Yang di-Pertua,**

Untuk makluman Yang Berhormat, kawasan Long Teran, Long Jagan, Peking dan Pengelayan merupakan kawasan yang terbabit dalam skim *Last Miles* bagi projek penyambungan bekalan elektrik yang sedang dilaksanakan oleh Kerajaan Negeri Sarawak menerusi peruntukan Projek Rakyat.

Bagi Projek Bekalan Air Luar Bandar (BALB) Negeri Sarawak tahun 2022, sebanyak RM131.2 juta diperuntukkan bagi melaksanakan sebanyak 44 buah projek melibatkan 37 projek sambungan dan 7 projek baharu. Khusus bagi Parlimen Baram, terdapat tiga (3) projek sambungan dan satu (1) projek baharu BALB yang telah diluluskan oleh Unit Perancang Ekonomi, Jabatan Perdana Menteri (EPU, JPM) yang dilaksanakan oleh Kementerian iaitu:



- (i) Projek Bekalan Air Luar Bandar (BALB) Kawasan Marudi, Bahagian Miri, Sarawak dengan kos projek RM41 juta telah siap fizikal – telah siap;
- (ii) Projek Bekalan Air Luar Bandar (BALB) Kawasan Long Laput, Bahagian Miri, Sarawak dengan kos projek RM12 juta dalam peringkat rekabentuk – jangka tender 2022;
- (iii) Projek Bekalan Air Luar Bandar (BALB) Kawasan Long Lama, Bahagian Miri, Sarawak dengan kos projek RM58 juta dalam peringkat rekabentuk – jangka tender 2023; dan
- (iv) Projek Bekalan Air Luar Bandar (BALB) Kawasan Baram Hilir, Bahagian Miri, Sarawak dengan kos projek RM44 juta dalam peringkat pelantikan perunding. Cadangan liputan bekalan air di kawasan Pengelayan akan dilaksanakan di bawah projek ini.

Manakala Projek Bekalan Air Luar Bandar (BALB) di kawasan Peking telah dipohon oleh UPEN Sarawak pada tahun ini dan akan dikemukakan kepada Unit Perancangan Ekonomi, Jabatan Perdana Menteri di bawah RP 3. Namun begitu, pertimbangan dan kelulusan projek baharu ini tertakluk kepada keupayaan kewangan semasa Kerajaan.

Secara dasarnya, bagi kawasan yang belum mendapat liputan bekalan air bersih dan terawat, Yang Berhormat dipohon supaya mengemukakan kepada Unit Perancang Ekonomi Negeri (UPEN) Sarawak untuk disenaraikan di dalam senarai keutamaan negeri dan seterusnya dipanjangkan kepada Kementerian bagi pertimbangan selanjutnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB TUAN TEH KOK LIM (TAIPING)**

**TARIKH : 17 MAC 2022 (KHAMIS)**

**SOALAN**

**TUAN TEH KOK LIM ( TAIPING )** minta **MENTERI DALAM NEGERI** menyatakan jumlah kes yang terlibat dan jumlah amaun yang terlibat dalam QuinPay kebelakangan ini serta apakah tindakan lanjut Kerajaan untuk membanteras permainan kewangan yang tidak terkawal ini.

**JAWAPAN**

**Tuan Yang Di Pertua,**

Quinpay merupakan satu platform/aplikasi yang menyediakan kemudahan pembelian dan pembayaran secara atas talian. Pengguna yang mengakses aplikasi ini perlu membuka akaun atas nama sendiri dan membuat tambah nilai kepada akaun milik mereka sendiri untuk ditukar kepada mata ganjaran (*point*) bagi membolehkan pengguna membuat pembelian barang atau pembayaran utiliti bagi kedai-kedai yang berdaftar.

PDRM telah menerima lapan (8) laporan polis berkaitan aplikasi Quinpay yang melibatkan kerugian keseluruhan berjumlah RM157,235.88 sejak Januari 2022. Kertas siasatan tidak dibuka kerana tiada elemen perdayaan dan penipuan. Laporan polis ini adalah ketidakpuasan hati pengadu terhadap perubahan polisi yang dilakukan oleh pihak QuinReward.

PDRM menyarankan agar pengguna sentiasa peka dan prihatin terhadap isu-isu semasa, selain sentiasa menyemak sebarang terma dan syarat sesuatu perkhidmatan dan aplikasi yang menggunakan rangkaian atas talian.

**Tuan Yang Di Pertua,**

Selain itu, sekiranya pengguna mempunyai keraguan terhadap sebarang urusan atas talian, terdapat perlbagai kemudahan yang boleh digunakan untuk membuat semakan sebelum urusan dijalankan seperti laman facebook PDRM “Cyber Crime Alert Royal Malaysia Police”, portal <http://ccid.rmp.gov.my/semakmule>, semakan pelaburan yang berdaftar (Bank Negara) dan lain-lain kemudahan untuk memastikan kesahihan sebelum pindahan wang di buat.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' RAMLI BIN DATO' MOHD NOR  
[ CAMERON HIGHLANDS ]**

**TARIKH : 17 MAC 2022 (KHAMIS)**

**SOALAN**

**DATO' RAMLI BIN DATO' MOHD NOR** minta **MENTERI KESIHATAN** menyatakan apakah langkah yang dilakukan oleh pihak Kementerian untuk membantu masyarakat Orang Asli di negara ini dari segi bantuan perubatan seperti implan, anggota palsu, pembedahan dan sebagainya.

**JAWAPAN**

Tuan Yang di-Pertua,

1. Untuk makluman Yang Berhormat, KKM sangat prihatin kepada keperluan pesakit warganegara Malaysia yang kurang berkemampuan dalam mendapatkan rawatan serta pemulihan bagi meningkatkan kefungsi sosial dan seterusnya menambahbaik kualiti hidup mereka.
2. Bagi tujuan tersebut KKM telah menyediakan Tabung Bantuan Perubatan (TBP) bagi rawatan di hospital kerajaan dengan membiayai sebahagian atau sepenuhnya kos rawatan dan perubatan, pembelian peralatan rehabilitasi dan ubat-ubatan, yang boleh membantu masyarakat Orang Asli yang memerlukannya.
3. Untuk makluman terdapat 394 alat perubatan telah disenaraikan di bawah bantuan TBP yang melibatkan 18 disiplin klinikal antaranya adalah

## **SOALAN NO : 19**

Kardiologi, Orthopedik, Pediatrik, ORL, Respiratory, Kardiotorasik, Neurosurgery dan sebagainya. Antara implan yang disenaraikan pula yang melibatkan rawatan jantung adalah seperti Pacemaker, Implantable Cardioverter Defibrillator (ICD), Drug Eluting Stents, Atrial Septal Defect (ASD) dan lain-lain. Manakala bagi rawatan Orthopedik pula adalah seperti Total Hip Arthroplasty, Total Knee Replacement, Illizarov Fixator dan sebagainya.

4. Permohonan bantuan kewangan TBP perlu dilakukan oleh hospital KKM atau Pusat Perubatan Universiti di mana pesakit menerima rawatan dan pesakit merupakan warganegara Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : TUAN SYED SADDIQ BIN SYED ABDUL  
RAHMAN [ MUAR ]**

**TARIKH : 17 MAC 2022 (KHAMIS)**

**SOALAN**

**TUAN SYED SADDIQ BIN SYED ABDUL RAHMAN [ MUAR ]** minta **MENTERI SUMBER MANUSIA** menyatakan langkah Kerajaan untuk menangani arahan larangan yang dikenakan oleh negara Amerika Syarikat terhadap import sarung tangan getah keluaran syarikat Malaysia. Apakah tindakan Kerajaan selain penggubalan dan pembaharuan undang-undang untuk memastikan kegiatan tenaga buruh paksa atau *forced labor* tidak berlaku dalam industri pembuatan sarung getah dan getah di Malaysia.

**JAWAPAN**

**Tuan Yang di-Pertua,**

Sebanyak lapan syarikat telah dikenakan sekatan *Withhold Release Order* oleh United States Customs and Border Protection **dengan izin**, walau bagaimanapun dua daripadanya telah ditarik balik.

Terbaru, Syarikat YTY Industry Holdings Sdn dikenakan *Withhold Release Order* oleh United States Customs and Border Protection pada 28 Januari 2022. Hal ini sememangnya perlu dipandang serius kerana boleh menyebabkan reputasi buruk kepada negara, secara langsung mengakibatkan produk eksport negara terjejas.

Bagi menangani perkara ini terus berlanjutan, Kerajaan telah mengadakan perjumpaan dengan pihak atase United States Customs and Border Protection yang bertempat di Singapura pada 26 Januari 2022 yang lalu. United States Customs and Border Protection memaklumkan bahawa mereka menerima maklumat dari pelbagai pihak seperti NGO, syarikat pesaing, wartawan dan sebagainya.

United States Customs and Border Protection akan mengeluarkan sekatan yang berkaitan sekiranya maklumat yang diterima mempunyai asas-asas kukuh wujudnya buruh paksa dan selepas siasatan mendapati bahawa dakwaan adalah benar.

Walaupun bagaimanapun, United States Customs and Border Protection tidak boleh berkongsi maklumat dengan Kerajaan kerana tertakluk kepada undang-undang mereka. United States Customs and Border Protection turut memaklumkan bahawa pengenaan sekatan bukanlah urusan antara kerajaan-kerajaan, tetapi adalah antara United States Customs and Border Protection dan juga pihak syarikat.

Oleh itu, pihak United States Customs and Border Protection akan berurusan secara terus dengan pihak syarikat tanpa melibatkan kerajaan.

**Tuan Yang DiPertua**

Malaysia juga kini turut berdepan dengan sekatan-sekatan daripada negara-negara lain atas dakwaan buruh paksa.

Selain penggubalan dan pembaharuan undang-undang untuk menangani buruh paksa, Kerajaan sudah tentu akan mempergiat tindakan penguatkuasaan kepada syarikat-syarikat yang mengeksport produk ke luar negara. Ini termasuklah memantau dan membuat pemeriksaan kepada lapan syarikat-syarikat yang telah dikenakan sekatan.

Selain itu, Pelan Tindakan Antipemerdagangan Orang dan Pelan Tindakan berhubung Buruh Paksa yang masing-masing dilancarkan pada bulan Mac dan November tahun 2021 akan membantu menyokong Kerajaan memerangi buruh paksa bukan sahaja bagi industri sarung tangan getah, tetapi merangkumi semua sektor.

Sebagai makluman, Pelan Tindakan berhubung Buruh Paksa mengandungi 4 matlamat strategik iaitu meningkatkan pengetahuan dan kesedaran; menambah baik pematuhan undang-undang dan penguatkuasaan; mengukuhkan pengurusan migrasi buruh dan proses pengambilan pekerja asing; serta menambah baik akses kepada perkhidmatan sokongan, remedy **dengan izin** dan perlindungan.



**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SYED IBRAHIM BIN SYED NOH  
[ LEDANG ]**

**TARIKH : 17 MAC 2022 (KHAMIS)**

**SOALAN**

**TUAN SYED IBRAHIM BIN SYED NOH** minta **MENTERI KESIHATAN** menyatakan secara terperinci usaha yang telah diambil serta tahap terkini digitalisasi data dan maklumat bagi sektor perkhidmatan kesihatan awam.

**JAWAPAN**

Tuan Yang di-Pertua,

1. Pelbagai usaha telah diambil oleh Kementerian merentasi sektor, agensi dan program bagi mendigitalisasi data dan maklumat dalam perkhidmatan kesihatan awam. Bagi membolehkan usaha digitalisasi dilakukan dengan tersusun dan terurus, Kementerian Kesihatan mengguna pakai dokumen Pelan Strategik KKM 2021-2025 dan dokumen Pelan Strategik Pendigitalan KKM 2021-2025 dalam meningkatkan penggunaan perkhidmatan kesihatan digital secara menyeluruh dan bersepadu.

2. Antara inisiatif yang dilaksanakan dalam usaha digitalisasi ini adalah Projek *Electronic Medical Record* (EMR) di Hospital dan Klinik KKM di Negeri Sembilan yang dijangka selesai pada akhir tahun 2023. Selain itu, digitalisasi perkhidmatan kesihatan melalui peningkatan dan perluasan aplikasi *Person Care* dan *Population Health* sedia ada seperti

Sistem Maklumat Hospital dan Klinik, Sistem Maklumat Farmasi, Sistem Maklumat Tabung Darah dan Sistem Maklumat Kesihatan Mental telah dilaksanakan.

3. Bagi menyediakan sistem kesihatan awam yang lebih meluas dan berdaya tahan, KKM telah membangunkan *Malaysian Health Data Warehouse* (MyHDW) sebagai “Gudang Data Kesihatan” berpusat yang mengumpulkan data secara elektronik berkaitan perkhidmatan kesihatan Malaysia secara komprehensif. Sistem ini digunakan dan diperluaskan di semua fasiliti hospital dan klinik kesihatan di sektor awam dan swasta. Sehingga Disember 2021, MyHDW sudah pun mempunyai 70,417,105 (Tujuh Puluh Juta Empat Ratus Tujuh Belas Ribu, Seratus Lima) rekod. MyHDW digunakan dalam analisis data kesihatan bagi menghasilkan laporan statistik kesihatan dan bagi perancangan strategik.

4. Daripada aspek pengurusan pandemik, aplikasi MySejahtera adalah merupakan aplikasi yang dibangunkan oleh Kerajaan Malaysia untuk membantu dalam pengawalan penularan wabak COVID-19 di Malaysia melalui penilaian kesihatan sendiri bagi mengetahui status penilaian kesihatan. Pada masa yang sama, aplikasi ini juga membantu Kementerian Kesihatan Malaysia mendapatkan maklumat awal untuk mengambil tindakan yang cepat dan berkesan. Satu lagi fungsi utama MySejahtera adalah pendaftaran vaksinasi yang dirangkaikan dengan modul pengurusan vaksin di semua pusat pemberian vaksin dalam Program Imunisasi COVID-19 Kebangsaan (PICK). Sijil vaksinasi turut dipaparkan dalam aplikasi ini. Sehingga kini, lebih 30 juta pengguna telah mendaftar dengan MySejahtera.

5. Seterusnya melalui peruntukan Rancangan Malaysia Ke-12 *Rolling Plan* Tahun 2022, pelbagai projek baharu akan mula dilaksanakan. Antaranya ialah Sistem Imunisasi Kebangsaan, Sistem Registri Saringan Kanser Payudara dan Kanser Serviks, dan Sistem Transplant Kebangsaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SYED ABU HUSSIN BIN HAFIZ  
SYED ABDUL FASAL (BUKIT GANTANG)**

**TARIKH : 17 MAC 2022 (KHAMIS)**

**SOALAN**

**DATO' SYED ABU HUSSIN BIN HAFIZ SYED ABDUL FASAL (BUKIT GANTANG)** minta **MENTERI PEMBANGUNAN LUAR BANDAR** menyatakan berapa jumlah lampu jalan desa yang telah dibekalkan kepada Parlimen Bukit Gantang sepanjang tahun 2020 hingga 2021 dan kelulusan bagi tahun 2022. Ini kerana masih terdapat jalan-jalan kampung yang mendesak dan diperlukan iaitu di Kurnia Jaya, Hujung Matang, Kampung Menteri, Simpang Halt, Larut Tin, Kampung Ayer Kuning, Kampung Cheh, Changkat Ibol, Bendang Siam, Batu 8, Batu 9, Sungai Limau, Kampung Berjaya, Batu Hampar Dalam, Permatang Raja dan Permatang Laut.

**JAWAPAN**

**Tuan Yang di-Pertua,**

Untuk makluman Yang Berhormat, bagi pemasangan lampu jalan kampung (LJK) di Parlimen Bukit Gantang melalui Program Pemasangan Baharu LJK sepanjang tahun 2020 sehingga tahun 2021, sebanyak 295 unit LJK, dengan pecahan 255 unit lampu jenis *high pressure sodium vapour* (HPSV) dan 40 unit lampu jenis *light emitting diode* (LED), telah dipasang di 54 buah kampung, melibatkan kos sebanyak RM235,420.00.

Bagi tahun 2022, Kementerian tidak diluluskan sebarang peruntukan untuk pelaksanaan projek baharu. Walau bagaimanapun, sekiranya terdapat keperluan mendesak, permohonan boleh dikemukakan kepada Pejabat Daerah untuk diselaras, sebelum dikemukakan kepada Kementerian bagi tujuan semakan dan pemasangan dalam projek seterusnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB DATUK SRI RICHARD RIOT ANAK JAEM  
(SERIAN)**

**TARIKH : 17 MAC 2022 (KHAMIS)**

**SOALAN**

**DATO' SRI RICHARD RIOT ANAK JAEM ( SERIAN )** minta **MENTERI  
DALAM NEGERI** menyatakan usaha Kementerian untuk membantu kanak-  
kanak tanpa kerakyatan yang lahir di Malaysia.

**JAWAPAN**

**Tuan Yang Di Pertua,**

Untuk makluman Ahli Yang Berhormat, istilah *stateless* secara umumnya adalah merujuk kepada seseorang pada masa ini ialah “**seseorang yang tidak bernegara**” iaitu beliau tidak memiliki kewarganegaraan mana-mana Negara.

Berdasarkan kepada istilah tersebut, **tiada golongan yang berstatus *stateless* di Malaysia ini kerana tanpa dokumen perjalanan yang sah mereka tidak akan dibenarkan masuk ke negara ini.** Sementara itu bagi mereka yang sedia ada di dalam negara ini pula adalah terdiri daripada mereka yang bertaraf Warganegara Malaysia ataupun Bukan Warganegara yang ditentukan melalui taraf kewarganegaraan serta status perkahwinan ibu dan bapa sewaktu kelahiran berlaku. Jabatan Pendaftaran Negara (JPN) tidak menyimpan rekod bagi individu yang mendakwa dirinya *stateless*.

Kementerian Dalam Negeri (KDN) melalui Jabatan Pendaftaran Negara (JPN) sentiasa mengambil langkah proaktif dalam memastikan pendaftaran Sijil Kelahiran serta dokumen pengenalan diri bagi individu yang berkecukupan dapat dilaksanakan dengan mudah di seluruh negara. Antara inisiatif berterusan yang telah dilaksanakan Kerajaan ialah Program Menyemai Kasih Rakyat (MEKAR) yang merangkumi Program Pendaftaran Bergerak (*Unit Mobile*) dan *Mobile Bus*. Program-program berkenaan menyediakan pelbagai perkhidmatan termasuklah khidmat nasihat berkaitan pendaftaran Kad Pengenalan, Kelahiran dan Kematian.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**  
**DARIPADA : YB PUAN MARIA CHIN ABDULLAH (PETALING JAYA)**

**TARIKH : 17 MAC 2022 (KHAMIS)**

**SOALAN**

**PUAN MARIA CHIN BINTI ABDULLAH ( PETALING JAYA )** minta **MENTERI DALAM NEGERI** menyatakan apakah penemuan dan tindakan yang diambil oleh unit khas PDRM untuk menyiasat kes kematian dalam tahanan yang diumumkan oleh menteri pada 6 Disember 2021.

**JAWAPAN**

**Tuan Yang Di Pertua,**

Selaras dengan pengumuman Menteri pada 6 Disember 2021 yang lepas, Polis Diraja Malaysia (PDRM) telah mewujudkan Unit Siasatan Jenayah Kematian Dalam Tahanan, Jabatan Siasatan/Perundangan/Kajian Kes Bahagian Pematuhan Standard, Jabatan Integriti Pematuhan Standard (JIPS) dan mula menjalankan fungsinya pada 1 Januari 2022 setelah mengambil alih tugas yang sebelum ini digalas oleh Jabatan Siasatan Jenayah (JSJ) PDRM.

Bagi tempoh 1 Januari 2022 hingga 28 Februari 2022, Unit ini telah menerima 12 laporan kes kematian tahanan. Daripada (12) kes yang dilaporkan, (5) adalah kematian di dalam lokap manakala tiga (7) lagi kematian, iaitu masing-masing satu (1) kes adalah ketika mangsa dalam perjalanan ke hospital dan dua (6) kes mangsa meninggal dunia ketika mangsa menerima rawatan di hospital.

Daripada kesemua kes ini, satu (1) kes kematian tahanan yang berlaku di Taiping telah membawa kepada penahanan dua (2) Orang Kena Tahan (OKT) dan dua (2) anggota polis telah dituduh di bawah Seksyen 117 Kanun Prosedur Jenayah manakala enam (11) kes lagi kertas siasatan dalam proses untuk dimajukan kepada Timbalan Pendakwa Raya bagi mendapatkan arahan lanjut.



**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' DR. MOHD KHAIRUDDIN BIN  
AMAN RAZALI [ KUALA NERUS ]**

**TARIKH : 17 MAC 2022 (KHAMIS)**

**SOALAN**

**DATO' DR. MOHD KHAIRUDDIN BIN AMAN RAZALI** minta **MENTERI KESIHATAN** menyatakan mekanisme penilaian risiko yang ketat di pintu masuk sempadan negara bagi mengelakkan penularan varian COVID-19 yang lebih tinggi.

**JAWAPAN**

Tuan Yang di-Pertua,

1. Kementerian Kesihatan telah menetapkan pemeriksaan yang ketat di Pintu Masuk Antarabangsa (PMA) untuk memastikan kemasukan varian COVID-19 dapat dikawal. Antara mekanisme penilaian risiko yang diamalkan di PMA ketika ini adalah:

- (i) Bagi pengembara yang memasuki Malaysia dan ingin dikuarantin di rumah perlu membuat permohonan melalui laman web *Home Quarantine Application*. Pengembara dikehendaki mematuhi tatacara berikut:
  - (a) Pengembara perlu memuat naik Passport dan Sijil vaksinasi COVID-19 ke dalam laman web *Home Quarantine Application*;

## SOALAN NO : 25

- (b) Memasukkan maklumat rumah dan kediaman yang digunakan sebagai tempat kuarantin. Penilaian risiko akan dilakukan berdasarkan maklumat berikut:
- i. Bilangan orang di rumah atau kediaman tersebut;
  - ii. Bilangan orang tua di rumah atau kediaman tersebut (berumur 60 tahun ke atas);
  - iii. Bilangan kanak-kanak di rumah atau kediaman tersebut (di bawah umur 12 tahun);
  - iv. Bilangan orang yang mempunyai penyakit kronik di rumah atau kediaman tersebut;
  - v. Bilangan ibu hamil di rumah atau kediaman tersebut;
  - vi. Bilangan bilik di rumah atau kediaman tersebut;
  - vii. Bilangan bilik mandi di rumah atau kediaman tersebut; dan
  - viii. Bilangan bilik tidur dengan bilik mandi *en suite* di rumah atau kediaman tersebut
- (c) Maklumat yang dinyatakan ini akan diteliti sebelum menentukan sama ada pengembara boleh diberikan kebenaran untuk dikuarantin di rumah.
- (d) Bagi pengembara yang mempunyai rumah dengan bilik terhad, bilik air yang berkongsi dengan orang lain atau terdapat golongan yang berisiko seperti golongan warga emas, kanak-kanak di bawah 12 tahun, golongan yang mempunyai penyakit kronik seperti penyakit darah tinggi, diabetes, sakit jantung serta penyakit kegagalan buah pinggang, maka peluang untuk mereka dikuarantin di rumah adalah agak rendah.
- (ii) Sementara itu, pengembara akan diperiksa oleh anggota kesihatan semasa ketibaan mereka di PMA untuk menyaring sama ada mereka mempunyai gejala COVID-19. Dokumen sijil vaksinasi COVID-19 dan laporan bagi ujian RT-PCR yang telah dilaksanakan 2 hari sebelum ketibaan di PMA negara akan diperiksa oleh anggota kesihatan untuk memastikan kesahihan kedua-dua dokumen tersebut.

(iii) Ujian RT-PCR yang dilaksanakan semasa ketibaan di PMA serta ujian RT-PCR kali kedua semasa dalam masa tempoh kuarantin dapat mengenal pasti sama ada pengembara mempunyai jangkitan COVID-19. Mereka yang positif perlu diasingkan daripada ahli keluarga yang lain mengikut SOP semasa iaitu:

- (a) pengembara yang positif COVID-19 kategori 1 dan 2 boleh terus dikuarantin di rumah selama sekurang-kurangnya 7 hari;
- (b) pengembara yang positif COVID-19 2b perlu dirujuk ke *COVID-19 Assessment Centre* (CAC) di daerah masing-masing. Bagi warga emas dengan komorbid dalam kategori 2b, mereka perlu dirawat di hospital;
- (c) pengembara yang positif COVID-19 tahap 3 perlu dirujuk ke Pusat Kuarantin dan Rawatan Berisiko Rendah (PKRC); dan
- (d) pengembara yang positif COVID-19 tahap 4 dan 5 perlu dirujuk ke hospital untuk rawatan lanjut.

2. Adalah diharapkan melalui penilaian risiko yang dijalankan dapat mengekang penularan jangkitan varian COVID-19 kepada masyarakat tempatan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG KAH WOH [ IPOH  
TIMUR ]**

**TARIKH : 17 MAC 2022 (KHAMIS)**

**SOALAN**

**TUAN WONG KAH WOH** minta **MENTERI KESIHATAN** menyatakan jumlah kanak-kanak yang telah diberikan vaksin COVID-19 setakat ini dan apakah sasaran Kementerian Kesihatan dalam perkara ini.

**JAWAPAN**

Tuan Yang di-Pertua,

1. Sehingga 16 Mac 2022, seramai 1,209,694 atau 34.1% daripada jumlah kanak-kanak berumur 5 hingga 11 tahun telah menerima dos pertama vaksin COVID-19.
2. Kementerian Kesihatan menyasarkan sekurang-kurangnya 80% daripada keseluruhan kanak-kanak berumur 5 hingga 11 tahun untuk menerima vaksinasi mereka menerusi Program Imunisasi COVID-19 Kebangsaan bagi Kanak-kanak (PICKids).

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI PANGLIMA HAJAH  
AZIZAH BINTI DATUK SERI  
PANGLIMA HAJI MOHD DUN [  
BEAUFORT ]**

**TARIKH : 17 MAC 2022 (KHAMIS)**

**SOALAN**

**DATUK SERI PANGLIMA HAJAH AZIZAH BINTI DATUK SERI  
PANGLIMA HAJI MOHD DUN** minta **MENTERI KESIHATAN**  
menyatakan :-

- (a) setakat ini berapa ramai petugas kesihatan yang telah menerima vaksin booster; dan
- (b) berapa kali kekerapan ujian saringan RTK yang dijalankan terhadap petugas kesihatan.

**JAWAPAN**

Tuan Yang di-Pertua,

1. Sehingga 15 Februari 2022, seramai 510,445 kakitangan kesihatan telah menerima dos pertama. Daripada jumlah tersebut, seramai 502,688 (98.5%) telah menerima dos lengkap manakala 409,423 (81.4%) telah menerima dos penggalak (Jadual 1).

**SOALAN NO : 27**

<b>Negeri</b>	<b>Jumlah Penerima dos pertama</b>	<b>Jumlah Penerima dos lengkap</b>	<b>Peratus penerima dos lengkap</b>	<b>Jumlah Penerima dos penggalak</b>	<b>Peratus penerima dos penggalak</b>
Johor	57032	56410	98.9%	46262	82.0%
Kedah	26641	26325	98.8%	20412	77.5%
Kelantan	27411	26981	98.4%	18724	69.4%
Melaka	18145	17919	98.8%	16294	90.9%
Negeri Sembilan	20802	20616	99.1%	17362	84.2%
Pahang	20178	19914	98.7%	16425	82.5%
Perak	35030	34285	97.9%	28651	83.6%
Perlis	3960	3900	98.5%	2894	74.2%
Pulau Pinang	36384	35983	98.9%	28120	78.1%
Sabah	31435	30839	98.1%	23834	77.3%
Sarawak	31309	29424	94.0%	27848	94.6%
Selangor	109759	109241	99.5%	96916	88.7%
Terengganu	15705	15382	97.9%	10801	70.2%
W.P. Kuala Lumpur	67407	66550	98.7%	47294	71.1%
W.P. Labuan	931	905	97.2%	843	93.1%
W.P. Putrajaya	8316	8014	96.4%	6743	84.1%
<b>Malaysia</b>	<b>510445</b>	<b>502688</b>	<b>98.5%</b>	<b>409423</b>	<b>81.4%</b>

2. Berhubung kekerapan ujian saringan RTK yang dijalankan terhadap petugas kesihatan, dimaklumkan bahawa saringan RTK untuk COVID-19 dilakukan kepada petugas kesihatan yang bergejala dan kepada mereka yang dikenal pasti sebagai kontak rapat yang berisiko tinggi.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHAN FOONG HIN [ KOTA  
KINABALU ]**

**TARIKH : 17 MAC 2022 (KHAMIS)**

**SOALAN**

**TUAN CHAN FOONG HIN** minta **MENTERI KESIHATAN** menyatakan anggaran angka remaja yang lahir selepas 2005 yang merokok. Macam mana Kementerian akan melaksanakan larangan jualan rokok dan produk tembakau terhadap individu yang lahir selepas 2005.

**JAWAPAN**

Tuan Yang di-Pertua,

1. Pada tahun 2016, Institut Kesihatan Umum (IKU) telah menjalankan kaji selidik mengenai *Tobacco and E-cigarette Survey Among Malaysian Adolescents* (TECMA) dalam kalangan kanak-kanak berumur 12 tahun dan ke bawah iaitu mereka yang lahir pada 1 Januari 2005.

- (i) Seramai **125,714 (9.2%)** orang kanak-kanak merokok rokok konvensional; dan
- (ii) Seramai **62,306 (4.8%)** orang kanak lagi merokok rokok elektronik.

2. Selain daripada kajian yang dinyatakan di atas, Program Kesihatan Pergigian, Kementerian Kesihatan Malaysia telah menjalankan program

saringan dan intervensi Kesihatan Oral Tanpa Amalan Merokok (KOTAK) yang dilakukan secara tahunan. Berdasarkan saringan ini, didapati mereka yang lahir pada 1 Januari 2005 ke atas mula merokok pada:

- (i) tahun 2018 iaitu seramai 6,110 orang;
- (ii) tahun 2019 iaitu seramai 13, 426 orang; dan
- (iii) tahun 2020 iaitu seramai 12,634 orang.

3. Walau bagaimanapun, program ini tidak dapat diteruskan pada tahun 2020 dan 2021 berikutan Pelaksanaan Pengajaran dan Pembelajaran di Rumah (PDPR).

Tuan Yang di-Pertua,

4. Pada masa ini, kawalan hasil tembakau dan produk merokok adalah tertakluk kepada Peraturan-peraturan Kawalan Hasil Tembakau (PPKHT) 2004. Bagi menambah baik kawalan sedia ada, Kementerian Kesihatan sedang dalam proses gubalan Rang Undang-undang baharu bagi mengawal hasil tembakau dan semua jenis produk merokok dan juga termasuk peruntukan khusus mengenai larangan penjualan kepada generasi yang lahir pada tahun 2005 dan seterusnya.

5. Antara usaha-usaha yang dijalankan untuk melaksanakan undang-undang tersebut ialah:

- (i) mengkaji pelaksanaan berkaitan cadangan melarang penjualan dan pemilikan produk tembakau dan produk merokok yang lain termasuk rokok elektronik atau vape kepada generasi yang lahir selepas 1 Januari 2005 dengan mengambil contoh pendekatan pelaksanaan di New Zealand, Amerika Syarikat dan Filipina;
- (ii) menjalankan beberapa sesi libat urus bersama pihak industri, badan bukan kerajaan, badan profesional dan pemegang taruh yang lain yang terlibat dengan pelaksanaan larangan penjualan dan pemilikan produk tembakau dan produk merokok yang lain



## SOALAN NO : 28

termasuk rokok elektronik atau vape kepada generasi yang lahir selepas 1 Januari 2005;

- (iii) memperkukuhkan aktiviti penguatkuasaan berkaitan larangan merokok dengan penglibatan pelbagai agensi termasuk penurunan kuasa kepada pegawai-pegawai awam yang berkeelayakan; dan
- (iv) khusus bagi golongan perokok, pihak KKM sedang memperkukuhkan perkhidmatan rawatan berhenti merokok melalui kerjasama pintar antara sektor awam dan swasta melalui Perkhidmatan Berhenti Merokok mQuit dan meningkatkan kebolehdapatan perkhidmatan rawatan ini secara dalam talian melalui laman sesawang **[www.jomquit.com](http://www.jomquit.com)**.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN WONG TACK (BENTONG)**

**TARIKH JAWAB : 17 MAC 2022 (KHAMIS)**

**SOALAN**

**TUAN WONG TACK (BENTONG)** minta **MENTERI PERUMAHAN DAN KERAJAAN TEMPATAN** menyatakan rasional projek PR1MA Taman Prima Karak diluluskan di kawasan rendah yang terdedah kepada banjir. Baru siap dibina dan telah dilanda banjir teruk pada Disember lepas. Nyatakan kajian yang dilakukan sebelum projek diluluskan, pampasan kepada mangsa banjir dan langkah pencegahan bencana pada masa hadapan.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Perbadanan PR1MA Malaysia (PR1MA) merupakan sebuah agensi perumahan di bawah Kementerian Perumahan dan Kerajaan Tempatan (KPKT) yang menyediakan perumahan mampu milik untuk golongan pertengahan (M40). PR1MA kini mempunyai 3 (tiga) projek di negeri Pahang dan ketiga-tiganya berada di daerah Kuantan. Projek PR1MA Pahang Karak Setia adalah projek di bawah Kerajaan Negeri Pahang. Sehubungan itu, kelulusan projek ini bukanlah di bawah seliaan PR1MA. Walau bagaimanapun, Syarikat Perumahan Negara Berhad (SPNB) di bawah KPKT telah membangunkan projek Perumahan Karak Makmur Setia Idaman di Bentong melibatkan 232 unit rumah.

Untuk makluman Ahli Yang Berhormat juga, Projek Perumahan Karak Makmur Setia Idaman tersebut telah memenuhi syarat dan mendapat kelulusan daripada Pihak Berkuasa Tempatan (PBT). Rekabentuk infrastruktur yang dicadangkan untuk pembangunan projek ini telah mematuhi keperluan agensi teknikal yang terlibat serta adalah berdasarkan spesifikasi Manual Saliran Mesra Alam Edisi Ke-2 (MSMA 2) oleh Jabatan Pengairan dan Saliran (JPS), Garis Panduan Pelan Keselamatan Air Suruhanjaya Perkhidmatan Air Negara (SPAN) dan Garis Panduan Industri Pembentungan Malaysia.

Namun begitu, projek perumahan SPNB tersebut telah dilanda banjir besar pada bulan Disember 2021. SPNB telah memberikan sumbangan wang tunai sebanyak RM500 kepada setiap pemilik rumah di Perumahan Karak Makmur Setia Idaman yang menjadi mangsa banjir. SPNB juga telah menghantar Misi Pasca Banjir dari 11 hingga 14 Januari 2022 bagi bantuan pembersihan rumah.

## SOALAN NO: 29

Selain itu, Kerajaan Persekutuan dan Kerajaan Negeri Pahang telah memperuntukkan bantuan bagi meringankan beban dan kepayahan mangsa-mangsa banjir yang terkesan seperti berikut:

- (i) Bantuan Wang Ihsan (BWI) berjumlah RM1,500 (RM1,000 oleh Kerajaan Persekutuan dan RM500 oleh Kerajaan Negeri);
- (ii) Bantuan Barangan Keperluan Asas (BBKA) sebanyak RM2,500 bagi setiap Ketua Isi Rumah (KIR) yang telah disalurkan melalui Pejabat Daerah masing-masing;
- (iii) Rebat pembelian barangan elektrik berjumlah RM500;
- (iv) Bantuan bina semula rumah rosak akibat banjir pada kadar setara RM75,000 (RM56,000 oleh Kerajaan Persekutuan dan RM19,000 oleh Kerajaan Negeri Pahang); dan
- (v) Bantuan baik pulih rumah dengan anggaran kos antara RM5,000 hingga RM15,000.

Untuk makluman Ahli Yang Berhormat, KPKT sangat prihatin dalam menjaga kebajikan Keluarga Malaysia dan akan sentiasa mengambil tindakan sewajarnya bagi merawat keresahan rakyat.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. HAJI DZULKEFLY BIN AHMAD [KUALA SELANGOR]**

**TARIKH : 17 MAC 2022 (KHAMIS)**

**SOALAN**

**DATUK SERI DR. HAJI DZULKEFLY BIN AHMAD** minta **MENTERI KESIHATAN** mengapakah KKM masih lagi tidak menggunakan semua kepakaran yang ada di dalam universiti awam bagi menempatkan pakar-pakar kesihatan awam ini di daerah-daerah yang memerlukan.

**JAWAPAN**

Tuan Yang di-Pertua,

1. Sistem penyampaian kesihatan di negara ini merangkumi perkhidmatan yang disediakan oleh sektor awam dan sektor swasta. Bagi perkhidmatan kesihatan sektor awam merangkumi Kementerian Kesihatan Malaysia (KKM) menerusi fasiliti kesihatan merangkumi hospital, institusi dan klinik kesihatan di kawasan bandar, luar bandar dan pedalaman. Selain itu di bawah Kementerian Pengajian Tinggi yang melibatkan hospital pengajar universiti dan klinik kesihatan serta di bawah Angkatan Tentera Malaysia (ATM) menerusi hospital dan perkhidmatan kesihatannya.

2. Untuk makluman Ahli Yang Berhormat, sehingga 15 Februari 2022, jumlah Pakar Perubatan Kesihatan Awam (PPKA) adalah seramai 510 orang yang berkhidmat di fasiliti kesihatan KKM seluruh negara dan daripada jumlah tersebut seramai 182 orang Pakar Perubatan Kesihatan

Awam bertugas di Pejabat Kesihatan seluruh Malaysia. Buat masa ini pengisian perjawatan PPKA adalah sebanyak 97.8% dan hanya 4 (2.2%) perjawatan PPKA yang perlu dibuat pengisian di Pejabat Kesihatan Daerah.

3. Peranan pihak Universiti Awam ialah memberi latihan kepakaran kepada Pegawai Perubatan KKM, untuk menjadi Pakar. Setiap tahun, secara anggaran terdapat antara 40 ke 45 orang Pegawai Perubatan KKM yang tamat latihan kepakaran di universiti dan berjaya diwartakan sebagai PPKA dan mengisi perjawatan PPKA di seluruh fasiliti kesihatan KKM serta memberikan perkhidmatan kepakaran, termasuk di Pejabat Kesihatan Daerah. Pada masa yang sama juga terdapat 66 orang Pegawai Perubatan Pra-Warta PPKA yang kelak apabila diwartakan sebagai PPKA, boleh ditempatkan di mana-mana daerah demi kepentingan perkhidmatan.

4. Berhubung dengan menangani pelbagai permasalahan kesihatan awam di daerah, pihak Pejabat Kesihatan sedia bekerjasama dengan pihak universiti samada dari aspek kerjasama teknikal dan profesional, latihan kemahiran, mahupun penyelidikan bagi tujuan intervensi kesihatan awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : TUAN STEVEN CHOONG SHIAU YOON  
[ TEBRAU ]**

**TARIKH : 17 MAC 2022 (KHAMIS)**

**SOALAN**

**TUAN STEVEN CHOONG SHIAU YOON [ TEBRAU ]** minta **MENTERI SUMBER MANUSIA** menyatakan cara mengatasi kekurangan buruh asing di sektor perkilangan, sektor perladangan dan tanaman dan bagaimanakah Kerajaan mengimbangi tenaga buruh dalam sektor berkenaan sekiranya buruh asing lebih berminat untuk bekerja di ladang sawit memandangkan harga minyak sawit yang tinggi membawa pulangan upah yang lumayan kepada mereka.

**JAWAPAN**

**Tuan Yang di-Pertua,**

Bagi mengatasi masalah kekurangan buruh asing dalam jangka masa yang pendek Kementerian Dalam Negeri dan Kementerian Sumber Manusia telah melaksanakan Program Rekalibrasi Tenaga Kerja bagi mengatasi kekurangan tenaga kerja asing di negara ini.

Sehingga 30 Oktober 2021, seramai 212,926 orang PATI telah mendaftar untuk menyertai Pelan Rekalibrasi Tenaga Kerja. Berdasarkan jumlah permohonan ini, boleh disimpulkan bahawa objektif pelaksanaan pelan ini berjaya membantu pemulihan ekonomi negara dengan membantu industri mendapatkan tenaga kerja bagi sektor-sektor yang kurang diminati oleh rakyat tempatan.

Walaupun begitu, isu kekurangan buruh asing ini terus meruncing. Bagi mengatasi masalah kekurangan buruh asing terutamanya, Jemaah Menteri pada 7 April 2021 telah bersetuju membenarkan kemasukan pekerja asing baharu secara pengecualian khas kepada sektor perladangan, tertakluk kepada syarat-syarat dan Prosedur Operasi Standard yang ketat.

Seterusnya, Mesyuarat Jemaah Menteri pada 10 Disember 2021 telah bersetuju membenarkan pengambilan pekerja warga asing dalam semua sektor yang dibenarkan termasuk sektor perladangan bagi penggajian pekerja asing.

Sehubungan itu, proses permohonan bagi pengambilan pekerja asing ini akan dibuka secara berperingkat. Permohonan telah dibuka bermula pada **28 Januari 2022** untuk pengambilan 32,000 pekerja warga asing dalam **sektor perladangan secara pengecualian khas**. Manakala, permohonan pekerja asing untuk **sektor-sektor lain** yang dibenarkan bagi penggajian pekerja asing **tanpa pengecualian** khas telah dibuka pada **15 Februari 2022**.

Secara dasarnya, Kerajaan sememangnya memberi keutamaan kepada rakyat Malaysia terlebih dahulu. Kerajaan sentiasa berusaha untuk memastikan pekerja warganegara tidak dinafikan hak mereka untuk bekerja. Hanya jawatan-jawatan yang tidak dapat diisi oleh pekerja warganegara dalam sektor-sektor yang diluluskan sahaja dibenarkan untuk menggaji pekerja asing.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB PUAN NATRAH BT. ISMAIL (SEKIJANG)**

**TARIKH : 17 MAC 2022 (KHAMIS)**

**SOALAN**

**PUAN HAJAH NATRAH BINTI ISMAIL ( SEKIJANG )** minta **MENTERI DALAM NEGERI** menyatakan jumlah keseluruhan permohonan kewarganegaraan yang diterima, diluluskan ditolak dan masih dalam proses bagi permohonan di bawah Perkara 15(1), 15(2), 15(a) dan 19 Perlembagaan Persekutuan bagi tempoh lima tahun yang lalu sehingga kini.

**JAWAPAN**

**Tuan Yang Di Pertua,**

Untuk makluman Ahli Yang Berhormat, berdasarkan rekod Jabatan Pendaftaran Negara (JPN) dari tahun 2017 hingga 15 Februari 2022, sebanyak **46,596 permohonan** kewarganegaraan di bawah Perkara 15(1), 15(2), 15A dan 19 Perlembagaan Persekutuan yang diterima dan dari jumlah itu, **5,656 permohonan** diluluskan, **4,507 permohonan** ditolak dan **33,966 permohonan** masih diproses.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ROBERT LAWSON CHUAT  
[ BETONG ]**

**TARIKH : 17 MAC 2022 (KHAMIS)**

**SOALAN**

**DATUK ROBERT LAWSON CHUAT [ BETONG ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah Kementerian merancang untuk menambah baik Skim Pendaftaran Perniagaan secara percuma pada tahun 2022 terutamanya kepada rakyat yang ingin memulakan perniagaan akibat terkesan dengan pandemik.

**JAWAPAN**

**Yang di-Pertua,**

1. Untuk makluman Ahli Yang Berhormat, Suruhanjaya Syarikat Malaysia (SSM) yang merupakan agensi di bawah KPDNHEP telah mengambil langkah ke hadapan bagi menyokong usaha dan inisiatif Kerajaan untuk memudah cara serta membantu pendaftaran perniagaan melalui pengenalan Skim Pendaftaran Perniagaan Prihatin (SPPP) yang telah dilancarkan pada 23 Disember 2020. Usaha ini adalah untuk membantu kelangsungan hidup rakyat dengan menceburi bidang perniagaan terutamanya golongan B40 dan pelajar institusi pengajian tinggi sepenuh masa.

2. SSM sentiasa komited untuk membantu masyarakat yang terkesan akibat pandemik COVID-19 dengan memperkenalkan SPPP. Pengenalan SPPP juga bertujuan membantu golongan B40 yang terjejas pendapatan akibat pandemik COVID-19 dan pelajar sepenuh masa di institusi pengajian tinggi untuk mendaftarkan perniagaan mereka secara percuma melalui pengecualian fi pendaftaran dan maklumat perniagaan.
3. SPPP diperkenalkan sebagai sokongan dan galakan kepada masyarakat khususnya golongan B40 untuk menceburi bidang perniagaan bagi menjana sumber pendapatan alternatif kepada penggajian terutamanya apabila hilang pekerjaan. SPPP bukan sahaja dapat menarik minat golongan yang terkesan untuk menceburi bidang perniagaan tetapi juga dapat membantu mereka menerokai bidang perniagaan yang berpotensi untuk menjana pendapatan.
4. Inisiatif SPPP ini juga akan memastikan golongan B40 menceburi bidang perniagaan secara sah di sisi undang-undang serta meningkatkan kepercayaan pembeli untuk berurusan dengan peniaga yang sah. Perniagaan yang berdaftar juga akan memudahkan usahawan untuk mendaftarkan akaun semasa perniagaan, mengadakan kontrak atau melaksanakan perjanjian perniagaan. Bakal usahawan yang berdaftar melalui SPPP ini berpeluang untuk menyertai latihan keusahawanan yang disediakan oleh Kerajaan dan agensi berkaitan serta melayakkan mereka untuk memohon bantuan-bantuan Kerajaan yang diberikan melalui pelbagai inisiatif di dalam bajet 2022.
5. Berdasarkan rekod SSM, sebanyak **28,546** permohonan SPPP telah didaftarkan di bawah Akta Pendaftaran Perniagaan 1956 dalam tempoh 1 Januari 2021 sehingga 31 Januari 2022. Daripada jumlah tersebut, sebanyak **18,613** permohonan adalah daripada golongan B40 dan **9,933** permohonan diterima daripada pelajar institusi pengajian tinggi sepenuh masa. Manakala sebanyak **28,121** perniagaan milikan tunggal dan **425** perniagaan perkongsian telah didaftarkan melalui SPPP dalam tempoh tersebut.

6. Sebagai galakkan kepada orang ramai untuk menceburi bidang perniagaan dan memanfaatkan SPMP, SSM telah melaksanakan pendekatan proaktif melalui penganjuran Program Bimbingan Usahawan 2021 (PBU21) yang akan diteruskan pada tahun ini. Program ini bermatlamat untuk memberikan pendedahan mengenai amalan perniagaan yang beretika kepada golongan sasaran dan membantu mereka meningkatkan taraf ekonomi sendiri melalui aktiviti perniagaan.
7. SSM juga akan melaksanakan Program Usahawan Muda 2022 (PUM22) yang merupakan inisiatif SSM dalam memberi pendedahan serta galakkan kepada pelajar dan belia untuk menceburi bidang perniagaan. Inisiatif ini bermatlamat untuk memberi kefahaman berkaitan tatacara dan faedah mendaftarkan perniagaan, strategi perniagaan dan pengurusan kewangan, strategi pemasaran digital serta perkongsian pengalaman oleh usahawan berjaya. Program ini akan diadakan dengan kolaborasi pelbagai pihak terutamanya institusi pengajian tinggi dan Persatuan Belia Negeri.
8. Usaha ini juga mendukung **Inisiatif Semarak Niaga Keluarga Malaysia** yang bertujuan membina keupayaan dan daya saing serta pemudahcara dalam sektor perniagaan. Inisiatif ini bakal membangkitkan semula sektor perniagaan dan komuniti usahawan yang secara langsung **akan menyumbang kepada penciptaan peluang pekerjaan baharu dan mengurangkan kadar pengangguran dalam peralihan pasca pandemik serta pemangkin kepada pertumbuhan ekonomi negara.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : TUAN NGA KOR MING [ TELUK INTAN ]**

**TARIKH : 17 MAC 2022 (KHAMIS)**

**SOALAN**

**TUAN NGA KOR MING [ TELUK INTAN ]** minta **MENTERI SUMBER MANUSIA** menyatakan :-

- a) apakah langkah-langkah yang sedang diambil oleh pihak Kerajaan untuk memenuhi kehendak sumber tenaga dalam semua lapisan sektor ekonomi digital yang memerlukan 500,000 orang yang berkemahiran teknologi digital dalam tempoh 3 tahun mengikut pelan MyDigital; dan
- b) apakah pencapaian atau kedudukan terkini dalam memenuhi kehendak sumber tenaga dalam aspek yang disebut di atas.

**JAWAPAN**

**Tuan Yang Di-Pertua,**

MyDIGITAL adalah satu inisiatif yang melambangkan aspirasi Kerajaan mentransformasi Malaysia menjadi negara berpendapatan tinggi yang berpacuan pendigitalan dan sebagai peneraju serantau dalam ekonomi digital. Rangka Tindakan (*Blueprint*) Ekonomi Digital Malaysia menggariskan usaha dan inisiatif dalam mencapai aspirasi MyDIGITAL, antaranya 500 ribu pekerjaan baharu diwujudkan menjelang tahun 2025.

Dalam konteks ini, pekerjaan baharu yang dimaksudkan adalah merentasi sektor, yang menyumbang atau menerima manfaat daripada ekonomi digital negara secara langsung atau tidak langsung.

Namun demikian, Bakat Digital adalah salah satu teras utama di bawah Rangka Tindakan Ekonomi Digital Malaysia dan juga Dasar Revolusi Perindustrian Keempat Negara. Ianya merangkumi strategi-strategi dan inisiatif untuk dilaksanakan yang melibatkan pihak berkepentingan antaranya pelajar sekolah, pelajar universiti, pekerja gig dan juga pekerja di sektor awam dan swasta.

Inisiatif-inisiatif ini sedang giat dilaksanakan, antaranya:

- (a) Semua sekolah di Malaysia akan mengintegrasikan kemahiran digital dalam pendidikan peringkat rendah dan menengah melalui program *My Digital Maker* dan *My Digital Teacher* **dengan izin,**
- (b) Di peringkat universiti, kerjasama awam-swasta dilaksanakan melalui Lembaga Teknologis Malaysia untuk memastikan graduan dilengkapi dengan kemahiran yang diperlukan oleh industri;

## SOALAN NO : 34

- (c) Kerajaan memperkenalkan program 'GigUp' bagi melengkapkan pekerja gig dengan kemahiran digital yang bersesuaian bagi meningkatkan kebolehpasaran dan memastikan pekerja gig kekal relevan dalam ekonomi digital. Setakat Disember 2021, seramai 28,477 pekerja gig telah dinaiktaraf kemahiran melalui program PENJANA HRD Corp; dan
- (d) Unit Pemodenan Tadbiran dan Perancangan Pengurusan Malaysia akan memacu Transformasi Sektor Awam berdasarkan Pelan Strategik Pendigitalan Sektor Awam 2021-2025

Kementerian Sumber Manusia selaku peneraju Kluster Bakat Digital di bawah inisiatif MyDIGITAL sentiasa bekerjasama dengan Kementerian dan agensi yang terlibat bagi meneliti program dan aktiviti baharu yang boleh diketengahkan untuk pembangunan bakat digital negara.

Kementerian ini juga turut bekerjasama dengan MyDIGITAL Corporation bagi meneroka kaedah yang bersesuaian untuk membangunkan daya insan negara.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' WIRA HAJI AMIRUDDIN BIN HAJI  
HAMZAH [ KUBANG PASU ]**

**TARIKH : 17 MAC 2022 (KHAMIS)**

**SOALAN**

**DATO' WIRA HAJI AMIRUDDIN BIN HAJI HAMZAH [KUBANG PASU]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah jaminan Kementerian dalam memastikan harga siling runcit ayam standard pada RM8.90 satu kilogram kekal menjelang sambutan Hari Raya Aidilfitri akan datang. Apakah langkah jangka sederhana dan panjang yang dirancang dalam mengatasi isu kenaikan harga barang lebih tinggi berbanding kadar kenaikan pendapatan di kalangan rakyat.



**JAWAPAN**

**Yang di-Pertua,**

Kerajaan telah melaksanakan Penentuan Harga Maksimum bagi Ayam dan Telur Ayam sehingga 5 Jun 2022. Ini bagi memberikan kestabilan harga kepada kedua-dua item penyumbang sumber protein utama penduduk Negara ini.

Tarikh pelaksanaan kawalan ini merangkumi bulan Ramadhan dan perayaan Hari Raya Puasa 2022.

Kementerian sentiasa memantau isu kenaikan harga mendadak yang berlaku melalui pemantauan dan pemeriksaan secara langsung ke atas premis yang mengalami isu tersebut. Mana-mana peniaga yang didapati menaikkan harga barangan secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan dibawah Sek. 14 AKHAP boleh diambil ke atas mereka.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHONG CHIENG JEN [ STAMPIN ]**

**TARIKH : 17 MAC 2022 (KHAMIS)**

**SOALAN**

**TUAN CHONG CHIENG JEN [ STAMPIN ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sebab harga ayam dan telur meningkat secara mendadak kebelakangan ini dan apakah cara penyelesaian jangka masa pendek dan panjang yang akan diambil oleh Kementerian untuk menangani masalah ini.

**JAWAPAN**

**Yang di-Pertua,**

Kenaikan harga ayam dan telur ayam meningkat adalah disebabkan kenaikan harga makanan ternakan iaitu soya dan jagung yang diimport. Makanan ternakan mewakili 70% daripada kos pengeluaran ayam dan telur ayam.

Pelan Jangka Pendek yang diambil adalah dengan mengadakan Skim Harga Maksimum Musim Perayaan dan Skim Harga Maksimum Keluarga Malaysia bagi menetapkan harga maksimum untuk barangan tertentu pada tempoh tertentu. Kerajaan turut melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item penyumbang sumber protein utama penduduk Negara ini.

Kementerian bekerjasama dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan dijalankan dari semasa ke semasa.

Pelan Jangka Panjang adalah Kementerian sentiasa memantau isu kenaikan harga mendadak yang berlaku melalui pemantauan dan pemeriksaan secara langsung ke atas premis yang mengalami isu tersebut. Mana-mana peniaga yang didapati menaikkan harga barangan secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan di bawah Sek. 14 AKHAP boleh diambil ke atas mereka

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : DATUK SERI HAJI AHMAD BIN HAJI  
MASLAN [ PONTIAN ]**

**TARIKH : 17 MAC 2022 (KHAMIS)**

**SOALAN**

**DATUK SERI HAJI AHMAD BIN HAJI MASLAN [PONTIAN]** minta **MENTERI SUMBER MANUSIA** menyatakan langkah-langkah untuk meramaikan rakyat memiliki pendidikan tinggi dan kemahiran tinggi di negara ini. Apakah usaha-usaha agar mereka yang berpendidikan dan berkemahiran tinggi juga mendapat gaji yang sepadan dengan kelayakan yang diperolehi.

**JAWAPAN**

**Tuan Yang di-Pertua,**

Program Latihan Industri Berstruktur dilaksanakan oleh TalentCorp untuk menyediakan bakat dengan pengalaman kerja melalui latihan amali yang berkualiti. Melalui SIP, majikan memainkan peranan proaktif dalam membangun dan menyediakan bakat yang berkemahiran tepat. Ini akan memastikan mereka menamatkan pengajian dengan kemahiran yang relevan dengan kehendak industri. Program SIP ini dilihat sebagai satu langkah intervensi yang memberi ruang kepada mahasiswa menimba pengalaman dalam alam pekerjaan dan mempraktikkan apa yang telah dipelajari sebelum mereka memulakan kerjaya.

Jabatan Pembangunan Kemahiran telah memperkenalkan dan melaksanakan Sistem Latihan Dual Nasional berkonsepkan Work-Based

Learning iaitu pembelajaran dalam persekitaran kerja sebenar melalui kemahiran *hands-on* kepada aktiviti kerja di syarikat. Sistem Latihan Dual Nasional membabitkan dua situasi pembelajaran iaitu 70 hingga 80 peratus latihan praktikal di syarikat Sistem Latihan Dual Nasional dan 20 hingga 30 peratus latihan teori di pusat latihan Sistem Latihan Dual Nasional.

Program Sistem Latihan Dual Nasional ini menjadi platform komprehensif kepada mahasiswa yang berhasrat mengembangkan kepakaran melalui perolehan kemahiran teknikal, sosial dan kemanusiaan melalui sosialisasi di tempat kerja. Program Sistem Latihan Dual Nasional turut menawarkan prospek kerjaya menarik yang merangkumi bidang pekerjaan utama di Malaysia berasaskan Standard Kemahiran Pekerjaan Kebangsaan yang menggariskan kompetensi atau kemahiran diperlukan bagi pekerjaan mengikut sektor.

Inisiatif peningkatan kemahiran dan latih semula (*reskilling* dan *upskilling*) turut ditawarkan bagi membolehkan rakyat mendapat pengetahuan dan kemahiran terkini dan selari dengan perkembangan teknologi semasa. Menerusi inisiatif latih semula (*reskilling*) ini, rakyat berpeluang mengasah semula kemahiran supaya kekal relevan dengan skop kerja semasa. Sebagai contoh, mereka yang pada masa kini terlibat dalam mengendalikan peralatan berteraskan sistem analog dapat mengikuti pelbagai program khas untuk menguasai kemahiran pengendalian peralatan berteraskan sistem digital yang selari dengan keperluan Industri 4.0.

Inisiatif peningkatan kemahiran (*upskilling*) pula memberi peluang kepada pekerja untuk meningkat, menambah, memperluas serta memperkasakan pengetahuan dan kemahiran yang dimiliki. Inisiatif ini berfokuskan kepada intervensi yang membawa nilai tambah kepada kemahiran sedia ada rakyat. Peningkatan kemahiran yang dilalui bukan sahaja boleh dijadikan pemangkin untuk mendapatkan pekerjaan baharu, tetapi turut berupaya mendorong kepada penciptaan pekerjaan.

Kementerian Sumber Manusia menerusi agensi di bawahnya seperti Jabatan Tenaga Manusia, Jabatan Pembangunan Kemahiran, Pembangunan Sumber Manusia Berhad, dan Pertubuhan Keselamatan Sosial aktif dalam menawarkan pelbagai program latih semula

(*reskilling*) dan peningkatan kemahiran (*upskilling*) berteraskan TVET dan pelbagai disiplin cabang pekerjaan.

Agensi-agensi ini menawarkan program latihan kemahiran meliputi aspek teori dan praktikal mencakupi pelbagai bidang yang bersesuaian dengan permintaan industri semasa. Kursus-kursus jangka pendek dan program perantisan ditawarkan kepada para peserta yang berminat untuk mendalami kemahiran bersesuaian dengan minat dan latar belakang mereka.

Jika selama ini negara bergantung kepada tenaga kerja asing, sudah tiba masanya graduan tempatan berpendidikan dan berkemahiran tinggi diberi peluang sebagai peneraju utama dalam pasaran pekerjaan negara. Mereka perlu diberi ruang dan peluang seluas-luasnya untuk menyumbangkan kemahiran dan kepakaran mereka kepada negara sendiri dengan bayaran gaji yang setimpal.

Majikan disaran menawarkan gaji yang lebih memuaskan kepada golongan ini sejajar dengan nilai tambah yang ada pada mereka melalui pendidikan dan latihan secara formal dari institusi pendidikan dan latihan terlibat. Peruntukan besar yang dibelanjakan oleh Kerajaan dalam pelaksanaan program ini hanya menjadi suatu pembaziran jika bakat-bakat yang dilatih ini disia-siakan oleh pihak majikan.

Sejajar dengan semangat Keluarga Malaysia, adalah amat wajar jika tenaga kerja tempatan berpendidikan dan berkemahiran tinggi dijadikan pilihan utama para majikan dengan bayaran gaji sepadan.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATIN PADUKA DR. TAN YEE KEW  
[ WANGSA MAJU ]**

**TARIKH : 17 MAC 2022 (KHAMIS)**

**SOALAN**

**DATIN PADUKA DR. TAN YEE KEW [ WANGSA MAJU ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sejauh mana kesan dan impak yang didapati daripada tindakan yang dijalankan Kementerian bagi mengatasi masalah kenaikan harga barang khususnya bahan makanan asas.

**JAWAPAN:**

**Yang di-Pertua,**

Kementerian telah mengadakan Skim Harga Maksimum Musim Perayaan (SHMMP) dan Skim Harga Maksimum Keluarga Malaysia (SHMKM) bagi menetapkan harga maksimum untuk barangan tertentu dan melaksanakan Penentuan Harga Maksimum bagi Ayam dan Telur Ayam bermula 5 Februari sehingga 5 Jun 2022 untuk menstabilkan harga kedua-dua item tersebut.

SHMMP Tahun Baru Cina 2022 berlangsung dari 29 Januari 2022 hingga 4 Februari 2022 telah melibatkan 8,150 pemeriksaan premis di seluruh negara. Manakala SHMKM dilaksanakan pada 1 Januari 2022 hingga 4 Februari 2022 yang melibatkan 43,348 jumlah pemeriksaan premis. Kesan langsung adalah harga stabil dan dikawal kerana peniaga mengikuti arahan harga maksimum oleh kerajaan. Respon rakyat di media kebanyakannya adalah berpuas hati dengan penurunan harga terutama ayam dan sayur.

Selain daripada itu, Kementerian turut melaksanakan Program Jualan Keluarga Malaysia (PJKM) bagi membantu mengurangkan kos sara hidup rakyat di setiap kawasan Parlimen dengan kekerapan dua (2) kali sebulan. Sehingga 2 Mac 2022, PJKM telah dilaksanakan di 220 kawasan Parlimen daripada keseluruhan 222 kawasan Parlimen dimana baki dua (2) kawasan Parlimen yang masih belum melaksanakan PJKM adalah Parlimen Selangau (P.214) dan Parlimen Tanjong Manis (P.206). PJKM bagi kedua-dua kawasan Parlimen ini dirancang akan dilaksanakan masing-masing pada 5 hingga 6 Mac 2022 dan 19 hingga 20 Mac serta 26 Mac 2022. Pelaksanaan PJKM di 220 Parlimen tersebut telah melibatkan 936 lokasi di seluruh Negara.

Sambutan yang diterima daripada para pengguna di 220 kawasan Parlimen yang telah diadakan adalah menggalakkan dengan anggaran pengunjung seramai 1,478,823 orang dan anggaran hasil jualan sejumlah RM29,021,592.70. PJKM ini akan diteruskan pelaksanaannya di seluruh Negara sehingga minggu keempat bulan Mac 2022 dengan kerjasama rakan-rakan strategik yang kini telah mencapai 167 rakan strategik serta kerjasama Kementerian Pertanian dan Industri Makanan (MAFI).

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ROBERT LAWSON CHUAT [BETONG]**

**TARIKH : 17 MAC 2022 (KHAMIS)**

**SOALAN**

**DATUK ROBERT LAWSON CHUAT [ BETONG ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan perancangan Kementerian untuk memperkasakan bilangan pegawai penguat kuasa dan bukan penguat kuasa dalam menangani cabaran kenaikan harga barang pada tahun 2022.

**JAWAPAN**

**Yang di-Pertua,**

Isu kenaikan harga barang dan perkhidmatan yang berlaku pada masa ini merupakan cabaran utama Kementerian yang sedang ditangani dengan sebaiknya. Pemantauan yang menyeluruh dan tindakan penguatkuasaan di lapangan sentiasa ditingkatkan dari masa ke masa. Walau bagaimanapun, Kementerian ini menyedari bahawa bilangan pegawai penguat kuasa sedia ada iaitu seramai 2,575 orang di seluruh negara adalah tidak mencukupi bagi menjalankan tugas-tugas penguatkuasaan yang melibatkan 12 akta induk yang berkaitan.

Sebagai usaha memperkasakan bilangan pegawai penguat kuasa bagi tahun 2022, Kementerian sedang mengambil tindakan bagi pengisian kekosongan jawatan sedia ada selain urusan pengambilan pegawai lantikan baru yang kini sedang dilaksanakan oleh Suruhanjaya Perkhidmatan Awam Malaysia.

Berdasarkan statistik syarikat dan perniagaan berdaftar yang dikeluarkan oleh Suruhanjaya Syarikat Malaysia (SSM) yang berjumlah 10,705,599, nisbah pegawai penguat kuasa berbanding jumlah syarikat dan perniagaan yang berdaftar adalah besar iaitu 1 pegawai penguat kuasa untuk 4,158 syarikat dan perniagaan. Selain itu, berdasarkan kepada jumlah populasi penduduk Malaysia, nisbah seorang pegawai penguat kuasa adalah bersamaan 12,699 orang penduduk. Oleh itu, terdapat beberapa sektor perniagaan dan perdagangan yang tidak dapat dipantau sebahagian atau sepenuhnya oleh Kementerian.

Sehubungan itu, berdasarkan kepada peningkatan peranan dan bebanan tugas yang dihadapi kini, pertambahan jawatan pegawai penguat kuasa di seluruh Negara perlu diberi pertimbangan sewajarnya bagi memantau isu-isu berkaitan kenaikan harga dan keberadaan bekalan barangan serta perlindungan ke atas pengguna.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB PUAN WONG SHU QI (KLUANG)**

**TARIKH : 17 MAC 2022 (KHAMIS)**

**SOALAN**

**PUAN WONG SHU QI ( KLUANG )** minta **MENTERI DALAM NEGERI** menyatakan sebab menolak permohonan penubuhan Parti Aspirasi Sains Malaysia (Sains).

**JAWAPAN**

**Tuan Yang Di Pertua,**

Parti Aspirasi Sains Malaysia (selepas ini dirujuk sebagai 'SAINS') dengan nombor permohonan NSID-011-09062021 telah mengemukakan permohonan ke Jabatan Pendaftaran Pertubuhan Malaysia (JPPM) untuk didaftarkan sebagai sebuah pertubuhan di bawah kategori politik pada 09 Jun 2021.

Antara matlamat utama penubuhan Parti SAINS yang dinyatakan adalah untuk menggunakan inovasi, pendidikan, dan pembaharuan ekonomi sebagai kunci kejayaan Malaysia; untuk memastikan Malaysia tidak ketinggalan dalam dunia yang terus maju; dan kemodenan teknologi telah terbukti meningkatkan taraf kestabilan, kesihatan, dan kebahagiaan kepada dunia. Dari segi keahlian, Parti SAINS adalah terbuka kepada semua warganegara Malaysia bumiputera yang berumur 18 tahun keatas.

Berdasarkan semakan terperinci oleh JPPM mendapati bahawa perlembagaan Parti SAINS yang dikemukakan adalah tidak teratur dan tidak mematuhi Jadual 1 (Perlembagaan dan Aturan-Aturan Pertubuhan-Pertubuhan) di bawah Seksyen 7(3)(e), Akta Pertubuhan 1966 (Akta 832) serta gagal memenuhi syarat-syarat utama yang boleh dikategorikan pertubuhan ini sebagai sebuah pertubuhan kategori politik. Sehubungan itu, keputusan permohonan pendaftaran Parti SAINS telah ditolak pada 21 Januari 2022 oleh JPPM.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB TUAN GOBIND SINGH DEO (PUCHONG)**

**TARIKH : 17 MAC 2022 (KHAMIS)**

**SOALAN**

**TUAN GOBIND SINGH DEO ( PUCHONG )** minta **MENTERI DALAM NEGERI** menyatakan jumlah wartawan, aktivis dan agensi akhbar yang telah diambil tindakan dan dituduh untuk kesalahan di bawah Akta Komunikasi dan Multimedia sejak daripada 2020 sehingga sekarang. Nyatakan status kes-kes tersebut.

**JAWAPAN**

**Tuan Yang Di Pertua,**

Bagi tahun 2020 sehingga kini, sejumlah 23 siasatan dilaksanakan bagi kes-kes yang melibatkan wartawan, akhbar dan aktivis di bawah Akta Komunikasi dan Multimedia 1998. Daripada jumlah tersebut, 2 kes telah dituduh, 10 kes masih berada dalam siasatan dan selebihnya iaitu 12 kes berstatus di bawah pemerhatian.

<b>Tahun</b>	<b>Dalam Siasatan</b>	<b>KIV/KUS</b>	<b>Tuduh</b>	<b>Jumlah</b>
<b>2020</b>	<b>2</b>	<b>7</b>	<b>0</b>	<b>9</b>
<b>2021</b>	<b>7</b>	<b>5</b>	<b>1</b>	<b>13</b>
<b>2022</b>	<b>1</b>	<b>0</b>	<b>0</b>	<b>1</b>
<b>JUMLAH</b>	<b>10</b>	<b>12</b>	<b>1</b>	<b>23</b>

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI HAJI IDRIS BIN JUSOH [ BESUT ]**

**TARIKH : 17 MAC 2022 (KHAMIS)**

**SOALAN**

**DATO' SERI HAJI IDRIS BIN JUSOH [ BESUT ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah tindakan Kementerian untuk menangani isu peniaga runcit yang mengenakan pembelian bersyarat kepada pengguna sebelum dibenarkan membeli barangan kawalan.

**JAWAPAN**

**Yang di-Pertua,**

Seksyen 19 Akta Kawalan Bekalan 1961 memperuntukkan larangan kepada peniaga yang mengenakan apa bentuk syarat kepada pengguna yang hendak membeli barang-barang kawalan melainkan dengan syarat-syarat tertentu yang dibenarkan iaitu:

- i. menghendaki bayaran dibuat segera;
- ii. menetapkan masa bayaran atau penghantaran; atau
- iii. menghendaki bayaran deposit berhubung pembelian barang kawalan tersebut.

Kementerian serius menangani isu penjualan barang kawalan bersyarat kerana ianya boleh mengundang kepada gangguan bekalan di pasaran. Antara tindakan serta merta Kementerian untuk menangani isu penjualan bersyarat barang kawalan adalah seperti:

- i. Mengedarkan Notis Makluman Larangan Pengenaan Syarat Tidak Sah bagi Jualan Barang Kawalan kepada peniaga dan orang awam;
- ii. Membuat hebahan media mengenai larangan dan kesalahan menjalankan pembelian barang kawalan bersyarat bagi meningkatkan kesedaran peniaga runcit berhubung larangan aktiviti tersebut; dan
- iii. Mengeluarkan arahan kepada KPDNHEP seluruh negara bagi menjalankan risikan, pemeriksaan dan mengambil tindakan kes ke atas premis–premis perniagaan yang melakukan kesalahan seksyen 19 tersebut.

Seperti yang boleh dilihat pada kebelakangan ini, KPDNHEP Kelantan dan Kedah telah mengambil tindakan kes ke atas enam (6) peniaga runcit yang telah didapati mengenakan syarat-syarat tertentu kepada pengguna yang hendak membeli barang kawalan gula, tepung gandum atau minyak masak polibeg 1 kilogram.

Jika sabit kesalahan, peniaga-peniaga tersebut boleh didenda tidak melebihi RM1 juta bagi orang perseorangan atau penjara tidak melebihi tiga tahun atau kedua-duanya sekali. Manakala bagi syarikat boleh didenda tidak melebihi RM2 juta.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN VIVIAN WONG SHIR YEE  
[ SANDAKAN ]**

**TARIKH : 17 MAC 2022 (KHAMIS)**

**SOALAN**

**PUAN VIVIAN WONG SHIR YEE** minta **MENTERI KESIHATAN** menyatakan sama ada Kementerian mempunyai unit khas untuk memeriksa kes kematian yang dilaporkan berkaitan dengan vaksinasi COVID-19 dan apakah dapatan daripada penelitian itu dan penilaiannya.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) mempunyai Jawatankuasa Farmakovigilans Khas Vaksin COVID-19 (JFK) yang terdiri daripada pakar-pakar daripada pelbagai bidang termasuk kardiologi, imunologi, hematologi, neurologi, perubatan dalaman, patologi, penyakit berjangkit, geriatrik dan forensik dari fasiliti KKM, universiti dan swasta.
2. Untuk makluman Ahli Yang Berhormat, semua laporan Kesan Advers Susulan Imunisasi (AEFI) serius termasuk kematian akan disiasat oleh pasukan penyiasat di Pusat Kesihatan Daerah (PKD)/Jabatan Kesihatan Negeri (JKN).
3. JFK diberikan tanggungjawab untuk meneliti laporan AEFI yang disediakan oleh pasukan penyiasat ini di peringkat fasiliti berdasarkan



laporan perubatan pesakit dan laporan bedah siasat (sekiranya ada).

4. Semua laporan seterusnya akan dibentangkan kepada Jawatankuasa Penasihat Kesan Advers Ubat Kebangsaan (MADRAC) sebelum dihantar kepada pangkalan data global *World Health Organisation* (WHO). Semua laporan AEFI dan maklumat yang diterima oleh NPRA termasuk isu keselamatan di peringkat global merupakan sumber maklumat penting dalam menilai risiko keselamatan vaksin yang sedang digunakan bagi memastikan nisbah manfaat dan risiko (*benefit-risk ratio*) vaksin-vaksin ini masih positif. Sekiranya sebarang isu keselamatan dapat disahkan, cadangan untuk melaksanakan tindakan regulatori terhadap penggunaan vaksin akan dikemukakan kepada Pihak Berkuasa Kawalan Dadah (PBKD) jika perlu.

5. Sejak bermulanya PICK sehingga 11 Mac 2022, sejumlah 67,978,370 dos vaksin COVID-19 telah diberikan terdiri daripada jenama Comirnaty (Pfizer), CoronaVac (Sinovac), AstraZeneca (AZ), Convidecia (CaSino) dan COVILCO (Sinopharm).

6. Secara keseluruhannya, Sistem Pelaporan AEFI NPRA telah menerima sejumlah 25,746 laporan AEFI vaksin COVID-19 yang perlu dinilai, termasuk 1,411 laporan melibatkan penerima dos penggalak dan 182 laporan bagi penerima vaksin kanak-kanak berusia 5 hingga 11 tahun. Kadar pelaporan AEFI melalui Sistem AEFI NPRA ini secara keseluruhannya direkodkan pada 379 laporan bagi setiap sejuta dos.

7. Hasil penilaian ke atas laporan yang diterima, 93% atau 23,957 daripada AEFI yang dilaporkan adalah bagi kes-kes yang tidak serius. Demam, sakit pada tempat suntikan, sakit kepala, sakit otot dan keletihan merupakan antara kesan advers yang paling kerap dilaporkan oleh penerima vaksin. Kesan-kesan ini biasanya akan pulih dalam masa satu hingga dua hari.

8. Daripada jumlah keseluruhan laporan AEFI yang diterima, terdapat 1,789 laporan (bersamaan kadar 26 laporan bagi setiap sejuta dos) yang dikategorikan sebagai AEFI serius berdasarkan klasifikasi Pertubuhan Kesihatan Sedunia (WHO) iaitu merujuk kepada kesan yang

menyebabkan kemasukan ke dalam wad, atau pemanjangan tempoh di wad, membahayakan nyawa, menyebabkan kehilangan upaya yang signifikan atau memerlukan intervensi untuk mencegah kerosakan kekal tubuh, menyebabkan kecacatan semasa lair, atau disyaki menyebabkan kematian.

9. Semua laporan yang AEFI serius yang diterima ini memerlukan penyiasatan lengkap dan penilaian terperinci sebelum hubungkait kesan yang dilaporkan dan vaksin yang diterima dapat ditentukan. Jumlah laporan AEFI serius yang diterima ini termasuk 607 laporan yang melibatkan kematian di kalangan penerima vaksin COVID-19. Daripada jumlah ini, 451 laporan telah selesai penyiasatan dan penilaian oleh JFK, yang mana setakat ini tiada kes kematian yang dilaporkan mempunyai hubungkait secara langsung dengan vaksin yang diterima. Sebanyak 156 laporan masih dalam proses penyiasatan sebelum dinilai oleh JFK.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHE ALIAS BIN HAMID [ KEMAMAN ]**

**TARIKH : 17 MAC 2022 (KHAMIS)**

**SOALAN**

**TUAN CHE ALIAS BIN HAMID [ KEMAMAN ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan penyelesaian isu kekurangan bekalan minyak masak paket bersubsidi dalam pasaran domestik.

**JAWAPAN**

**Yang di-Pertua,**

Kementerian ini sedang giat menangani isu kekurangan bekalan minyak masak subsidi di pasaran dengan mengambil langkah-langkah seperti berikut:

- i. Mengarahkan pemeriksaan dan pengauditan di setiap peringkat rangkaian pengedaran minyak masak;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
- iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;

- iv. Menggantungkan kuota dan lesen ke atas syarikat yang didapati terbabit melakukan penyelewengan dan penyeludupan;
- v. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan; dan
- vi. Mempertingkatkan kerjasama dengan agensi-agensi penguatkuasaan lain seperti Jabatan Kastam Diraja Malaysia (JKDM), Angkatan Tentera Malaysia (ATM), Polis Diraja Malaysia (PDRM) dan Eastern Sabah Security Command (ESSCOM).

**Yang di-Pertua,**

Pada tahun ini sehingga 17 Mac 2022, KPDNHEP telah menjalankan 6,955 pemeriksaan ke atas premis-premis yang terbabit dengan urusan minyak masak, 25 kertas siasatan telah dibuka dan 94 premis masih dalam tindakan pengauditan. Setakat ini, 15 syarikat pembungkus telah digantung kuota skim minyak masak (COSS) dan 5 syarikat pemborong telah digantung lesen urusan minyak masak (Lesen Borong CSA).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK HAJI AHMAD JAZLAN BIN  
YAAKUB (MACHANG)**

**TARIKH : 17 MAC 2022 (KHAMIS)**

**SOALAN**

Minta **MENTERI PEMBANGUNAN USAHAWAN DAN KOPERASI** menyatakan apakah jenis bantuan yang telah disalurkan kepada usahawan mikro dan *startup company* yang terjejas teruk akibat daripada pandemik serta banjir kilat yang melanda negara penghujung tahun lalu. Dan sejauh mana Kementerian memainkan peranan dalam era pandemik ini sebagai orang tengah antara pembekal barangan dan usahawan mikro yang kedua-duanya semakin terhimpit.

**JAWAPAN**

**Tuan Yang di-Pertua,**

Kementerian Pembangunan Usahawan dan Koperasi amat prihatin dengan ujian dan cabaran yang dihadapi oleh usahawan yang terkesan akibat pandemik COVID-19 serta bencana alam yang melanda negara baru-baru ini. Bagi membantu meringankan beban usahawan dan memastikan bantuan yang diberikan oleh kerajaan dapat mempercepatkan pemulihan usahawan yang terkesan, Kementerian telah mengadakan sesi libat urus bersama Pihak Berkuasa Tempatan (PBT) dan persatuan-persatuan usahawan. Selain daripada itu, wakil-wakil agensi di bawah KUSKOP sentiasa turun padang bagi meninjau sendiri keadaan di lapangan.

**SME CORPORATION MALAYSIA**

Melalui SME Corp. Malaysia, antara program yang dilaksanakan adalah **Program Pembiayaan Pengukuhan PKS (*SME Revitalisation Financing - SMERF*)**. Program ini menyediakan pembiayaan pinjaman mudah kepada PMKS terutamanya dalam sektor-sektor yang terjejas dengan COVID-19 dengan kadar faedah 3% dan tanpa yuran pemprosesan. Sejak dilaksanakan pada tahun 2021 sehingga 31 Januari 2022, sejumlah 111 permohonan telah diluluskan dengan nilai keseluruhan pinjaman berjumlah RM20.4 juta.

Seterusnya, pelaksanaan **Program Dana Kecemasan PKS (*SME Emergency Fund – SMEEF*)**. Dana ini telah diwujudkan pada tahun 2012 dengan peruntukan berjumlah RM10 juta sebagai satu langkah proaktif oleh Kerajaan agar usahawan PMKS yang terjejas akibat bencana alam seperti banjir, ribut, kemarau, hakisan pantai dan tanah runtuh dapat beroperasi semula. Dana ini adalah satu-satunya dana khas yang sedia ada bagi membantu PKS dengan segera sekiranya berlaku bencana alam. Sehingga kini, sejumlah 995 PMKS dengan kelulusan berjumlah RM16.6 juta telah diberikan (878 PKS telah diluluskan bantuan geran, RM7.3 juta dan 117 PKS diluluskan pinjaman, RM9.4 juta).

Program Pembiayaan **Digital PMKS (*Digital Financing Initiative - DFI*)** pula merupakan skim pinjaman mudah yang dilaksanakan dengan Rakan Pembiaya yang dilantik, yang mana ia menyediakan akses pembiayaan kepada PMKS sebagai penyelesaian jangka pendek melalui platform digital. Kadar faedah adalah sebanyak 2% dengan nilai pembiayaan minimum RM50,000 sehingga maksimum RM500,000. Bagi tahun 2021 sehingga Januari 2022, sejumlah 20 PMKS telah diluluskan pinjaman berjumlah RM4.7 juta.

**PERNAS**

Pernas telah melaksanakan program **RECURVE – Skim Pembiayaan Rangsangan Pasca COVID-19**. Program ini bertujuan untuk membantu usahawan francais yang terjejas akibat penularan wabak COVID-19 bagi membantu menampung kos operasi bulanan seperti gaji pekerja, sewa premis perniagaan dan utiliti usahawan selama 6 bulan. Program ini juga telah dikembangkan untuk membantu usahawan francais

## SOALAN NO : 45

yang terkesan akibat musibah banjir dengan mengekalkan terma dan syarat sedia ada. Pembiayaan dari RM10 ribu sehingga RM500 ribu pada kadar keuntungan 3.5% dan 4.0% dengan tempoh pembiayaan sehingga 5 tahun disediakan.

Seterusnya, Pernas telah melaksanakan kemudahan penstrukturan dan penjadualan bayaran kepada usahawan francais yang terjejas akibat musibah banjir bagi meningkatkan aliran tunai syarikat dan mencegah perniagaan daripada gulung tikar.

### TEKUN NASIONAL

TEKUN Nasional pula telah melancarkan program pembiayaan **Skim Pembiayaan Informal dan Mikro (SPIM)**. Usahawan akan menerima pembiayaan tanpa kadar keuntungan dan tempoh moratorium selama 12 bulan. Bagi tahun 2022, TEKUN telah diperuntukkan sebanyak RM200 juta untuk program SPIM. Sehingga 15 Februari 2022, TEKUN telah membantu seramai 816 usahawan dengan pembiayaan berjumlah RM7.4 juta. Melalui Bantuan Banjir Keluarga Malaysia, sejumlah RM50 juta lagi diperuntukkan untuk SPIM dengan pembiayaan maksimum sehingga RM10,000.

Selain itu, TEKUN juga telah diberikan tanggungjawab untuk menyalurkan sejumlah RM50 juta kepada usahawan yang premis perniagaan mereka terjejas akibat banjir dengan geran *one-off* sebanyak RM3,000 setiap usahawan. Bantuan ini akan memberi manfaat kepada lebih 16,000 usahawan informal dan mikro.

### BANK RAKYAT

Bank Rakyat menyediakan inisiatif bagi usahawan mikro yang terjejas akibat pandemik melalui pembiayaan **BRFlex-i** khusus kepada usahawan mikro, PKS, koperasi dan usahawan wanita yang merangkumi semua sektor perniagaan dengan nilai pembiayaan dari RM1,000 sehingga RM1 juta dan tempoh tangguhan ansuran (*grace period*) selama 9 bulan.

Selain itu, terdapat pembiayaan **Targeted Relief and Recovery Facility (TRRF)**, sebuah pakej pembiayaan di bawah dana Bank Negara

## SOALAN NO : 45

Malaysia (BNM) yang ditawarkan kepada usahawan PKS dan mikro dengan kelebihan 6 bulan moratorium.

Manakala, bagi usahawan mikro yang terjejas akibat bencana banjir, pembiayaan turut disediakan melalui **Disaster Relief Fund (DRF)** bagi meringankan beban kewangan PMKS dan membolehkan mereka meneruskan perniagaan.

### **Suruhanjaya Koperasi Malaysia (SKM)**

Kementerian melalui SKM telah melaksanakan **Program Pemerkasaan Rantaian Bekalan Koperasi** di mana koperasi akan berperanan sebagai **pusat pengedaran (DC/Sub-DC) atau pemborong** yang akan membuat pembelian secara pukal dan kemudiannya akan mengedarkan barangan tersebut kepada kedai runcit yang menjadi rangkaian mereka.

Melalui program ini, SKM menawarkan geran bantuan sehingga RM300,000 kepada koperasi yang layak bagi menaiktaraf dan melengkapkan pusat pengedaran koperasi dengan peralatan yang bersesuaian bagi tujuan penyimpanan dan pengedaran. Sehingga 31 Disember 2021, sebanyak 12 koperasi telah diluluskan bantuan di bawah program ini dengan jumlah sebanyak RM2 juta.

Di samping itu, KUSKOP bersama SKM dan ANGKASA serta rangkaian premis borong dan runcit koperasi juga telah melaksanakan kerjasama strategik bagi **membangunkan premis niaga CoopMart** melalui penjenamaan kedai koperasi sedia ada. Sebanyak 60 Coop Mart di bawah SKM telah disasarkan untuk dibangunkan pada tahun 2022 yang seterusnya akan menjadi platform penyediaan barangan keperluan harian rakyat dengan harga yang berpatutan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : TUAN NOOR AMIN BIN AHMAD [KANGAR]**

**TARIKH : 17 MAC 2022 (KHAMIS)**

**SOALAN**

**TUAN NOOR AMIN BIN AHMAD [KANGAR]** minta **MENTERI SUMBER MANUSIA** menyatakan nisbah jumlah rakyat Malaysia dalam negara yang hilang pekerjaan berbanding jumlah pekerjaan dalam tempoh dari suku tahun ke suku tahun sejak tahun 2013.

**JAWAPAN**

**Tuan Yang di-Pertua,**

Berdasarkan laporan yang dikeluarkan oleh Sistem Insurans Pekerjaan, Pertubuhan Keselamatan Sosial, jumlah pekerja yang telah kehilangan pekerjaan pada tahun 2019 adalah seramai 40,084 orang. Manakala pada tahun 2020, jumlah pekerja yang kehilangan pekerjaan meningkat kepada 107,024 orang.

Tahun 2021 mencatatkan penurunan jumlah kehilangan pekerjaan kepada 61,360 orang. Bagi tahun 2022 seramai 5,761 orang pekerja dilaporkan telah hilang pekerjaan sehingga tempoh 11 Februari 2022.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK WIRA DR. MOHD HATTA BIN  
MD. RAMLI [ LUMUT ]**

**TARIKH : 17 MAC 2022 (KHAMIS)**

**SOALAN**

**DATUK WIRA DR. MOHD HATTA BIN MD. RAMLI** minta **MENTERI KESIHATAN** menyatakan sama ada perlu untuk menyuntik dos booster Vaksin COVID untuk mereka yang mempunyai paras antibodi yang tinggi terhadap *spike protein* COVID-19 di dalam darah mereka.

**JAWAPAN**

Tuan Yang di-Pertua,

1. Ujian antibodi terhadap COVID-19 tidak dijalankan secara rutin di fasiliti kesihatan KKM. Oleh itu, paras antibodi terhadap COVID-19 tidak boleh dijadikan sebagai satu penunjuk utama untuk pemberian dos penggalak vaksin COVID-19.

2. Walaupun paras antibodi COVID-19 tinggi di dalam badan, pemberian dos penggalak masih diperlukan bagi memastikan tahap imuniti sentiasa mencukupi dan bertahan lama.

3. Selain itu, paras antibodi COVID-19 yang tinggi akan mula menurun selepas tiga hingga enam bulan penerimaan vaksin COVID-19. Ini berdasarkan banyak kajian penyelidikan yang diterbitkan secara saintifik berkaitan imuniti selepas penerimaan vaksin COVID-19. Oleh itu, dos penggalak perlu diberikan bagi meningkatkan paras antibodi yang mencukupi terhadap virus COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN JUGAH ANAK MUYANG @ TAMBAT  
[ LUBOK ANTU ]**

**TARIKH : 17 MAC 2022 (KHAMIS)**

**SOALAN**

**TUAN JUGAH ANAK MUYANG @ TAMBAT [ LUBOK ANTU ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah langkah yang boleh dilaksanakan oleh pihak Kementerian di dalam memastikan peniaga tidak mengambil kesempatan menaikkan harga barang tertentu terutama sekali dalam kalangan pengusaha kedai runcit di kawasan kampung.

**JAWAPAN:**

**Yang di-Pertua,**

Kementerian sentiasa membuat pemeriksaan dan pemantauan di semua peringkat perniagaan termasuk di kawasan luar bandar. Untuk makluman, pada tahun 2020 sebanyak 692,206 premis telah diperiksa, 20% daripada jumlah pemeriksaan iaitu sebanyak 136,922 merupakan premis luar bandar. Manakala bagi tahun 2021 sebanyak 865,086 premis telah diperiksa, 17% daripada jumlah pemeriksaan iaitu sebanyak 148,430 merupakan premis luar bandar telah dilawati dan diperiksa oleh Bahagian Penguatkuasa Kementerian bagi memastikan pematuhan terhadap undang-undang kepenggunaan. Walaubagaimanapun, sekiranya terdapat sebarang aduan diterima berkaitan kenaikan harga jualan apa-apa barangan yang terlalu melampau, notis bertulis akan dikeluarkan kepada peniaga untuk melihat sekiranya wujud kesalahan pencatutan iaitu mengambil keuntungan tinggi yang tidak munasabah oleh peniaga.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN YUSUF BIN ABD. WAHAB  
[ TANJONG MANIS ]**

**TARIKH : 17 MAC 2022 (KHAMIS)**

**SOALAN**

**TUAN YUSUF BIN ABD. WAHAB [ TANJONG MANIS ]** minta **MENTERI KESIHATAN** menyatakan adakah Kementerian akan menjalankan pemeriksaan dan penilaian tentang inventori lengkap tentang peralatan, perubatan dan kemudahan di semua klinik-klinik Kerajaan di kawasan Parlimen Tanjong Manis, sebagai langkah persediaan untuk menghadapi penularan penyakit berjangkit.

**JAWAPAN**

Tuan Yang di-Pertua,

1. Kementerian Kesihatan Malaysia menetapkan satu garis panduan standard norma bagi jumlah peralatan perubatan untuk dibekalkan di fasiliti klinik kesihatan mengikut beban kedatangan bagi memastikan perkhidmatan penjagaan kesihatan tidak terjejas. Garis panduan ini membantu Pejabat Kesihatan Bahagian dan Jabatan Kesihatan Negeri untuk menyemak keperluan peralatan perubatan berdasarkan kepada situasi semasa.
2. Aktiviti pemeriksaan dan penyelenggaraan peralatan perubatan sedia ada termasuk klinik-klinik kesihatan di kawasan Parlimen Tanjong Manis, adalah dilakukan secara berkala di bawah projek Medical

Equipment Enhancement Tenure (MEET). Kekerapan pemeriksaan ini adalah bergantung kepada jenis kategori peralatan tersebut.

3. Di samping penyelenggaraan aset, syarikat konsesi turut membaiki kerosakan alat sekiranya terdapat aduan. Didapati, projek ini banyak membantu dalam memastikan perkhidmatan kesihatan tetap berjalan lancar.

4. Untuk makluman Ahli Yang Berhormat, semua fasiliti kesihatan di bawah Kementerian Kesihatan Malaysia perlu mematuhi tatacara pengurusan aset sebagaimana yang telah ditetapkan dalam Pekeliling Perbendaharaan Malaysia Tatacara Pengurusan Aset Alih Kerajaan (kuatkuasa Tahun 2016) yang mana pemeriksaan aset alih boleh dilaksanakan sepanjang tahun pada tahun semasa secara berperingkat.

5. Di Kawasan Parlimen Tanjong Manis, terdapat empat (4) Klinik Kesihatan dan satu (1) Pejabat Kesihatan Daerah yang menyediakan perkhidmatan kesihatan, iaitu seperti berikut:

- a. Klinik Kesihatan Belawai (Jenis 7);
- b. Klinik Kesihatan Tanjong Manis (Jenis 7);
- c. Klinik Kesihatan Kuala Rejang (Jenis 7);
- d. Klinik Kesihatan Paloh (Jenis 7); dan
- e. Pejabat Kesihatan Daerah Tanjong Manis.

6. Aktiviti pemantauan aset terutamanya aset-aset perubatan di fasiliti-fasiliti yang dinyatakan di atas sentiasa dilaksanakan untuk memastikan kemudahan fasiliti kesihatan sentiasa dalam keadaan siapsiaga bagi menghadapi penularan penyakit berjangkit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SU KEONG SIONG [ KAMPAR ]**

**TARIKH : 17 MAC 2022 (KHAMIS)**

**SOALAN**

**TUAN SU KEONG SIONG [ KAMPAR ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan punca utama kenaikan harga barangan keperluan asas yang mendadak. Nyatakan tindakan dan langkah-langkah yang diambil untuk membendung dan mengatasi masalah kenaikan harga yang kini amat membebankan rakyat.

**JAWAPAN:**

**Yang di-Pertua,**

Punca kenaikan harga barang keperluan asas dikatakan naik mendadak adalah disebabkan oleh beberapa faktor luaran dan dalaman. Tidak semua barang keperluan asas naik harga. Kenaikan dan penurunan harga adalah mengikut permintaan dan penawaran. Penurunan harga ada berlaku tetapi tidak dirasakan oleh rakyat berbanding kenaikan harga. Bagi ternakan, kenaikan harga berpunca dari kenaikan harga komoditi jagung dan soya dunia. Manakala harga sayur dan buah-buahan berpunca dari kenaikan harga racun dan baja di seluruh dunia.

Bagi faktor dalaman, kekurangan pekerja asing adalah mendesak ekoran pandemik covid di seluruh dunia. Kenaikan harga minyak dunia menjadikan kos pengangkutan antara negara semakin tinggi tambahan masalah kekurangan kontena yang berlaku di seluruh dunia. Caj pelabuhan yang tinggi juga menjadi faktor yang menyumbang kenaikan harga barang yang diimport.

Antara langkah-langkah yang diambil oleh Kementerian bagi mengawal kenaikan harga barang adalah seperti berikut:-

- i. Mengadakan Skim Harga Maksimum Musim Perayaan (SHMMP) Tahun Baru Cina 2022 bermula 29 Januari 2022 hingga 4 Februari 2022 dan Skim Harga Maksimum Keluarga Malaysia (SHMKM) pada 1 Januari 2022 hingga 4 Februari 2022 bagi menetapkan harga maksimum untuk barangan tertentu;
- ii. Melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item tersebut;
- iii. Melaksanakan Program Jualan Keluarga Malaysia (PJKM) iaitu inisiatif kepada rakyat bagi mendapatkan barang keperluan dengan harga yang murah dengan kerjasama dari pasaraya dan peniaga setempat; dan
- iv. Bekerjasama dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari semasa ke semasa tanpa gagal.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK SERI PANGLIMA HAJAH AZIZAH  
BINTI DATUK SERI PANGLIMA HAJI  
MOHD DUN (BEAUFORT)**

**TARIKH JAWAB : 17 MAC 2022 (KHAMIS)**

**SOALAN**

**DATUK SERI PANGLIMA HAJAH AZIZAH BINTI DATUK SERI  
PANGLIMA HAJI MOHD DUN (BEAUFORT) minta MENTERI  
PERUMAHAN DAN KERAJAAN TEMPATAN menyatakan apakah  
usaha Kementerian dalam mengatasi lambakan hartanah tidak terjual  
terutamanya kondominium-kondominium mewah di bandar raya.**



**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) memandang serius isu rumah kediaman yang tidak terjual. Isu ini ada dibincangkan dalam Mesyuarat Majlis Perumahan Mampu Milik Negara (MPMMN) yang dipengerusikan oleh YAB Perdana Menteri pada 10 Februari 2022. Antara punca kepada lambakan rumah tidak terjual ini adalah ekoran daripada penawaran perumahan yang tidak sepadan dengan permintaan di sesebuah lokaliti, harga rumah yang tidak sepadan dengan pendapatan isi rumah, lokasi yang kurang menarik dan lain-lain lagi.

Untuk makluman Ahli Yang Berhormat juga, berdasarkan laporan Status Pasaran Harta Tanah oleh Pusat Maklumat Harta Tanah Negara (NAPIC), bagi suku kedua tahun 2021 (Q2, 2021), terdapat 31,112 unit rumah siap dibina tidak terjual yang bernilai RM20.1 bilion. Bagi suku ketiga tahun 2021 (Q3, 2021), terdapat 30,358 unit rumah siap dibina tidak terjual yang bernilai RM19.8 bilion. Ini menunjukkan terdapat penurunan sebanyak 2.4% dalam bilangan unit dan 1.5% dalam nilai bagi suku tahun ketiga berbanding suku kedua tahun 2021.

KPKT juga sedang menyediakan pemetaan Rumah Mampu Milik (RMM) berdasarkan pendapatan median mengikut negeri dan daerah yang diperolehi daripada tinjauan *Household Income/Expenditure Survey* (HIS). Kaedah ini mengambil kira median pendapatan rakyat mengikut lokaliti berdasarkan kaedah gandaan median (*median multiple*). Pemetaan ini adalah bagi membantu pemaju mengenal pasti harga yang sesuai bagi harga jualan rumah di sesebuah lokaliti.

Pada masa ini, Kerajaan tidak bercadang untuk mengenakan tindakan ke atas pemaju yang gagal menjual rumah dalam tempoh masa tertentu. Walau bagaimanapun, antara langkah utama yang telah diambil oleh Kementerian bagi mengurangkan ketidaksepadanan penawaran dan permintaan (*supply and demand*) dalam industri perumahan adalah:

- i. semasa pembentangan Belanjawan 2020, Kerajaan telah mengumumkan pengecualian duti setem bagi pembelian rumah pertama yang berharga RM500,000 dan ke bawah mulai 1 Januari 2020 hingga 31 Disember 2025; dan
- ii. pembangunan sistem Analisis Data Raya (*Big Data Analytics*; BDA) Perumahan bagi mendapatkan gambaran sebenar kedudukan dan ketersediaan data berkaitan sektor perumahan di Malaysia sebelum pembangunan sistem yang berkaitan. Kajian ini telah dimulakan pada bulan Februari 2021. Hasil kajian ini akan menentukan hala tuju pembangunan sistem BDA dengan objektif seperti berikut:
  - a) membantu untuk mengetahui kedudukan pasaran perumahan hartanah yang lebih jelas dan tepat demi pembangunan sektor hartanah yang lestari dan efisien;
  - b) dijadikan input bagi pembangunan platform pusat pengumpulan data hartanah yang meliputi permintaan dan penawaran; dan
  - c) membantu pihak Kerajaan dalam membuat keputusan di peringkat Persekutuan dan Kerajaan Negeri dalam penyediaan dasar dan perancangan perumahan negara yang lebih komprehensif.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN AHMAD TARMIZI BIN  
SULAIMAN [ SIK ]**

**TARIKH : 17 MAC 2022 (KHAMIS)**

**SOALAN**

**TUAN AHMAD TARMIZI BIN SULAIMAN** minta **MENTERI KESIHATAN** menyatakan langkah Kementerian meningkatkan infrastruktur dan peralatan hospital luar bandar khusus di daerah Sik yang masih ketinggalan dari segi peralatan perubatan yang terkini dan moden khusus bagi pengurusan pesakit kanser, jantung dan lain-lain.

**JAWAPAN**

Tuan Yang di-Pertua,

1. Bagi meningkatkan akses kepada perkhidmatan kepakaran, konsep hospital kluster telah diperkenalkan pada tahun 2014. Hospital Sik merupakan sebahagian daripada Hospital Kluster Kedah Tengah yang mula dilaksanakan pada tahun 2018. Melalui pelaksanaan inisiatif ini Hospital Sik menerima perkhidmatan kepakaran daripada Hospital Sultan Abdul Halim, Sungai Petani (*lead hospital*) meliputi 23 bidang kepakaran termasuk Perubatan Am, Respiratori, Kecemasan, Oftalmologi, Otorinolaringologi, Obstetrik dan Ginekologi, Pediatrik, dan Pembedahan am.

2. Buat masa ini, Pakar Perubatan Am daripada Hospital Sultan Abdul Halim, Sungai Petani ditempatkan secara bergilir di Hospital Sik bagi

memberikan khidmat kepakaran dan rujukan perubatan am termasuk kes-kes jantung dan kanser. Sekiranya rawatan lanjut dan intervensi jantung diperlukan, pesakit akan dirujuk ke Hospital Sultanah Bahiyah, Alor Setar untuk dirawat oleh pakar jantung. Seterusnya jika pesakit memerlukan pembedahan jantung, pesakit akan dirujuk ke Hospital Pulau Pinang.

3. Bagi pesakit kanser pula akan dirujuk ke Hospital Sultan Abdul Halim, Sungai Petani atau Hospital Pulau Pinang (pusat rawatan kanser bagi zon utara) sekiranya memerlukan rawatan lanjut dan lebih khusus.

4. Kesemua pusat jantung dan kanser KKM yang menyediakan perkhidmatan tertiar dilengkap dengan peralatan perubatan moden dan terkini. Penyediaan perkhidmatan yang komprehensif dan lengkap seperti ini bukan sahaja memerlukan peralatan yang berteknologi tinggi dan mahal, malah ia turut memerlukan tenaga kepakaran dan kumpulan sokongan yang berkemahiran tinggi.

5. Oleh itu, buat masa ini perkhidmatan-perkhidmatan bagi rawatan jantung dan kanser yang komprehensif hanya disediakan secara berpusat mengikut wilayah (*regional*).

6. Pada masa yang sama, KKM juga menyumberluar perkhidmatan rawatan kanser dan jantung ke hospital swasta dan hospital pengajar.

7. Keperluan peralatan asas bagi Hospital Sik sentiasa dipantau agar kualiti perkhidmatan kesihatan tidak terjejas. Pada tahun 2020 sehingga kini, sebanyak RM 210,150 telah disalurkan kepada pihak hospital untuk perolehan peralatan perubatan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. HAJI DZULKEFLY  
BIN AHMAD [ KUALA SELANGOR ]**

**TARIKH : 17 MAC 2022 (KHAMIS)**

**SOALAN**

**DATUK SERI DR. HAJI DZULKEFLY BIN AHMAD** minta **MENTERI KESIHATAN** menyatakan berapa jumlah warga Sabah yang tiada dokumen yang masih belum menerima vaksinasi.

**JAWAPAN**

Tuan Yang di-Pertua,

1. Berkenaan jumlah individu tanpa dokumen di Sabah yang masih belum menerima vaksinasi COVID-19 pula, Kementerian Kesihatan menghadapi kekangan untuk mengetahui jumlah sebenar individu yang tidak mempunyai dokumen pengenalan diri atau yang tidak mempunyai kewarganegaraan (stateless people).
2. Namun begitu, menerusi Program Imunisasi COVID-19 Kebangsaan (PICK), Kementerian Kesihatan telah menetapkan dasar untuk memberikan vaksinasi COVID-19 kepada semua golongan yang layak secara percuma termasuk kepada individu yang tidak mempunyai dokumen pengenalan diri atau yang tidak mempunyai kewarganegaraan (stateless people).
3. Untuk makluman, sehingga 16 Mac 2022, kadar vaksinasi bagi

PICK bagi negeri Sabah adalah seperti berikut:

- a. Seramai 2,088,447 individu dewasa berumur 18 tahun dan ke atas telah menerima vaksin dos lengkap iaitu 76.9% dari keseluruhan populasi dewasa yang layak;
- b. Seramai 316,118 remaja telah menerima vaksin dos lengkap iaitu 74.2% dari populasi remaja di Sabah;
- c. Seramai 84,163 kanak-kanak berumur 5 hingga di bawah 12 tahun telah menerima vaksin dos pertama mereka iaitu 20.5% dari populasi kanak-kanak; dan
- d. Secara keseluruhan, seramai 2,404,595 individu yang layak telah menerima vaksin dos lengkap iaitu 62.7% dari keseluruhan populasi yang layak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : TUAN AKMAL NASRULLAH BIN MOHD. NASIR  
[JOHOR BAHRU]**

**TARIKH : 17 MAC 2022 (KHAMIS)**

**SOALAN**

**TUAN AKMAL NASRULLAH BIN MOHD. NASIR [ JOHOR BAHRU ]**  
minta **MENTERI SUMBER MANUSIA** menyatakan :-

- a) trend kadar pengangguran negara terkini; dan
- b) statistik jumlah pekerjaan baharu yang diwujudkan dari bulan ke bulan.

**JAWAPAN**

**Tuan Yang Di Pertua,**

(a) Berdasarkan Survei Tenaga Buruh oleh Jabatan Perangkaan Malaysia, menunjukkan kadar pengangguran keseluruhan rakyat Malaysia pada suku keempat 2021 berkurangan sebanyak 0.5 peratus kepada 4.3 peratus berbanding 4.8 peratus yang dicatatkan pada tempoh sama pada tahun 2020.

Sejajar dengan ini, bilangan pengangguran menurun daripada 760,700 orang pada suku keempat 2020 kepada 696,400 orang pada suku keempat 2021.

Keadaan ini berlaku kesan daripada keputusan Kerajaan dalam memperkenalkan inisiatif melalui pakej-pakej Rangsangan Ekonomi seperti PRIHATIN DAN PENJANA, Pakej bantuan tambahan iaitu, PERMAI, PEMERKASA dan PEMERKASA TAMBAHAN serta PEMULIH.

**Tuan Yang Di Pertua,**

(b) Berdasarkan Statistik Guna Tenaga oleh Jabatan Perangkaan Malaysia, jumlah pewujudan jawatan baharu bagi suku tahun pertama 2021 adalah 17,380 jawatan, suku tahun kedua 2021 sebanyak 16,180 jawatan, suku tahun ketiga 2021 sebanyak 15,040 jawatan dan suku tahun keempat 2021 sebanyak 20,890 jawatan. Jumlah keseluruhan pewujudan jawatan baharu pada tahun 2021 adalah 69,490 jawatan.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. KELVIN YII LEE WUEN  
(BANDAR KUCHING)**

**TARIKH : 17 MAC 2021 (KHAMIS)**

**SOALAN**

**DR. KELVIN YII LEE WUEN [ BANDAR KUCHING ]** minta **MENTERI BELIA DAN SUKAN** menyatakan rancangan Kementerian untuk membangunkan sukan termasuk e-sport di Sarawak terutamanya di kalangan anak muda.

**JAWAPAN**

**Tan Sri Yang di-Pertua,**

Untuk makluman Ahli Yang Berhormat, Kementerian Belia dan Sukan (KBS), bagi merencanakan program/ aktiviti pembangunan sukan massa di seluruh negara, Kementerian Belia dan Sukan melalui Jabatan Belia dan Sukan Negara telah merancang pelbagai program yang akan dilaksanakan di peringkat daerah, negeri dan seterusnya peringkat kebangsaan. Pada tahun 2022 sebanyak 66 program melibatkan 2,092 aktiviti telah dirancang oleh Kementerian ini di seluruh negara di bawah kluster sukan mengikut lima inisiatif yang telah dikenal pasti. Selain itu, Kementerian pada tahun ini telah merancang sebanyak 23 program pembangunan sukan massa di Negeri Sarawak.

Kementerian ini melalui Majlis Sukan Negara (MSN) turut memberi tumpuan khusus dalam aspek pembangunan atlet di kalangan anak

muda melalui pelaksanaan pembangunan sukan berprestasi tinggi negara. Pembangunan terarah kepada 16 sukan teras sebagai persediaan kontinjen negara menghadapi temasya-temasya sukan utama seperti Sukan SEA/Para ASEAN, Sukan Asia/Para Asia, Sukan Komanwel dan Sukan Olimpik/Paralimpik.

Selaras dengan tumpuan tersebut, MSN telah menjalinkan kerjasama yang erat bersama Majlis Sukan Negeri untuk melaksanakan program latihan secara bersistematik kepada atlet-atlet peringkat negeri di seluruh negara yang berumur di bawah 21 tahun menerusi Program Pelapis Negeri. Manakala, Program Bakat pula dilaksanakan di peringkat daerah di mana merupakan proses pendedahan latihan awal ke atas bakat-bakat muda berumur di antara 13 hingga 15 tahun. Kedua-dua program ini adalah program pembangunan jangka panjang yang berterusan dan dikawal selia oleh Majlis Sukan Negeri bersama Persatuan Sukan Negeri dengan pemantauan MSN. Atlet-atlet yang terpilih menjalani latihan di bawah Program Pelapis Negeri dan Bakat ini merupakan bakat-bakat baharu yang berkualiti untuk digilap ke peringkat tertinggi.

Bagi tahun 2021, seramai 6,738 orang atlet, 413 orang jurulatih daripada 313 buah Pusat Latihan Negeri (PLN) menjalani latihan secara separa masa di bawah Program Pelapis Negeri manakala 2,293 orang atlet, 175 orang jurulatih di 162 buah Pusat Latihan Daerah (PLD) turut menjalani latihan di bawah Program Bakat di seluruh Malaysia.

Untuk makluman YB Bandar Kuching, Sarawak mempunyai seramai 362 orang atlet, 19 orang jurulatih daripada 22 buah Pusat Latihan Negeri (PLN) yang sedang menjalani latihan di bawah Program Pelapis Negeri menerusi 14 jenis sukan. Manakala seramai 109 orang atlet, 9 orang jurulatih di 9 buah Pusat Latihan Daerah (PLD) pula menjalani latihan di bawah Program Bakat (lapan (8) jenis sukan).

Selain itu, Kementerian juga melaksanakan Program Projek Khas iaitu Program Pembangunan Bolasepak Negara (NFDP), Program Pembangunan Hoki Negara (NHDP) dan Program Pembangunan Ragbi Negara (NRDP), Program Pembangunan Bola Jaring (PPBJ) di seluruh negara termasuklah Sarawak.

Bagi sukan Esport pula, KBS telah melaksanakan beberapa inisiatif dan program untuk membangunkan industri sukan elektronik (*esports*) di Sarawak. Sebuah studio *esports* telah dibangunkan dan sedang beroperasi di Kota Samarahan, Sarawak yang berfungsi sebagai pusat setempat bagi program dan latihan *esports*.

Selain itu, Esports Integrated (ESI) telah melaksanakan Malaysia Esports League 2021 (MEL21) pada tahun lalu yang merangkumi peringkat negeri dan kebangsaan. Di peringkat negeri Sarawak, seramai 4,679 orang telah menyertai pertandingan MEL21 dalam 4 judul permainan iaitu Mobile Legends: Bang Bang, PUBG Mobile, Dota 2 dan FIFA 21, dan johan-johan setiap kategori kemudiannya bersaing di peringkat kebangsaan. Pasukan Dota 2 dari negeri Sarawak, Team Thanks telah menjadi johan kebangsaan bagi kategori Dota 2 dan merangkul hadiah kejohanan berjumlah RM20,000 berserta pingat.

Bagi tahun 2022, KBS dan ESI berhasrat untuk membawa ESI Masterclass, sebuah program pembangunan kapasiti dalam *esports* ke setiap negeri, termasuklah Sarawak. Pengisian program tersebut dirangka bagi membantu komuniti *esports* tempatan khususnya belia dalam meningkatkan lagi kemahiran permainan, dan asas pengurusan *esports*.

Majlis Sukan Negara melalui Program Pelapis Negeri mempunyai pusat-pusat latihan di setiap negeri termasuk Sarawak bagi mencari bakat baharu menerusi program latihan sepenuh masa dan separuh masa. Persatuan Sukan Elektronik Negeri Sarawak juga menerima bantuan bagi menaiktaraf Esports Hub dan Studio di D-Virtual Park, Kota Samarahan.

Kementerian akan meneruskan kesinambungan pelaksanaan program-program pembangunan sedia ada di setiap peringkat bagi mengimbangi program latihan yang telah terjejas sepanjang tahun 2020 dan 2021 ini akibat penularan wabak pandemik Covid-19.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN TERESA KOK SUH SIM  
[ SEPUTEH ]**

**TARIKH : 17 MAC 2022 (KHAMIS)**

**SOALAN**

**PUAN TERESA KOK SUH SIM [ SEPUTEH ]** minta **MENTERI KESIHATAN** menyatakan apakah Kementerian akan menyokong dekriminalisasi terhadap pemilikan dadah dalam jumlah sedikit supaya penagih dapat dilayan sebagai pesakit dan bukan penjenayah. Jika ya, adakah Kementerian akan melakukan pindaan undang-undang berkenaan.

**JAWAPAN**

Tuan Yang di-Pertua,

Kementerian Kesihatan mengambil maklum bahawa terdapat keperluan supaya penagih dadah dilayan sebagai pesakit dan bukan penjenayah. Namun, buat masa ini belum ada sebarang ketetapan berhubung dekriminalisasi terhadap pemilikan dadah ini. Sekiranya terdapat satu ketetapan yang memutuskan bahawa dekriminalisasi ini perlu dilaksanakan, Kementerian Kesihatan akan mengambil tindakan yang sewajarnya seperti meminda Akta Dadah Berbahaya 1952.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WILLIAM LEONG JEE KEEN  
[ SELAYANG ]**

**TARIKH : 17 MAC 2022 (KHAMIS)**

**SOALAN**

**TUAN WILLIAM LEONG JEE KEEN [ SELAYANG ]** minta **MENTERI KESIHATAN** menyatakan hasil dapatan daripada "Randomised, Double-Blind, Placebo- Controlled Clinical Trial of Ivermectin" sebagai prophylaxis dan perbezaan kajian kedua ini dari Kajian Berkesanan Rawatan Ivermectin untuk Pesakit COVID-19 Berisiko Tinggi (I-TECH Study).

**JAWAPAN**

Tuan Yang di-Pertua,

1. Kajian *Randomised, Double Blind, Placebo Controlled Clinical Trial of Ivermectin For Post Exposure Prophylaxis For COVID-19 Infection Among Close Contacts (I-CPEP)* bertujuan untuk menilai keberkesanan Ivermectin sebagai profilaksis di kalangan orang dewasa tidak mempunyai gejala berumur 18 tahun ke atas dan merupakan kontak rapat (*close contact*) kepada pesakit COVID-19 yang telah disahkan.
2. Kajian *I-CPEP* telah mendapat kelulusan daripada NPRA dan Jawatankuasa Etika & Penyelidikan Perubatan (*MREC*), KKM. Kajian ini telah mula dijalankan dan kini dalam proses untuk merekrut peserta kajian.

3. Perbezaan utama antara “*Ivermectin Treatment Efficacy in Covid-19 High Risk Patients*” ( *I-TECH*) dengan *I-CPEP* ialah seperti berikut :

Perkara	I-CPEP	I-TECH
Objektif Kajian	Menilai keberkesanan Ivermectin sebagai profilaksis di kalangan orang dewasa tidak mempunyai gejala berumur 18 tahun ke atas dan merupakan kontak rapat (close contact) kepada pesakit COVID-19 yang telah disahkan.	Menilai keberkesanan Ivermectin di kalangan pesakit COVID-19 yang berisiko tinggi dalam mencegah kemerosotan penyakit COVID- 19 yang lebih yang teruk.
Subjek	Kontak rapat kepada kes positif COVID-19 yang berumur 18 tahun ke atas	Pesakit COVID-19 kategori 2 dan 3 yang berusia 50 tahun ke atas dan berisiko tinggi.
Jumlah subjek	300 orang kontak rapat ( <i>close contact</i> )	500 orang pesakit COVID- 19 kategori 2 dan kategori 3.
Status kajian	Pasukan penyelidik sedang dalam proses merekrut subjek.	Kajian telah tamat dan diterbitkan di dalam <i>The Journal of the American Medical Association (JAMA)</i> .

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG CHEN [ SUBANG ]**

**TARIKH : 17 MAC 2022 (KHAMIS)**

**SOALAN**

**TUAN WONG CHEN** minta **MENTERI KESIHATAN** menyatakan :-

- (a) jumlah pelarian UNHCR yang telah menerima rawatan pesakit dalam bagi tempoh lima tahun yang lalu (2017-2021); dan
- (b) berapa bayaran yang telah dibayar dan berapa bayaran yang tidak dibayar.

**JAWAPAN**

Tuan Yang di-Pertua,

1. Seramai 30,261 pelarian yang berdaftar secara sah dengan Pesuruhjaya Tinggi Pertubuhan Bangsa-Bangsa Bersatu Bagi Hal Ehwat Pelarian (UNHCR) telah menerima rawatan (pesakit dalam) di fasiliti kesihatan Kementerian Kesihatan Malaysia bagi tempoh lima (5) tahun iaitu dari 2017 sehingga 2021.
2. Dalam tempoh ini KKM telah menerima bayaran sebanyak RM49,497,202.84 dari pelarian UNHCR. Manakala tunggakan fi perubatan mereka dalam tempoh tersebut adalah sebanyak RM 6,260,185.44.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WILLIAM LEONG JEE KEEN  
[ SELAYANG ]**

**TARIKH : 17 MAC 2022 (KHAMIS)**

**SOALAN**

**TUAN WILLIAM LEONG JEE KEEN** minta **MENTERI KESIHATAN** menyatakan bilangan kes kematian dan kecacatan akibat vaksinasi COVID-19 dan langkah-langkah yang diambil untuk memberikan pampasan tanpa kesalahan (*No-Fault Compensation*) kepada mangsa-mangsa kes ini.

**JAWAPAN**

Tuan Yang di-Pertua,

1. Program Imunisasi COVID-19 Kebangsaan (PICK) telah dimulakan secara rasminya pada 24 Februari 2021. Sejak bermulanya PICK sehingga 11 Mac 2022, sejumlah 67,978,370 dos vaksin COVID-19 telah diberikan terdiri daripada jenama Comirnaty (Pfizer), CoronaVac (Sinovac), AstraZeneca (AZ), Convidecia (CanSino) dan COVILO (Sinopharm).

2. Secara keseluruhannya, Sistem Pelaporan AEFI NPRA telah menerima sejumlah 25,746 laporan AEFI vaksin COVID-19 yang perlu dinilai, termasuk 1,411 laporan melibatkan penerima dos penggalak dan 182 laporan bagi penerima vaksin kanak-kanak berusia 5 hingga 11 tahun. Kadar pelaporan AEFI melalui Sistem AEFI NPRA ini secara



keseluruhannya direkodkan pada 379 laporan bagi setiap sejuta dos.

3. Hasil penilaian ke atas laporan yang diterima, 93% atau 23,957 daripada AEFI yang dilaporkan adalah bagi kes-kes yang tidak serius. Demam, sakit pada tempat suntikan, sakit kepala, sakit otot dan keletihan merupakan antara kesan advers yang paling kerap dilaporkan oleh penerima vaksin. Kesan-kesan ini biasanya akan pulih dalam masa satu hingga dua hari.

4. Daripada jumlah keseluruhan laporan AEFI yang diterima, terdapat 1,789 laporan (bersamaan kadar 26 laporan bagi setiap sejuta dos) yang dikategorikan sebagai AEFI serius berdasarkan klasifikasi Pertubuhan Kesihatan Sedunia (WHO) iaitu merujuk kepada kesan yang menyebabkan kemasukan ke dalam wad atau pemanjangan tempoh di wad, membahayakan nyawa, menyebabkan kehilangan upaya yang signifikan atau memerlukan intervensi untuk mencegah kerosakan kekal tubuh, menyebabkan kecacatan semasa lahir, atau disyaki menyebabkan kematian.

5. Semua laporan yang AEFI serius yang diterima ini memerlukan penyiasatan lengkap dan penilaian terperinci sebelum hubungkait kesan yang dilaporkan dan vaksin yang diterima dapat ditentukan. Jumlah laporan AEFI serius yang diterima ini termasuk 607 laporan yang melibatkan kematian di kalangan penerima vaksin COVID-19. Daripada jumlah ini, 451 laporan telah selesai penyiasatan dan penilaian oleh Jawatankuasa Khas Farmakovigilans Vaksin COVID-19 (JFK), yang mana setakat ini tiada kes kematian yang dilaporkan mempunyai hubung kait secara langsung dengan vaksin yang diterima. Sebanyak 156 laporan masih dalam proses penyiasatan sebelum dinilai oleh JFK.

6. Manakala bagi Bantuan Khas Kewangan Kesan Mudarat Vaksin COVID-19 pula, bantuan ini dibuat atas dasar prihatin kerajaan dan tanpa apa pengakuan kepada apa-apa liabiliti oleh kerajaan. Borang permohonan dan kaedah memohon boleh dimuat turun daripada laman sesawang <https://covid-19.moh.gov.my/garis-panduan/garis-panduan-kewangan-kkm>.

7. Bantuan Khas Kewangan Kesan Mudarat Vaksin COVID-19 ini akan dipertimbangkan berdasarkan kriteria yang perlu dipenuhi iaitu:

- a. *Adverse Events Following Immunisation* (AEFI) berlaku dalam tempoh tiga (3) bulan daripada tarikh menerima vaksin;
- b. AEFI dikategorikan sebagai serius berdasarkan laporan penilaian oleh Jawatankuasa Farmakovigilans Khas Vaksin COVID-19 (JFK); dan
- c. Laporan AEFI hendaklah dihantar kepada Bahagian Regulatori Farmasi Negara (NPRA) oleh anggota kesihatan yang merawat pesakit.

8. Amaun Bantuan Khas Kewangan Kesan Mudarat Vaksin COVID-19 yang telah ditetapkan adalah tidak melebihi RM50,000 jika berlaku kesan advers yang serius kepada penerima vaksin COVID-19 yang memerlukan rawatan berpanjangan di hospital dan tidak melebihi RM500,000 jika berlaku hilang upaya kekal atau kematian disebabkan vaksin COVID-19. Amaun bantuan sebenar kepada individu yang terkesan oleh AEFI akan ditentukan berdasarkan perakuan oleh Jawatankuasa Teknikal Perubatan (JTP) dan diputuskan oleh Jawatankuasa Induk Bantuan Khas Kewangan Kesan Mudarat Vaksin COVID-19.

9. Hingga 15 Februari 2022, sebanyak seratus lapan puluh tujuh (187) permohonan bantuan khas kewangan kesan mudarat vaksin COVID-19 telah diterima oleh Kementerian Kesihatan. Daripada jumlah tersebut, sebanyak tujuh belas (17) permohonan telah diluluskan oleh Jawatankuasa Induk melibatkan jumlah sebanyak RM195,000. Sebanyak seratus empat puluh tujuh (147) permohonan masih dalam penilaian manakala dua puluh tiga (23) permohonan telah ditolak. Daripada seratus empat puluh tujuh (147) permohonan tersebut, lapan puluh enam (86) permohonan dalam penilaian JFK manakala enam puluh satu (61) permohonan dalam penilaian JTP.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB PUAN ALICE LAU KIONG YIENG (LANANG)**

**TARIKH : 17 MAC 2022 (KHAMIS)**

**SOALAN**

**PUAN ALICE LAU KIONG YIENG ( LANANG )** minta **MENTERI DALAM NEGERI** menyatakan jumlah kes penipuan macau scam, love scam, scam-scam lain yang berlaku melalui media sosial yang telah dilaporkan di Sibu pada tahun 2010-2022 dan jumlah kerugian nilai wang yang terlibat serta berapa kes yang telah dibawa ke mahkamah dan dijatuhkan hukuman terhadap sindiket-sindiket yang terlibat.

**JAWAPAN**

**Tuan Yang Di Pertua,**

Jumlah kes yang dilaporkan di Sibu bagi tahun 2010 hingga 13 Februari 2022 adalah sebanyak 945 kes melibatkan kerugian bernilai RM49,252,687.29. Berdasarkan statistik, sepanjang tahun 2010 sehingga kini, kes Belian Online mencatatkan kes tertinggi berbanding kes-kes yang lain iaitu sebanyak 316 kes dan diikuti oleh kes Pinjaman Tak Wujud sebanyak 242 kes.

Pelbagai usaha telah dijalankan oleh PDRM dalam mengekang sindiket penipuan seperti ini termasuklah dengan meningkatkan penguatkuasaan undang-undang, pengoperasian, tangkapan dan seterusnya menjalankan pendakwaan ke atas mereka yang terlibat dalam penipuan. Seramai 365 tangkapan telah dibuat sejak dari tahun 2010 hingga 13 Februari 2022 dan sebanyak 308 pertuduhan telah pun dilaksanakan di mahkamah.

PDRM juga giat menjalankan ceramah, taklimat dan sesi dialog kepada kakitangan kerajaan, syarikat swasta dan NGO-NGO. Sesi ini dijalankan secara atas talian melalui medium Facebook, televisyen dan radio memandangkan Negara sedang menghadapi Pandemik Covid-19. Jabatan Siasatan Jenayah Komersil juga telah mewujudkan CCID *Scam Respond Center* di talian 0326101559 atau 0326101599 di mana orang ramai boleh membuat panggilan untuk mendapatkan maklumat dan menyemak kesahihan panggilan bagi sebarang transaksi yang meragukan. Talian ini beroperasi dari jam 9.00 pagi hingga 10.00 malam pada setiap hari.

**Tuan Yang Di Pertua,**

Kempen Pencegahan Jenayah Komersil juga merupakan salah satu inisiatif bagi memastikan masyarakat didedahkan segala ilmu pengetahuan berkaitan jenayah komersil. Tujuan kempen ini diadakan adalah bagi meningkatkan kesedaran kepada orang ramai mengenai jenayah komersil terutamanya melibatkan penipuan jenayah dalam talian yang menunjukkan peningkatan kes pada tahap yang membimbangkan dan seterusnya

mengelakkan orang ramai daripada menjadi mangsa kepada jenayah tersebut. Tema yang dipilih bagi kempen ini adalah **Kesedaran Jenayah Komersil Kesejahteraan Komuniti** dan *tagline* “**Be Alert Stay Smart**”. Sasaran kempen ini adalah ditujukan kepada syarikat korporat, *netizen*, warga emas, kakitangan kerajaan dan syarikat swasta serta pelajar. Bagi memastikan matlamat kempen yang dijalankan tercapai, pelbagai program telah dilaksanakan seperti berikut:

1. Majlis Pelancaran Kempen Pencegahan Jenayah Komersil (Jenayah Dalam Talian) yang telah diadakan pada 8 November 2021;
2. Sesi wawancara bersama Pegawai Kanan Polis dari JSJK di media cetak dan media elektronik dan media atas talian;
3. Sesi ceramah oleh pegawai daripada JSJK Bukit Aman dan peringkat Kontinjen menggunakan platform-platform NGO, Persatuan, syarikat swasta, institusi kewangan dan sebagainya;
4. Khutbah Jumaat Khas sempena Kempen Pencegahan Jenayah Komersil (Jenayah Dalam Talian) telah dibacakan di masjid, surau Jumaat, surau sementara Jumaat seluruh Wilayah Persekutuan pada 19 November 2021 dengan kerjasama Jabatan Agama Islam Wilayah Persekutuan (JAWI). Khutbah Jumaat Khas sempena kempen yang sama juga dibaca di masjid, surau Jumaat, surau sementara Jumaat di seluruh negara pada 26 November 2021 dengan kerjasama dari pihak Jabatan Kemajuan Islam Malaysia (JAKIM);
5. **High Profile Policing** (HPP) dan **Meet & Greet** akan dilaksanakan di semua peringkat Kontinjen dengan kerjasama JPJJK;
6. Pertandingan Poster Pencegahan Jenayah Dalam Talian diadakan bagi meningkatkan kesedaran dan mengelakkan orang ramai menjadi mangsa;
7. Forum Pencegahan Jenayah Dalam Talian secara maya anjuran bersama Persatuan, NGO dan media terpilih. Maklumat undang-undang komersil dan tips mengenai *Modus Operandi* penipuan dalam

talian serta langkah yang boleh diambil untuk menanganinya akan dimuatnaik ke *Facebook* JSJK dan PDRM dan dikongsikan secara menyeluruh dalam pelbagai platform media sosial seperti *Facebook*, *Youtube*, *Twitter*, *Instagram* dan sebagainya; dan

8. ***Influencers*** tempatan yang telah dikenal pasti dan dipelawa untuk memberi kerjasama dalam membantu dan menyebarkan tips serta informasi yang dimuatnaik di *facebook* JSJK dan PDRM.

Pihak PDRM juga telah membangunkan satu portal untuk memudahkan masyarakat untuk menyemak nombor-nombor telefon sindiket dan akaun-akaun bank yang digunakan oleh sindiket dalam urusan pindahan wang mangsa ke akaun sindiket yang boleh melalui semakan portal <http://www.ccid.rmp.gov.my/semakmule>. Selain itu, satu akaun facebook “Cyber Crime Alert Royal Malaysia Police” juga telah diwujudkan bagi berkongsi dan memberi amaran kepada orang ramai mengenai ancaman penipuan atau jenayah siber. Ini dapat membantu orang awam dengan membuat semakan awal dan mengelak daripada menjadi mangsa penipuan.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' JOHARI BIN ABDUL [SUNGAI PETANI]**

**TARIKH : 17 MAC 2022 (KHAMIS)**

**SOALAN**

**DATO' JOHARI BIN ABDUL [ SUNGAI PETANI ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah harga makanan dan bahan binaan yang melambung naik disebabkan tindakan peniaga yang tidak bertanggung jawab atau kelemahan Kementerian dalam melaksanakan perancangan dengan agensi-agensi lain bagi mengatur agar tawaran (supply) mencukupi di pasaran.

**JAWAPAN**

**Yang di-Pertua,**

Harga makanan dan bahan binaan naik adalah disebabkan faktor luaran seperti kenaikan harga makanan ternakan, kenaikan harga baja dan racun, kenaikan harga caj perkapalan dan masalah kekurangan kontena di seluruh dunia.

Peniaga didapati tidak mengambil kesempatan dan kenaikan harga jualan barangan mereka adalah selari dengan kenaikan kos yang berlaku di pasaran. Mana-mana peniaga yang didapati mengambil keuntungan secara tidak munasabah, akan diambil tindakan undang-undang.

Kementerian dan pelbagai agensi sentiasa memantau, bekerjasama dan membuat libat urus berterusan dengan pemain industri untuk mengatur dan memastikan keberadaan bekalan. Isu bekalan tidak timbul kerana bekalan adalah mencukupi dan stabil tetapi isu yang berlaku adalah harga input yang tinggi dari luar negara kesan pandemik COVID19. Kenaikan harga berlaku di seluruh dunia dan masalah ini bukan di Malaysia sahaja.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : PUAN RUSNAH BINTI ALUAI  
(TANGGA BATU)**

**TARIKH JAWAB : 17 MAC 2022 (KHAMIS)**

**SOALAN**

**PUAN RUSNAH BINTI ALUAI (TANGGA BATU)** minta **MENTERI PERUMAHAN DAN KERAJAAN TEMPATAN** menyatakan

- (a) berapa banyakkah perumahan untuk penjawat awam yang tidak digunakan secara optimum, kosong dan terbiar terutamanya di Tangga Batu; dan
- (b) adakah Kementerian berhasrat untuk menjadikan perumahan atau kuarters tersebut sebagai perumahan kos rendah ataupun digunakan untuk kegunaan kebajikan.

**JAWAPAN**

**Tuan Yang di-Pertua,**

**Jawapan (a)**

Untuk makluman Ahli Yang Berhormat, terdapat dua jenis perumahan untuk penjawat awam iaitu:

- (i) Kuarters sebagai kediaman sementara dan bukan untuk tujuan dijual; dan
- (ii) Projek Perumahan Penjawat Awam (PPAM) untuk tujuan dijual.

Bagi kuarters penjawat awam, pengurusannya tidak dilaksanakan secara berpusat kerana tanggungjawab mengurus dan menyelia kuarters adalah di bawah kementerian, jabatan dan agensi masing-masing berdasarkan kepada peraturan-peraturan berkaitan yang ditetapkan.

Namun, di bawah Jabatan Perdana Menteri (JPM), pengurusan kuarters ini adalah merujuk kepada Kuarters Gunasama Kerajaan Persekutuan yang diuruskan oleh Bahagian Pengurusan Hartanah (BPH). Berdasarkan maklumat yang diperolehi daripada BPH, JPM, pada masa ini, BPH hanya menguruskan sebanyak 27,751 unit Kuarters Gunasama Kerajaan Persekutuan di enam (6) lokasi sahaja iaitu sekitar Putrajaya, Kuala Lumpur, Cyberjaya, KLIA, Johor dan Labuan. Kebanyakan daripada kuarters yang diuruskan oleh BPH di enam (6) lokasi tersebut telah digunakan sepenuhnya. Sebahagian kecil unit kuarters yang kosong pula sedang dalam proses pembaikan sebelum ditawarkan semula kepada pemohon seterusnya.

Bagi PPAM pula, sehingga kini terdapat sembilan (9) projek PPAM di negeri Melaka iaitu tiga (3) projek melibatkan 345 unit dalam peringkat pembinaan dan lima (5) projek merangkumi 932 unit yang telah siap dibina. Kesemua projek ini telah mendapat Sijil Perakuan Siap dan Pematuhan (CCC). Bagi kawasan Tangga Batu pula, terdapat dua (2) projek melibatkan 248 unit telah siap dibina dan telah juga mendapat CCC. Daripada 248 unit tersebut, sebanyak 223 unit telah dijual kepada penjawat awam.

**Jawapan (b)**

Untuk makluman Ahli Yang Berhormat, pelaksanaan cadangan penjualan kuarters memerlukan penelitian yang lebih mendalam kerana melibatkan peraturan penjualan aset milik Kerajaan yang diselaraskan oleh Bahagian Pengurusan Aset Awam, Kementerian Kewangan dan pelbagai agensi penyedia kemudahan kuarters perumahan yang lain.

Selain itu, kajian terperinci oleh agensi pemilik kuarters perlu dilaksanakan sebelum penjualan kuarters berkenaan boleh dilaksanakan. Ini memandangkan majoriti penghuni kuarters bukan penduduk asal kawasan berkenaan. Di samping itu, pertimbangan mengenai aspek perpindahan tempat kerja serta migrasi kakitangan yang cenderung berkhidmat di negeri asal mereka juga perlu dipertimbangkan bagi memastikan permintaan terhadap pembelian kuarters berkenaan adalah tinggi. Tambahan pula, aspek perpindahan hak milik kuarters kediaman kerajaan kepada hak milik individu secara penjualan juga perlu dikaji. Ini bagi memastikan pengambilalihan ini tidak bertentangan dengan prosedur Kerajaan dan peraturan atau undang-undang semasa di samping pertambahan implikasi kewangan dari segi kos baik pulih kuarters sedia ada sebelum rumah berkenaan dapat dijual.

Cadangan untuk menjadikan perumahan atau kuarters yang tidak digunakan sebagai perumahan kos rendah atau untuk tujuan kebajikan adalah tertakluk kepada perancangan di kementerian, jabatan dan agensi masing-masing selaku Kementerian Jabatan Pengguna (KJP) kepada bangunan-bangunan kuarters yang tidak digunakan tersebut.

KPKT menyambut baik cadangan berkenaan, namun perkara ini memerlukan penelitian yang lebih menyeluruh sebelum sesuatu pengambilalihan kuarters untuk dijual kepada orang awam dapat dilaksanakan. Ini sudah tentu tertakluk kepada dasar serta peruntukan kewangan yang disediakan oleh Kerajaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK ABD RAHIM BIN BAKRI ( KUDAT )**

**TARIKH : 17 MAC 2022 (KHAMIS)**

**SOALAN**

**DATUK ABD RAHIM BIN BAKRI (KUDAT)** minta **MENTERI PERUMAHAN DAN KERAJAAN TEMPATAN** menyatakan bilakah Projek Balai Bomba Daerah Pitas dikomisionkan kerana sehingga kini belum kelihatan siap sepenuhnya.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Projek Balai Bomba dan Penyelamat (BBP) Pitas ini telah diluluskan di bawah Rancangan Malaysia Kesepuluh (RMKe-10), *Rolling Plan* Kelima (RP5) Tahun 2015. Kontrak asal bagi projek pembinaan ini bermula pada 21 Disember 2016 dan tarikh siap asal mengikut kontrak adalah pada 20 Jun 2018. Namun, ekoran prestasi kerja yang kurang memuaskan di pihak kontraktor, perkara ini telah dibentangkan dalam Mesyuarat *Contract Coordination Panel* (CCP) pada awal September 2019. Selanjutnya, Notis Penamatan Pengambilan Kerja Kontraktor telah dikeluarkan pada awal Oktober 2019 dengan status kemajuan fizikal sebanyak 74.14%.

Susulan penamatan tersebut, Kementerian Perumahan dan Kerajaan Tempatan (KPKT) telah melaksanakan proses perolehan secara tender terbuka pra-kelayakan bagi lantikan kontraktor penyelamat pada 2 Mac 2020 (tarikh iklan). Walau bagaimanapun, didapati tiada petender yang

melepasi syarat-syarat tender yang telah ditetapkan.

Oleh yang demikian, bagi memastikan projek ini dapat disiapkan segera agar perkhidmatan kebombaan di kawasan Pitas dapat diberikan secara optimum, Kementerian ini telah membuat perolehan semula. Keputusan penilaian tender telah diperolehi dan akan dibentangkan dalam Mesyuarat Lembaga Pemutus KPKT pada bulan Mac 2022. Kontraktor penyelamat dijangka akan mula memasuki tapak pada bulan April 2022 dan projek ini dijangka siap sepenuhnya pada bulan Oktober 2022.

Untuk makluman Ahli Yang Berhormat juga, kawasan Pitas telah mendapat khidmat perlindungan kebakaran daripada BBP Kota Marudu yang terletak kira-kira 50 kilometer dan mengambil masa 1 jam 15 minit untuk sampai. Selain itu, terdapat juga bantuan daripada Pasukan Bomba Sukarela (PBS) yang berdekatan iaitu PBS Daerah Pitas yang mempunyai kekuatan keanggotaan seramai 20 orang ahli dan telah dibekalkan dengan kelengkapan peralatan perlindungan diri (PPE) dan peralatan pemadaman oleh JBPM Negeri Sabah.

Bagi meningkatkan aspek keselamatan kebakaran di kawasan Pitas, Kementerian melalui JBPM telah merancang untuk memperluaskan penubuhan Bomba Komuniti yang akan dilengkapi dengan pengetahuan mengenai pencegahan kebakaran, latihan kebombaan serta dibekalkan dengan peralatan asas kawalan awal kebakaran seperti alat pemadam api. Pasukan Bomba Komuniti ini akan bertindak sebagai pasukan tindak balas awal kecemasan (*first responder*) sementara menunggu ketibaan anggota bomba dari balai yang berhampiran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : DR. ONG KIAN MING [BANGI]**

**TARIKH : 17 MAC 2022 (KHAMIS)**

**SOALAN**

**DR. ONG KIAN MING [BANGI]** minta **MENTERI SUMBER MANUSIA** menyatakan langkah-langkah yang telah dilaksanakan untuk membina *Centralized Labour Quarters* (CLQ) di Malaysia sebagai satu langkah penting untuk membantu majikan memenuhi syarat Akta 446.

**JAWAPAN**

**Tuan Yang di-Pertua,**

Penginapan Pekerja Berpusat telah dikenalpasti sebagai penyelesaian kepada isu penginapan pekerja penginapan pekerja yang lebih sistematik dan terancang bagi jangka masa panjang dan dapat membantu majikan memenuhi syarat Akta Standard Minimum Perumahan, Penginapan dan Kemudahan Pekerja 1990 [*Akta 446*]

Selaras dengan hasrat tersebut, Kementerian Sumber Manusia bersama Kementerian Perumahan dan Kerajaan Tempatan telah mewujudkan sistem permohonan perakuan penginapan pekerja. Antaranya termasuklah dengan memperkenalkan Prosedur Permohonan Bagi Penyediaan Penginapan Pekerja Secara Jangka Panjang.

Kerajaan telah mengenalpasti jumlah keseluruhan pekerja asing di setiap negeri dan daerah, serta telah membuat anggaran Penginapan Pekerja Berpusat yang diperlukan bagi menempatkan kesemua pekerja asing yang terlibat.

Selain itu, Kerajaan juga telah mengadakan sesi libat urus bersama wakil-wakil industri yang telah dikenalpasti berpotensi menjadi penyedia Penginapan Pekerja Berpusat bagi memberi penerangan secara jelas berkaitan kemudahan-kemudahan yang perlu disediakan serta standard yang perlu dipatuhi dalam penyediaan sesebuah Penginapan Pekerja Berpusat.

Ini bagi memastikan kebajikan dan keselamatan pekerja asing yang ditempatkan di Penginapan Pekerja Berpusat tersebut kelak dipelihara.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : TUAN CHARLES ANTHONY SANTIAGO  
[ KLANG ]**

**TARIKH : 17 MAC 2022 (KHAMIS)**

**SOALAN**

**TUAN CHARLES ANTHONY SANTIAGO [ KLANG ]** minta **MENTERI SUMBER MANUSIA** menyatakan bilakah Kerajaan akan menukarkan formula undi sulit pengiktirafan kesatuan sekerja. Sebelum ini Kementerian Sumber Manusia mengatakan pengiraan baru berdasarkan jumlah pengundian (*by vote cast*) akan dilaksanakan.

**JAWAPAN**

**Tuan Yang Di Pertua,**

Kementerian Sumber Manusia bercadang untuk meminda formula undi sulit bagi menentukan majoriti sokongan terhadap tuntutan pengiktirafan oleh kesatuan sekerja terhadap majikan berasaskan kepada jumlah pekerja yang layak dan hadir untuk mengundi.

Walau bagaimanapun, ia hanya dapat dilaksanakan setelah pindaan Akta Kesatuan Sekerja 1959 dibentang dan diluluskan di Dewan yang mulia ini.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIM CHEE KEONG  
[BUKIT MERTA JAM]**

**TARIKH : 17 MAC 2022 (KHAMIS)**

**SOALAN**

**TUAN SIM CHEE KEONG [ BUKIT MERTA JAM ]** minta **MENTERI BELIA DAN SUKAN** menyatakan **sama ada hasil cukai gula dan hasil cukai judi** disalurkan kepada kegunaan Kementerian dan jika ada nyatakan jumlah masing-masing.

**JAWAPAN**

**Tan Sri Yang di-Pertua,**

Untuk makluman Ahli Yang Berhormat, produk minuman sedia diminum yang mengandungi gula tinggi melebihi paras gula sihat yang ditetapkan oleh Kementerian Kesihatan Malaysia (KKM) telah dikenakan duti eksais pada kadar 40 sen per liter berkuatkuasa mulai 1 Julai 2019. Pengenaan duti eksais ke atas minuman bergula ini merupakan salah satu strategi yang telah digariskan oleh KKM di bawah *National Plan of Action for Nutrition of Malaysia III* (2016-2025) untuk mengurangkan prevalen obesiti, diabetes dan penyakit tidak berjangkit (NCD) yang dikaitkan dengan pemakanan. Ia juga selaras dengan usaha Kerajaan supaya rakyat mengurangkan pengambilan minuman bergula tinggi yang boleh menyebabkan masalah kesihatan yang serius.

Aktiviti perjudian juga dikenakan pelbagai jenis duti/cukai yang terdiri daripada duti kasino, duti mesin slot, duti pertaruhan, cukai perjudian dan cukai perkhidmatan. Pengenaan duti/cukai yang tinggi adalah untuk tidak menggalakkan masyarakat terlibat dalam aktiviti perjudian yang boleh mendatangkan kesan mudarat dan ketagihan.

Di bawah Perkara 97(1) Perlembagaan Persekutuan, telah dinyatakan bahawa segala hasil dan wang tidak kira bagaimana jua pun diperdapatkan atau diterima oleh Persekutuan hendaklah dibayar ke dalam Kumpulan Wang Disatukan Persekutuan. Oleh yang demikian, kutipan hasil Kerajaan daripada pelbagai jenis cukai disalurkan ke Kumpulan Wang Disatukan dan sebarang pengeluaran jumlah wang daripada kumpulan wang ini hanya boleh dibuat sama ada dipertanggungjawabkan terus kepada Kumpulan Wang Disatukan (Artikel 98) seperti pembayaran pencen dan caj hutang atau melalui Rang Undang-Undang Perbekalan (Artikel 100).

Kerajaan tidak melaksanakan kaedah “earmark” atau agihan hasil kutipan duti/cukai tertentu bagi tujuan spesifik memandangkan ia adalah tidak selaras dengan prosedur kewangan semasa dan tidak pernah dilaksanakan bagi apa-apa tujuan seumpamanya sebelum ini.

Untuk makluman Ahli Yang Berhormat, Majlis Sukan Negara (MSN) adalah merupakan penerima manfaat bagi hasil cukai judi, hasil perjanjian sumbangan antara Kementerian Kewangan dengan pihak Sports Toto yang mana MSN mula menerima sumbangan daripada Sports Toto sejak tahun 1980 bagi tujuan pembangunan sukan negara. Sumbangan yang diterima oleh MSN adalah berdasarkan kepada 5% daripada keuntungan bersih sebelum cukai.

Pada awal tahun 1990 dan kadar sumbangan itu telah dinaikkan kepada 10% daripada keuntungan bersih sebelum cukai setiap tahun. Kadar sumbangan 10% tersebut kekal sehingga kini. Sumbangan yang diterima oleh MSN daripada Sports Toto adalah sebanyak **RM29,346,100.00** bagi tahun 2021 dan digunakan bagi tujuan pengurusan fasiliti dan pusat-pusat latihan di bawah kendalian MSN, utiliti, penyelenggaraan dan pembaikan fasiliti dan kemudahan dan sebagainya. Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : YB TUAN FONG KUI LUN [BUKIT BINTANG]**

**TARIKH : 17 MAC 2022 (KHAMIS)**

**SOALAN**

**TUAN FONG KUI LIN [ BUKIT BINTANG ]** minta **MENTERI SUMBER MANUSIA** menyatakan sejauh mana seriusnya kegiatan ejen haram pekerja – pekerja asing setelah tempoh PKP berakhir dan kegiatan ekonomi rancak semula.

**JAWAPAN**

**Tuan Yang di-Pertua,**

Penularan wabak COVID-19 telah menyebabkan sempadan negara ditutup dan kemasukan pekerja asing telah dibekukan mulai Mac 2020 sehingga kini. Memandangkan tiada kemasukan pekerja asing baharu, kegiatan ejen haram tidak dapat dikenalpasti.

Berdasarkan Akta Agensi Pekerjaan Swasta 1981, Agensi Pekerjaan Swasta kategori Lesen B dibenarkan untuk penempatan pekerjaan perkhidmat domestik asing manakala Lesen C bagi penempatan pekerjaan domestik asing dan pekerja asing di Malaysia. Sehingga 31 Januari 2022, sebanyak 297 Agensi Pekerjaan Swasta kategori Lesen B dan 493 Agensi Pekerjaan Swasta kategori Lesen C telah dikeluarkan oleh Jabatan Tenaga Kerja Semenanjung Malaysia.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB TUAN SIVARASA A/L K.RASIAH (SUNGAI  
BULOH)**

**TARIKH : 17 MAC 2022 (KHAMIS)**

**SOALAN**

**TUAN R. SIVARASA ( SUNGAI BULOH )** minta **MENTERI DALAM NEGERI** menyatakan mengapa daripada 79 laporan kes kematian tahanan dalam lokap PDRM dalam tempoh Januari 2015 hingga September 2021, terdapat 30 kes berstatus "No further action" (jawapan bukan lisan Mesyuarat Kedua penggal Keempat) padahal seksyen 334 Kanun Acara Jenayah ( Akta 593) mewajibkan seorang Magistret melakukan satu inkuiri penuh atau inkues terhadap punca kematian dalam semua kes kematian tahanan dalam lokap PDRM.

**JAWAPAN**

**Tuan Yang Di Pertua,**

Semua kertas siasatan kes kematian tahanan dalam lokap PDRM dirujuk terlebih dahulu kepada Timbalan Pendakwaraya untuk menentukan tindakan seterusnya yang perlu dilaksanakan oleh pihak PDRM. Pihak PDRM dan KDN tidak dapat mengulas berhubung keputusan Timbalan Pendakwaraya dalam menentukan sesuatu kes kematian dikategorikan sebagai *No Further Action* (NFA) memandangkan keputusan tersebut di bawah bidang kuasa Jabatan Peguam Negara, Jabatan Perdana Menteri.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK LIEW CHIN JIN @ CHRISTINA LIEW [ TAWAU ]**

**TARIKH : 17 MAC 2022 (KHAMIS)**

**SOALAN**

**DATUK LIEW CHIN JIN @ CHRISTINA LIEW [ TAWAU ]** minta **MENTERI KESIHATAN** menyatakan sama ada Kementerian ada perancangan untuk membekalkan negeri Sabah dengan sebuah mesin Positron Emission Tomography (PET). Pusat Perubatan Nuklear dan Radioterapi di Kota Kinabalu, yang menjadi pusat rujukan untuk pesakit-pesakit kanser, masih kekurangan peralatan ini untuk pengimejan perubatan.

**JAWAPAN**

Tuan Yang di-Pertua,

1. Untuk makluman Ahli Yang Berhormat, memandangkan Perkhidmatan yang berteknologi dan berkemahiran tinggi memerlukan **peruntukan yang besar** dan juga memerlukan kumpulan tenaga sumber manusia yang berkemahiran tinggi, maka fasiliti ini dibangunkan secara regional.
2. Perkhidmatan Perubatan Nuklear terdapat di 6 buah hospital KKM mengikut zon dan salah satu zon terletak di Sabah iaitu di Hospital Wanita dan Kanak-Kanak Likas.

3. Buat masa ini, mesin PET Scan hanya terdapat di 2 hospital KKM iaitu Hospital Pulau Pinang dan Institut Kanser Negara. PET-CT scan merupakan alat pengimbas pengimejan molekular khususnya untuk digunakan sebagai perawatan penyakit kanser dan anggaran kos mesin adalah sebanyak RM 12-13 juta seunit.
4. Ini tidak termasuk peruntukan bagi perolehan mesin cyclotron. Cyclotron yang diperlukan bagi penghasilan Fluorodeoxyglucose (FDG) iaitu sejenis *radioactive tracer* yang disuntik ke dalam badan pesakit untuk penghasilan imej oleh mesin PET-CT. FDG ini mempunyai jangka hayat di mana bahan radioaktif tersebut akan *decay* dalam waktu tertentu. Sehubungan dengan itu, sekiranya satu PET-CT scan diletakkan di Sabah ia juga perlu dilengkapi dengan cyclotron.
5. Pada ketika ini, perancangan untuk meletakkan sebuah mesin PET Scan. Kertas kerja bagi cadangan ini telah dikemukakan untuk pertimbangan EPU.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB PUAN WONG HON WAI (BUKIT BENDERA)**

**TARIKH : 17 MAC 2022 (KHAMIS)**

**SOALAN**

**TUAN WONG HON WAI ( BUKIT BENDERA )** minta **MENTERI DALAM NEGERI** menyatakan statistik kes Macau Scam yang telah diterima oleh polis mengikut negeri dan jumlah amaun kerugian orang ramai dan berapakah kes yang telah diambil tindakan. Apakah ikhtiar baru Kerajaan untuk membentaras kegiatan Macau Scam yang semakin berleluasa.

**JAWAPAN**

**Tuan Yang Di Pertua,**

Jumlah kes Macau Scam yang dilaporkan di seluruh negara bagi tahun 2019 hingga 13 Februari 2022 adalah sebanyak 6,669 kes melibatkan kerugian bernilai RM384,332,538.72. Berdasarkan statistik, jumlah kes jenayah Macau Scam pada tahun 2019 adalah sebanyak 2,475 kes dilaporkan dan pada tahun 2020 pula, sebanyak 2,248 kes telah dibuka kertas siasatan manakala pada tahun 2021 pula, kes jenayah Macau Scam terus menunjukkan penurunan dengan mencatatkan jumlah kes sebanyak 1,585 kes.

Pelbagai usaha telah dijalankan oleh PDRM dalam mengekang sindiket penipuan seperti ini termasuklah dengan meningkatkan penguatkuasaan undang-undang, pengoperasian, tangkapan dan seterusnya menjalankan pendakwaan ke atas mereka yang terlibat dalam penipuan Macau Scam. Pada tahun 2019 hingga 13 Februari 2021, seramai 2,826 tangkapan telah

dibuat dan sebanyak 1,599 pertuduhan telah pun dilaksanakan.

Usaha berterusan yang dijalankan oleh Jabatan Siasatan Jenayah Komersil telah menunjukkan impak yang positif. Hebahan berkenaan dengan modus operandi Macau Scam sering kali dihebahkan kepada masyarakat melalui media cetak, media sosial dan media elektronik. PDRM juga giat menjalankan ceramah, taklimat dan sesi dialog kepada kakitangan kerajaan, syarikat swasta dan NGO-NGO. Sesi ini dijalankan secara atas talian melalui medium facebook, televisyen dan radio memandangkan Negara sedang menghadapi Pandemik Covid-19. Jabatan Siasatan Jenayah Komersil juga telah mewujudkan CCID *Scam Respond Center* di talian 0326101559 atau 0326101599 di mana orang ramai boleh membuat panggilan untuk mendapatkan maklumat dan menyemak kesahihan panggilan bagi sebarang transaksi yang meragukan. Talian ini beroperasi dari jam 9.00 pagi hingga 10.00 malam pada setiap hari.

Tuan Yang Di Pertua,

Kerjasama dua hala yang baik di antara PDRM, SKMM dan syarikat telekomunikasi juga adalah salah satu faktor penurunan kes Macau Scam. Kerjasama dengan institusi kewangan juga membantu dalam usaha pihak PDRM mengenalpasti aliran tunai bagi akaun yang digunakan oleh sindiket atau penjenayah dan membolehkan penggunaan akaun-akaun ini disekat.

Pihak PDRM juga telah membangunkan satu portal untuk memudahkan masyarakat untuk menyemak nombor-nombor telefon sindiket dan akaun-akaun bank yang digunakan oleh sindiket dalam urusan pindahan wang mangsa ke akaun sindiket melalui semakan portal <http://www.ccid.rmp.gov.my/semakmule>. Selain itu, satu akaun facebook "Cyber Crime Alert Royal Malaysia Police" juga telah diwujudkan bagi berkongsi dan memberi amaran kepada orang ramai mengenai ancaman penipuan atau jenayah siber. Ini dapat membantu orang awam dengan membuat semakan awal dan mengelak daripada menjadi mangsa penipuan.



Tuan Yang Di Pertua,

Kempen Pencegahan Jenayah juga merupakan salah satu inisiatif bagi memastikan masyarakat didedahkan segala ilmu pengetahuan berkaitan jenayah komersil. Tujuan kempen ini diadakan adalah bagi meningkatkan kesedaran kepada orang ramai mengenai jenayah komersil terutamanya melibatkan penipuan jenayah dalam talian yang menunjukkan peningkatan kes pada tahap yang membimbangkan dan seterusnya mengelakkan orang ramai daripada menjadi mangsa kepada jenayah tersebut. Tema yang dipilih bagi kempen ini adalah **Kesedaran Jenayah Komersil Kesejahteraan Komuniti** dan *tagline* “**Be Alert Stay Smart**”. Sasaran kempen ini adalah ditujukan kepada syarikat korporat, *netizen*, warga emas, kakitangan kerajaan dan syarikat swasta serta pelajar. Bagi memastikan matlamat kempen yang dijalankan tercapai, pelbagai program telah diatitkan seperti berikut:

1. Majlis Pelancaran Kempen Pencegahan Jenayah Komersil (Jenayah Dalam Talian) yang telah diadakan pada 8 November 2021;
2. Sesi wawancara bersama Pegawai Kanan Polis dari JSJK di media cetak dan media elektronik dan media atas talian;
3. Sesi ceramah oleh pegawai daripada JSJK Bukit Aman dan peringkat Kontinjen menggunakan platform-platform NGO, Persatuan, syarikat swasta, institusi kewangan dan sebagainya;
4. Khutbah Jumaat Khas sempena Kempen Pencegahan Jenayah Komersil (Jenayah Dalam Talian) telah dibacakan di masjid, surau Jumaat, surau sementara Jumaat seluruh Wilayah Persekutuan pada 19 November 2021 dengan kerjasama Jabatan Agama Islam Wilayah Persekutuan (JAWI). Khutbah Jumaat Khas sempena kempen yang sama juga dibaca di masjid, surau Jumaat, surau sementara Jumaat di seluruh negara pada 26 November 2021 dengan kerjasama dari pihak Jabatan Kemajuan Islam Malaysia (JAKIM);

5. **High Profile Policing** (HPP) dan **Meet & Greet** akan dilaksanakan di semua peringkat Kontinjen dengan kerjasama JPJJK;
6. Pertandingan Poster Pencegahan Jenayah Dalam Talian diadakan bagi bagi meningkatkan kesedaran dan mengelakkan orang ramai menjadi mangsa;
7. Forum Pencegahan Jenayah Dalam Talian secara maya anjuran bersama Persatuan, NGO dan media terpilih. Maklumat undang-undang komersil dan tips mengenai *Modus Operandi* penipuan dalam talian serta langkah yang boleh diambil untuk menanganinya akan dimuatnaik ke *Facebook* JSJK dan PDRM dan dikongsikan secara menyeluruh dalam pelbagai platform media sosial seperti *Facebook*, *Youtube*, *Twitter*, *Instagram* dan sebagainya; dan
8. **Influencers** tempatan yang telah dikenal pasti dan dipelawa untuk memberi kerjasama dalam membantu dan menyebarkan tips serta informasi yang dimuatnaik di *facebook* JSJK dan PDRM.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TENGKU ZULPURI BIN RAJA PUJI  
[ RAUB ]**

**TARIKH : 17 MAC 2022 (KHAMIS)**

**SOALAN**

**TENGKU ZULPURI BIN RAJA PUJI [ RAUB ]** minta **MENTERI KESIHATAN** menyatakan apakah inisiatif Kementerian bagi mengurangkan kesan sampingan atau memberi keyakinan balik kepada rakyat, selepas beberapa kes insiden yang memudaratkan penerima dos vaksin penggalak (dos yang ke-3) ini.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) mempunyai Jawatankuasa Farmakovigilans Khas Vaksin COVID-19 (JFK) yang terdiri daripada pakar-pakar daripada pelbagai bidang termasuk kardiologi, imunologi, hematologi, neurologi, perubatan dalaman, patologi, penyakit berjangkit, geriatrik dan forensik dari fasiliti KKM, universiti dan swasta.
2. Untuk makluman Ahli Yang Berhormat, semua laporan Kesan Advers Susulan Imunisasi (AEFI) serius termasuk kematian akan disiasat oleh pasukan penyiasat di Pusat Kesihatan Daerah (PKD)/Jabatan Kesihatan Negeri (JKN).
3. JFK diberikan tanggungjawab untuk meneliti laporan AEFI yang

disediakan oleh pasukan penyiasat ini di peringkat fasiliti berdasarkan laporan perubatan pesakit dan laporan bedah siasat (sekiranya ada).

4. Semua laporan seterusnya akan dibentangkan kepada Jawatankuasa Penasihat Kesan Advers Ubat Kebangsaan (MADRAC) sebelum dihantar kepada pangkalan data global World Health Organisation (WHO). Semua laporan AEFI dan maklumat yang diterima oleh NPRA termasuk isu keselamatan di peringkat global merupakan sumber maklumat penting dalam menilai risiko keselamatan vaksin yang sedang digunakan bagi memastikan nisbah manfaat dan risiko (benefit-risk ratio) vaksin-vaksin ini masih positif. Sekiranya sebarang isu keselamatan dapat disahkan, cadangan untuk melaksanakan tindakan regulatori terhadap penggunaan vaksin akan dikemukakan kepada Pihak Berkuasa Kawalan Dadah (PBKD) jika perlu.

5. Pelaksanaan pemberian dos penggalak telah dimulakan di seluruh negara pada 13 Oktober 2021. Pemonitoran AEFI terus dijalankan semasa Program Imunisasi COVID-19 Kebangsaan bagi dos penggalak atau PICK-B. Sehingga 11 Mac 2022, daripada 67,978,370 dos vaksin COVID-19 yang telah diberikan di bawah PICK, 15,187,382 merupakan dos penggalak.

6. Pelaporan AEFI di kalangan penerima dos penggalak direkodkan berjumlah 1,411 bersamaan kadar 93 laporan bagi setiap sejuta dos. Ini adalah lebih rendah daripada kadar keseluruhan pelaporan AEFI (379 bagi setiap sejuta dos). Daripada jumlah laporan AEFI yang diterima bagi dos penggalak ini, hanya 110 laporan (atau 7.8% daripada jumlah laporan AEFI diterima bagi dos penggalak) diklasifikasikan sebagai serius bersamaan kadar 7.2 laporan bagi setiap juta dos.

7. Semua laporan yang AEFI serius yang diterima ini memerlukan penyiasatan lengkap dan penilaian terperinci sebelum hubungkait kesan yang dilaporkan dan vaksin yang diterima dapat ditentukan. Jumlah laporan AEFI serius yang diterima ini termasuk 54 laporan yang melibatkan kematian di kalangan penerima vaksin COVID-19. Daripada jumlah ini, JFK telah menjalankan penilaian ke atas 24 laporan yang telah lengkap penyiasatan dan didapati kes-kes kematian tersebut tiada

hubung kait dengan vaksin yang diterima. Terdapat 30 laporan lagi masih dalam proses penyiasatan sebelum dibentangkan untuk penilaian oleh JFK.

8. Bagi memberikan keyakinan kepada rakyat mengenai kebaikan pengambilan vaksin, Kementerian Kesihatan Malaysia telah mengambil langkah proaktif dengan menggunakan pelbagai saluran media untuk menyebarkan maklumat betul dan tepat bagi memberi kesedaran kepada rakyat termasuklah:

- a. pemakluman di laman sesawang KKM, laman sesawang NPRA, laman sesawang Program Perkhidmatan farmasi, laman sesawang Jawatankuasa Jaminan Akses Bekalan Vaksin COVID-19 (JKJAV) dan di media-media sosial. Maklumat ini juga turut dipaparkan di skrin-skrin televisyen serta papan maklumat di ruang-ruang menunggu Pusat-pusat Pemberian Vaksin (PPV);
- b. hebahan maklumat oleh pegawai-pegawai KKM yang terdiri daripada pakar perubatan kesihatan awam, pakar perubatan, pakar-pakar pediatrik, pakar kardiologi serta pegawai melalui undangan *talk show*, seminar, temu ramah di televisyen, radio dan laman sosial dari semasa ke semasa;
- c. sesi penerangan kepada kumpulan media secara berkala bagi menjelaskan dengan tepat isu-isu berkaitan vaksin termasuk dos penggalak serta kesan sampingan bagi memastikan pelaporan yang tepat; dan
- d. memberikan latihan kepada pemberi vaksin iaitu kakitangan kesihatan kerajaan dan swasta semasa sesi-sesi latihan bagi memastikan kakitangan-kakitangan ini memberikan maklumat yang tepat kepada penerima vaksin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**  
**DARIPADA : TUAN M. KULASEGARAN [IPOH BARAT]**  
**TARIKH : 17 MAC 2022 (KHAMIS)**

**SOALAN**

**TUAN M. KULASEGARAN [ IPOH BARAT ]** minta **MENTERI SUMBER MANUSIA** menyatakan sebab-sebab perjanjian pengambilan pekerja asing Bangladesh dirahsiakan oleh Kerajaan sedangkan Kerajaan berkewajipan untuk mendedahkan kandungan sebenar perjanjian tersebut.

**JAWAPAN**

**Tuan Yang di-Pertua,**

Keseluruhan isi kandungan di dalam Memorandum Persefahaman pengambilan pekerja asing dengan negara-negara sumber diperuntukkan klausa berhubung kerahsiaan yang telah dipersetujui oleh kedua-dua pihak.

Sebagaimana yang berlaku sebelum ini, kandungan Memorandum Persefahaman diantara Kerajaan Malaysia dengan Kerajaan Nepal yang telah ditandatangani oleh Mantan Menteri Sumber Manusia juga tidak didedahkan kepada umum demi memelihara kerahsiaan kandungan Memorandum tersebut.

Oleh itu, perkara yang sama juga dipraktikkan dalam Memorandum Persefahaman antara Kerajaan Malaysia dengan Kerajaan Bangladesh ini.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB PUAN VIVIAN WONG SHIR YEE (SANDAKAN)**

**TARIKH : 17 MAC 2022 (KHAMIS)**

**SOALAN**

**Puan Vivian Wong Shir Yee ( Sandakan ) minta MENTERI DALAM NEGERI menyatakan :-**

(a) apakah status kewarganegaraan Rohana Abdullah selepas Perdana Menteri berjanji untuk membantu dengan permohonan kewarganegaraannya; dan

(b) bagaimana pula dengan kanak-kanak lain yang tiada kerakyatan di negara ini yang sama seperti kes Rohana yang boleh memohon untuk kerakyatan atau mana-mana dokumen yang sah untuk tinggal di Malaysia.

**JAWAPAN**

**Tuan Yang Di Pertua,**

(a) Kewarganegaraan Malaysia adalah anugerah tertinggi Kerajaan Persekutuan kepada individu yang berkelayakan yang diperuntukkan dengan jelas oleh undang-undang tertinggi Malaysia iaitu Perlembagaan Persekutuan. Permohonan kewarganegaraan bagi Rohana yang dipohon di bawah Perkara 15A Perlembagaan Persekutuan sedang diteliti bagi menilai meritnya untuk pertimbangan kelayakan penganugerahan kewarganegaraan.

Setiap permohonan kewarganegaraan adalah berbeza dari segi latar belakang, fakta dan dokumen bukti yang dikemukakan. Justeru ia perlu diteliti satu persatu untuk menilai merit kelayakannya.

(b) Untuk makluman Ahli Yang Berhormat, kelahiran seseorang individu di negara ini tidak menjamin kewarganegaraan Malaysia secara automatik bagi individu tersebut. Kaedah pemerolehan kewarganegaraan Malaysia adalah ditetapkan di bawah Bahagian III, Perlembagaan Persekutuan. Penentuan taraf kewarganegaraan seorang kanak-kanak adalah tertakluk kepada taraf kewarganegaraan serta status perkahwinan ibu bapa beliau sewaktu kelahiran kanak-kanak tersebut.

Permohonan kewarganegaraan untuk kanak-kanak bertaraf bukan warganegara di bawah umur 21 tahun boleh dibuat di bawah Perkara 15A atau Perkara 15(2) Perlembagaan Persekutuan sekiranya telah memenuhi syarat-syarat yang telah ditetapkan di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen. Walau bagaimanapun, perlu diingatkan bahawa syarat-syarat ini hanya melayakkan permohonan dikemukakan tetapi tidak menjamin bahawa permohonan akan diluluskan.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB TUAN CHA KEE CHIN (RASAH)**

**TARIKH : 17 MAC 2022 (KHAMIS)**

**SOALAN**

**TUAN CHA KEE CHIN ( RASAH )** minta **MENTERI DALAM NEGERI** menyatakan mengapa masalah bayi baru (warganegara) yang telah mendaftarkan kelahirannya hanya memperolehi Sijil Kelahiran tetapi tidak diberikan MyKid oleh Jabatan Pendaftaran Negara dan masalah ini telah berlarutan untuk tempoh masa yang lama. Ianya telah mengakibatkan pelbagai masalah kepada bayi dan ibu bapa tersebut.

**JAWAPAN**

**Tuan Yang Di Pertua,**

Jabatan Pendaftaran Negara (JPN) telah mengeluarkan MyKid yang mengandungi maklumat asas mengenai kanak-kanak seperti yang terdapat pada sijil kelahiran. Walau bagaimanapun, pengeluaran MyKid ini tidak menggantikan Sijil Kelahiran, Sijil Pengangkatan ataupun Sijil Kewarganegaraan.

Buat masa ini, pengeluaran MyKid telah ditangguhkan pengeluarannya buat sementara waktu berikutan penambahbaikan sistem yang sedang dilaksanakan oleh JPN bagi menaik taraf ciri -ciri keselamatan pada dokumen pengenalan diri yang dikeluarkan oleh JPN.

Proses naik taraf ini dijangka selesai pada pertengahan tahun ini dan pengeluaran MyKid yang tertangguh akan dapat diteruskan selepas tempoh tersebut. Pada masa yang sama, Kerajaan juga sedang mengkaji sama ada proses pengeluaran dan ciri-ciri Sijil Kelahiran sedia ada boleh ditambah baik agar kebergantungan kepada MyKid dapat dikurangkan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB TUAN KARUPAIYA A/LMUTUSAMI (PADANG  
SERAI)**

**TARIKH : 17 MAC 2022 (KHAMIS)**

**SOALAN**

**TUAN KARUPAIYA A/L MUTUSAMI ( PADANG SERAI )** minta **MENTERI  
DALAM NEGERI** menyatakan penjelasan mengenai kelewatan yang dialami  
oleh rakyat dalam mendapat sijil kelahiran dan kad pengenalan. Nyatakan  
tempoh maksimum bagi Jabatan Pendaftaran Negara mengeluarkan  
dokumen-dokumen ini.

**JAWAPAN**

**Tuan Yang Di Pertua,**

Kementerian Dalam Negeri (KDN) melalui Jabatan Pendaftaran Negara (JPN) **bertanggungjawab untuk mendaftarkan setiap kelahiran kanak-kanak yang dilahirkan di Malaysia** sama ada individu berkenaan bertaraf warganegara Malaysia atau bukan warganegara Malaysia. Pendaftaran kelahiran di Malaysia yang dilaksanakan oleh Jabatan Pendaftaran Negara (JPN) di Semenanjung Malaysia, Sabah dan Sarawak adalah berdasarkan kepada tiga (3) punca kuasa seperti mana berikut: -

- i) Akta Pendaftaran Kelahiran dan Kematian 1957 (Akta 299) di Semenanjung Malaysia;
- ii) Ordinan Pendaftaran Kelahiran Dan Kematian 1951 (Sabah Cap. 123) di negeri Sabah; dan
- iii) Ordinan Pendaftaran Kelahiran Dan Kematian 1951 (Sarawak Cap. 10) di negeri Sarawak.

Manakala, bagi permohonan kad pengenalan adalah selaras dengan Akta Pendaftaran Negara 1959 (Akta 78) dan Peraturan-Peraturan Pendaftaran Negara 1990.

Isu mengenai kelewatan mendapat sijil kelahiran dan kad pengenalan adalah berkait dengan permohonan Pendaftaran Lewat Sijil Kelahiran dan Pendaftaran Lewat Kad Pengenalan selaras dengan punca kuasa di atas.

Seseorang individu perlu memohon daftar lewat kelahiran jika kelahirannya tidak didaftarkan di JPN selepas tempoh seperti berikut: -

- i) Selepas 60 hari dari tarikh kelahirannya di Semenanjung Malaysia; dan
- ii) Selepas 42 hari dari tarikh kelahirannya di negeri Sabah dan negeri Sarawak.

Proses yang diperlukan bagi pendaftaran lewat kelahiran mengambil tempoh yang lebih panjang kerana ia bergantung kepada kesediaan pemohon untuk bekerjasama terutamanya semasa temuduga dan juga semasa penyediaan dokumen-dokumen sokongan yang diperlukan oleh JPN. Permohonan yang telah selesai diproses dan diluluskan akan dikeluarkan sijil kelahiran dalam tempoh 14 hari.

Manakala, bagi individu bertaraf warganegara Malaysia yang berumur 16 tahun dan ke atas tetapi belum pernah memiliki kad pengenalan MyKad, individu berkenaan perlu memohon Daftar Lewat Kad Pengenalan. Permohonan Daftar Lewat Kad Pengenalan yang diuruskan di JPN terdiri daripada kategori berikut:

- i) Pemohon yang menggunakan Sijil Lahir biasa dan berumur 16 tahun dan ke atas;
- ii) Pemohon yang menggunakan Sijil Lahir Daftar Lewat dan berumur 16 tahun ke atas;
- iii) Pemohon yang menggunakan Sijil Anak Angkat / Sijil Kewarganegaraan / Sijil Pengesahan Taraf dan berumur 16 tahun ke atas.

Sebagai makluman Ahli Yang Berhormat, tiada tempoh khusus ditetapkan bagi pengeluaran kad pengenalan untuk permohonan daftar lewat kad pengenalan kerana tempoh siap pengeluaran kad pengenalan adalah bergantung kepada penerimaan dokumen yang lengkap dari tarikh permohonan dibuat. Proses pengeluaran kad pengenalan akan melibatkan pemerhatian dan semakan fakta berdasarkan penerimaan dokumen yang dikemukakan. Selain itu proses penelitian dan pertimbangan mengeluarkan keputusan juga diperlukan dan pengeluaran kad pengenalan akan dicetak di JPN untuk diambil oleh pemohon.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS**

**PERTANYAAN : JAWAB LISAN**  
**DARIPADA : TUAN BARU BIAN [SELANGAU]**  
**TARIKH : 17 MAC 2022 (KHAMIS)**

**SOALAN**

**TUAN BARU BIAN** minta **MENTERI KESIHATAN** menyatakan berapa jumlah klinik desa di Sarawak yang dikategorikan sebagai 'usang' dan apakah rancangan Kementerian untuk klinik usang ini. Berapa pula bilangan klinik desa usang di Parlimen Selangau.

**JAWAPAN**

Tuan Yang di-Pertua,

1. Untuk makluman Ahli Yang Berhormat, “klinik usang” bukannya istilah rasmi. Walau bagaimanapun, secara umumnya klinik-klinik ini merupakan klinik yang berusia lebih 50 tahun, mempunyai masalah infrastruktur dan tidak pernah dinaik taraf atau baikpulih.
2. Sehingga kini terdapat 93 klinik usang di negeri Sarawak. Semua klinik-klinik ini akan dimasukkan dalam senarai klinik gantian yang akan dijalankan secara berperingkat mengikut keutamaan.
3. Bagi Parlimen Selangau, Klinik Desa Tamin telah tersenarai di dalam kategori klinik desa usang dan akan dimohon untuk dinaik taraf pada *rolling*

*plan* akan datang tertakluk kepada ketersediaan tapak, sumber manusia dan peruntukan kewangan kerajaan.

Tuan Yang di-Pertua,

4. Kementerian Kesihatan Malaysia telah mengenal pasti 40 fasiliti klinik di Sarawak yang berusia melebihi 50 tahun iaitu 28 klinik kesihatan, 4 klinik desa, 5 klinik ibu anak dan 3 klinik pergigian. Bagi Parlimen Selangau terdapat satu (1) Klinik Kesihatan iaitu KK Sekuau dan satu (1) Klinik Desa iaitu KD Tamin yang berusia melebihi 50 tahun.

5. Bagi tahun 2022, sebanyak RM2,780,000.00 telah diperuntukkan di bawah BP201: Perkhidmatan Kesihatan Luar Bandar RMKe-12 RP2 bagi negeri Sarawak. Peruntukan ini merangkumi:

- a. Projek Pembaikan dan Naik Taraf Bangunan, Sistem Kejuruteraan dan Infra di Klinik-Klinik KKM (Klinik Daif) di Sarawak sebanyak RM1,030,000.00;
- b. Menaiktaraf Infrastruktur Asas Bekalan Air Alternatif Yang Mencukupi, Berterusan Dan Selamat Di Klinik Kesihatan Luar Bandar Di Bawah Kementerian Kesihatan Malaysia di Sarawak sebanyak RM1,750,000.00

6. Atas faktor keselamatan dan tidak ekonomik untuk dinaiktaraf/ dibaiki, klinik-klinik yang berusia melebihi 50 tahun akan diganti dengan bangunan baharu. Ia perlu mengambil kira keperluan populasi dan perkhidmatan yang akan diberikan berdasarkan kepada kelulusan peruntukan yang diperolehi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN LIM GUAN ENG [ BAGAN ]**

**TARIKH : 17 MAC 2022 (KHAMIS)**

**SOALAN**

**TUAB LIM GUAN ENG [ BAGAN ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan tindakan ke atas kadar inflasi dan kenaikan harga barangan komoditi, makanan dan input industri serta sejauh manakah impak kenaikan kadar elektrik ke atas 1.6 juta perniagaan dan industri setinggi 20% akan dipindahkan kepada pengguna.



**JAWAPAN**

**Yang di-Pertua,**

Untuk makluman Ahli Yang Berhormat, Kerajaan begitu prihatin terhadap isu kenaikan kadar inflasi yang menimbulkan keresahan dalam kalangan rakyat dan peniaga. Walau bagaimanapun, suka saya ingin menyatakan bahawa isu kenaikan kadar inflasi ini adalah bersifat global. Selain itu, harga untuk beberapa komoditi seperti kelapa sawit, jagung serta input bahan pembuatan baja meningkat sekaligus menyumbang kepada kenaikan kos pengeluaran.

Bagi mengurangkan beban yang diterima oleh rakyat, beberapa langkah telah diambil. Kerajaan terus menyediakan peruntukan subsidi untuk beberapa bahan keperluan asas pengguna seperti tepung gandum, minyak masak, LPG dan bahan bakar seperti RON95 dan diesel. Selain itu, Kerajaan juga bersetuju untuk memberi subsidi harga ayam dan telur sepanjang Skim Harga Maksimum Keluarga Malaysia (SHMKM) di mana penternak akan menerima subsidi 60 sen sekilo bagi ayam hidup dana yam bulat dan 5 sen sebiji telur ayam tanpa mengira kategori.

Berhubung dengan isu kenaikan kadar elektrik, penetapan kenaikan ini di luar bidang kuasa KPDNHEP. Walau bagaimanapun, Kementerian sentiasa cakna akan kesan kepada pengguna dan sekiranya berlaku kenaikan harga, pihak Kementerian sedia menyiasat sama ada berlaku elemen pengambilan untung yang tidak munasabah. Selain itu, Kementerian komited untuk pemeriksaan dan pemantauan di semua peringkat perniagaan termasuk di kawasan bandar dan luar bandar. Untuk makluman, sepanjang 2022 sebanyak 90,021 premis telah dilawati dan diperiksa oleh Bahagian Penguatkuasa Kementerian bagi memastikan pematuhan terhadap undang-undang kepenggunaan. Walaubagaimanapun, sekiranya terdapat sebarang aduan diterima berkaitan kenaikan harga jualan apa-apa barangan yang terlalu melampau, notis bertulis akan dikeluarkan kepada peniaga untuk melihat sekiranya wujud kesalahan pencatutan iaitu mengambil keuntungan tinggi yang tidak munasabah oleh peniaga.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN** : **LISAN**

**DARIPADA** : **TUAN GOBIND SINGH DEO**  
**[ PUCHONG ]**

**TARIKH** : **17 MAC 2022 (KHAMIS)**

**SOALAN**

**TUAN GOBIND SINGH DEO** minta **MENTERI KESIHATAN** menyatakan bilangan dan jenis kes-kes kesan sampingan akibat dos penggalak di penjara-penjara di Malaysia.

**JAWAPAN**

Tuan Yang di-Pertua,

1. Sejumlah 18 laporan kesan advers susulan imunisasi (AEFI) telah diterima daripada fasiliti penjara di Malaysia. Laporan-laporan ini melibatkan kesan advers yang berlaku selepas pemberian dos primer (dos 1 & 2). Daripada jumlah itu, 72.2% (13 laporan) adalah laporan AEFI ringan manakala 27.8 % (5 laporan) melibatkan kes serius. Berdasarkan penilaian oleh Jawatankuasa Farmakovigilans Khas Vaksin COVID-19 (JFK), tiada kesan advers yang mempunyai hubung kait secara langsung dengan vaksin COVID-19.
2. Bagi kesan advers yang melibatkan dos penggalak pula, sehingga 11 Februari 2022, tiada laporan AEFI yang diterima melibatkan penerima dos penggalak dari fasiliti penjara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' SRI TIONG SING (BINTULU)**

**TARIKH : 17 MAC 2022 (KHAMIS)**

**SOALAN**

**YB DATO' SRI TIONG SING (BINTULU)** minta **MENTERI PERUMAHAN  
DAN KERAJAAN TEMPATAN** menyatakan:

- (a) Apakah usaha yang diambil Kementerian untuk menaik taraf sistem perparitan di sekitar bandar Bintulu memandangkan banyak perumahan telah diwujudkan dalam beberapa tahun baru-baru ini?
- (b) Apakah Kementerian mempunyai rancangan untuk melaksanakan projek PR1MA di Bintulu sebagai satu inisiatif membantu golongan M40 memiliki rumah terutamanya selepas penularan Covid-19 yang telah menjejaskan rezeki?

**JAWAPAN**

**Tuan Yang di-Pertua,**

(a) Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah menerima tiga (3) permohonan projek menaik taraf sistem perparitan daripada Lembaga Kemajuan Bintulu bagi tahun 2022 dan permohonan tersebut masih dalam pertimbangan KPKT. Tiga (3) permohonan ini melibatkan kerja-kerja naik taraf sistem perparitan di lokasi berikut:

- (i) Jalan Pengiran Mathair, Kidurong;
- (ii) Kampung Baru, Sebauh Besar; dan
- (iii) Pekan Sebauh, Bintulu.

(b) Untuk makluman Ahli Yang Berhormat, sehingga 18 Februari 2022, Perbadanan PR1MA Malaysia (PR1MA) mempunyai tiga (3) projek perumahan di Sarawak melibatkan pembinaan sebanyak 3,238 unit rumah dan kesemua projek ini telah disiapkan.

Buat masa ini, fokus PR1MA adalah untuk menyiapkan projek-projek sedia ada dan belum mempunyai perancangan untuk memulakan sebarang projek baharu di Bintulu, Sarawak. Namun begitu, PR1MA sedia bekerjasama dengan pihak kerajaan negeri dan agensi swasta dalam menyediakan perumahan berkualiti yang mampu dimiliki oleh rakyat Sarawak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK HAJI SHABUDIN BIN YAHAYA  
(TASEK GELUGOR)**

**TARIKH : 17 MAC 2022 (KHAMIS)**

**SOALAN**

**DATUK HAJI SHABUDIN BIN YAHAYA (TASEK GELUGOR)** minta **MENTERI PERUMAHAN DAN KERAJAAN TEMPATAN** menyatakan apakah langkah yang diambil bagi mengelakkan kejadian kebakaran di tapak pelupusan sampah seperti yang berlaku di Pulau Burung, Pulau Pinang sehingga menjejaskan kesihatan penduduk sekitar.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Akta Pengurusan Sisa Pepejal dan Pembersihan Awam 2007 (Akta 672) yang berkuat kuasa pada 1 September 2011 hanya diterima pakai di tujuh (7) buah negeri di Semenanjung Malaysia iaitu Pahang, Negeri Sembilan, Melaka, Johor, Kedah, Perlis, Wilayah Persekutuan Kuala Lumpur dan Putrajaya. Sehingga kini, Pulau Pinang tidak menerima pakai Akta 672. Oleh yang demikian, pengurusan sisa pepejal serta operasi tapak pelupusan diuruskan oleh Pihak Berkuasa Tempatan (PBT). Justeru, operasi Tapak Pelupusan Sanitari Sungai Burung adalah di bawah seliaan Majlis Bandaraya Seberang Perai (MBSP).

Kementerian Perumahan dan Kerajaan Tempatan (KPKT) memandang serius isu kebakaran di tapak pelupusan yang boleh menyebabkan pencemaran alam sekitar dan kacau ganggu kepada penduduk setempat. Kementerian melalui Jabatan Pengurusan Sisa Pepejal Negara (JPSPN) komited dalam menyediakan Prosedur Operasi Standard (SOP) bagi pengoperasian tapak pelupusan sanitari yang perlu dipatuhi oleh operator-operator tapak pelupusan untuk memastikan tiada sebarang pencemaran daripada pengoperasian tapak pelupusan. Kementerian juga merancang untuk membina tapak pelupusan sisa pepejal sanitari yang bersepadu dan berpusat bagi mengurangkan impak pencemaran.

Operasi tapak pelupusan yang baik hendaklah berdasarkan kepada SOP dan petunjuk prestasi (KPI) pengoperasian tapak pelupusan sanitari yang ditetapkan. Sebagai contoh, keluasan kawasan pelupusan yang dibuka hendaklah tidak melebihi 20% daripada kawasan keseluruhan tapak pelupusan. Kes kebakaran yang berlaku di Tapak Pelupusan Sanitari Sungai Burung menunjukkan bahawa kawasan pelupusan yang besar melebihi 20% telah menyebabkan kebakaran merebak dengan cepat ketika musim panas dan penghasilan air larut resap yang tinggi pada musim hujan.

Untuk makluman Ahli Yang Berhormat juga, berdasarkan maklumat daripada Pejabat Setiausaha Kerajaan Negeri Pulau Pinang, kejadian kebakaran di Tapak Pelupusan Sanitari Sungai Burung bermula pada 12 Januari 2022 dan operasi pemadaman berakhir pada 31 Januari 2022. Susulan daripada kebakaran tersebut, Kerajaan Negeri dan MBSP melalui syarikat konsesi di Tapak Pelupusan Pulau Burung, PLB Terang Sdn. Bhd. telah mengambil langkah-langkah seperti berikut:

- i) membuat penutupan menggunakan tanah merah atau bahan-bahan yang bersesuaian sebagai lapisan penutup setiap hari atau di akhir waktu operasi harian;
- ii) memampatkan sisa pepejal bagi meminimakan ruang-ruang udara di dalam lapisan sisa pepejal;
- iii) membuat pembahagian sel-sel pelupusan untuk mengurangkan risiko kebakaran ke sel-sel yang lain;
- iv) menyediakan jentera dan sistem pemadaman kebakaran yang lengkap; dan
- v) membuat pemantauan berkala bagi memastikan tapak pelupusan sentiasa berada dalam keadaan selamat.

Kementerian ini menyarankan agar pihak PBT menyediakan SOP dan KPI kepada setiap operator tapak pelupusan yang dilantik bagi membolehkan pemantauan yang rapi dibuat ke atas operasi tapak pelupusan di Pulau Pinang. Kerajaan Persekutuan melalui JPSPN dan SWCorp juga bersedia untuk memberikan khidmat nasihat teknikal kepada mana-mana PBT dalam usaha memastikan pengurusan tapak pelupusan yang cekap dan lestari.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN KHOO POAY TIONG [ KOTA  
MELAKA ]**

**TARIKH : 17 MAC 2022 (KHAMIS)**

**SOALAN**

**TUAN KHOO POAY TIONG** minta **MENTERI KESIHATAN** menyatakan secara terperinci senarai nama Pusat Pemberian Vaksin (PPV) Mega yang beroperasi semasa Program Imunisasi COVID-19 Kebangsaan, termasuklah lokasi, nama pemilik, jumlah bayaran sewa dan penanggung bayaran sewa untuk setiap lokasi PPV Mega tersebut.

**JAWAPAN**

Tuan Yang di-Pertua,

1. PPV Mega adalah merujuk kepada pusat pemberian vaksin yang mempunyai kapasiti pemberian vaksin harian sebanyak 3,000 dos ke atas.
2. Terdapat sebanyak 41 buah PPV Mega yang melibatkan pengamal perubatan swasta (PPS) di seluruh negara. Untuk makluman, semua PPV-PPV Mega di bawah Program Imunisasi COVID-19 Kebangsaan (PICK) ini telah ditutup pada bulan Oktober 2021. Senarai PPV Mega adalah seperti berikut:

Bil.	Nama PPV	Negeri
1	Persada Johor International Convention Centre	Johor
2	Universiti Tun Hussein Onn Malaysia, Batu	



**SOALAN NO : 81**

<b>Bil.</b>	<b>Nama PPV</b>	<b>Negeri</b>
	Pahat	
3	Dewan Jubli Intan, Muar	
4	Mid Valley SouthKey	
5	Iskandar Malaysia Studio, Iskandar Puteri	
6	Langkawi International Convention Centre	Kedah
7	Amanjaya Sports Arena	
8	Dewan Tuanku Canselor Universiti Malaysia Kelantan, Bachok	Kelantan
9	Stadium Mini Majlis Perbandaran Jasin	Melaka
10	Stadium Hang Jebat Melaka Tengah	
11	Universiti Sains Islam Malaysia	Negeri Sembilan
12	SPICE Arena	Pulau Pinang
13	Setia SPICE Convention Centre	
14	Sabah International Convention Centre	Sabah
15	Dewan Masyarakat Tawau	Sabah
16	Borneo Convention Centre Kuching (BCCK)	Sarawak
17	Ideal Convention Center, Shah Alam	Selangor
18	Setia City Convention Centre	
19	MINES International Exhibition & Convention Centre (MIECC)	
20	UiTM Shah Alam	
21	MAHSA University	
22	Sunway Pyramid Convention Centre	
23	Movenpick KLIA	
24	Bangi Avenue Convention Centre	
25	Dewan Sivik MBPJ	
26	Hotel Wyndham Klang	
27	Dewan TAR, Sabak Bernam	
28	Multimedia University, Cyberjaya	
29	UiTM Puncak Alam	
30	Dewan Canselor MSU, Shah Alam	
31	Space U8, Bukit Jelutong	
32	Galaxy Mall Ampang, Hulu Langat	
33	Dewan Persatuan Soka Gakkai Klang	

Bil.	Nama PPV	Negeri
34	Stadium Tertutup Gong Badak, Kuala Nerus	Terengganu
35	Pusat Konvensyen Taman Tamadun Islam	
36	Dewan Dato' Seri Amar, Kemaman	
37	Kuala Lumpur Convention Centre	WP Kuala Lumpur
38	Malaysia International Trade and Exhibition Centre (MITEC)	
39	Stadium Nasional Bukit Jalil	
40	Axiata Arena	
41	World Trade Center Kuala Lumpur	

3. Berhubung pelaksanaan PPV di negeri-negeri yang dahulunya diselaraskan oleh pihak Kementerian Sains, Teknologi dan Inovasi (MOSTI), perkara ini diuruskan oleh pihak Kerajaan Negeri masing-masing melalui platform CITF di peringkat negeri. Anggaran kos vaksinasi adalah RM14 seorang penerima vaksin yang dibayar kepada pengamal perubatan swasta.

4. Manakala, anggaran kos penetapan PPV Mega adalah tidak melebihi RM15 seorang yang meliputi kos sewaan, kos utiliti, perkakasan untuk pengoperasian PPV sebagai contoh laptop, kerusi meja, fotostat, *cubicle* vaksinasi, sistem nombor giliran, bahan pakai habis (borang akuan, alat tulis, *face shield*, *face mask*, *sanitizer* dan sebagainya), perkhidmatan pembersihan dan sanitasi serta makan minum petugas yang dibiayai oleh CITF.

5. Untuk makluman Ahli Yang Berhormat, KKM telah mengaktifkan sebanyak 4 buah PPV mega di Lembah Klang sejak 15 Januari 2022 bagi tujuan pemberian dos penggalak iaitu seperti berikut:

- a. PPV World Trade Centre, Kuala Lumpur;
- b. PPV Axiata Arena Bukit Jalil, Kuala Lumpur;
- c. PPV Ideal Convention Centre (IDCC) Shah Alam; dan
- d. PPV Soka Gakkai, Klang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB PUAN NOORITA BT. SUAL (TENOM)**

**TARIKH : 17 MAC 2022 (KHAMIS)**

**SOALAN**

**PUAN NOORITA BINTI SUAL ( TENOM )** minta **MENTERI DALAM NEGERI** menyatakan apakah signifikan pemberian Kad Warga Asing kepada warga asing di Sabah, apakah hak-hak yang diperoleh oleh pemegang kad ini, apakah persamaan dan perbezaan di antara kad ini dengan Kad PSS.

**JAWAPAN**

**Tuan Yang Di Pertua,**

Mohon izin supaya soalan daripada YB Tenom ini dijawab bersekali dengan soalan bernombor B0155 daripada YB Libaran memandangkan semua soalan yang diutarakan menyentuh isu yang sama iaitu pengurusan pendatang dan warga asing di Sabah.

Seperti Ahli Yang Berhormat sedia maklum, Jawatankuasa Pengurusan Warga Asing di Sabah (JKPWAS) telah ditubuhkan oleh Kerajaan susulan daripada syor Suruhanjaya Siasatan Diraja (Royal Commission of Inquiry - RCI) Mengenai Pendatang Asing di Sabah bertujuan untuk mengkaji dan membincangkan isu berkaitan pendatang dan warga asing di Sabah.

Cadangan pemberian Kad Warga Asing kepada warga asing yang bermastautin di Sabah sedang diteliti oleh Jawatankuasa Induk Pengurusan Warga Asing (JKPWAS). Antara lain, cadangan Kad Warga Asing ini bertujuan untuk pendataan warga asing di Sabah bagi memastikan pihak berkuasa dapat mengetahui dan mengenal pasti keberadaan golongan warga asing ini. Cadangan Kad Warga Asing ini sedang diteliti oleh sebuah jawatankuasa kerja yang diterajui oleh Kerajaan Negeri Sabah.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB TUAN LARRY SOON @ LARRY SNG WEI  
SHIEN (JULAU)**

**TARIKH : 17 MAC 2022 (KHAMIS)**

**SOALAN**

**TUAN LARRY SOON @ LARRY SNG WEI SHIEN ( JULAU )** minta **MENTERI DALAM NEGERI** menyatakan apakah pelan tindakan yang akan diambil oleh pihak Kementerian untuk memulihkan reputasi dan prestasi Malaysia ke tahap 2 setelah Jabatan Negara Amerika Syarikat (AS) menurunkan kedudukan Malaysia ke tahap 3 di dalam Laporan Pemerdagangan Manusia (TIP) 2021. Nyatakan juga tempoh masa yang spesifik berapa lama masa diperlukan untuk memperbaiki imej Malaysia berhubung isu ini.

**JAWAPAN**

**Tuan Yang Di Pertua,**

Kementerian Dalam Negeri (KDN) selaku peneraju Majlis Antipemerdagangan Orang dan Antipenyeludupan Migran (MAPO) yang turut dianggotai 22 kementerian dan agensi sentiasa melaksanakan pelbagai bentuk tindakan bagi membanteras jenayah pemerdagangan orang selaras dengan Akta Antipemerdagangan Orang dan Antipenyeludupan Migran 2007 (Akta 670).

Segala usaha dan hala tuju Kerajaan dalam membanteras jenayah pemerdagangan orang di Malaysia adalah berpandukan kepada Pelan Tindakan Kebangsaan Antipemerdagangan Orang 2021-2025 (*National Anti-Trafficking in Persons and Anti-Smuggling of Migrants* atau NAPTIP 3.0). NAPTIP 3.0 telah dilancarkan secara rasminya oleh YB Menteri Dalam Negeri (MDN) pada 31 Mac 2021. NAPTIP 3.0 jelas menerangkan visi negara, lima prinsip panduan, sembilan matlamat strategik, 34 objektif dengan 78 output serta 210 aktiviti berkaitan antipemerdagangan orang bagi tempoh lima tahun akan datang.

Secara asasnya, antara tindakan serta perancangan kerajaan dalam memperkasakan usaha membanteras jenayah pemerdagangan orang di Malaysia adalah seperti berikut:

- i. **memperkukuhkan mekanisme undang-undang.** Usaha Malaysia dalam memerangi jenayah pemerdagangan orang dan penyeludupan migran adalah berdasarkan Akta 670. Akta ini mula dikuatkuasa pada tahun 2007 dan telah dipinda sebanyak tiga kali iaitu pada tahun 2010, 2015 dan 2022 bagi memperkukuhkan kerangka perundangannya serta menerapkan pendekatan berpaksikan mangsa (*victim centered approach*). Pindaan terkini kepada Akta 670 pada tahun 2022 telah memberi tumpuan kepada beberapa penambahbaikan termasuk mengenai definisi pemerdagangan orang, yang bertujuan untuk menambah baik pengenalpastian mangsa serta meningkatkan bilangan pendakwaan dan sabitan kes pemerdagangan orang. Selain itu, pindaan tersebut juga memberi tumpuan kepada aspek

pencegahan dengan memberikan hukuman yang lebih berat kepada pesalah jenayah ini.

- ii. **memperkasakan usaha dalam aspek penjagaan dan perlindungan mangsa pemerdagangan orang.** Seiring dengan pendekatan responsif gender, Kerajaan telah menyediakan lapan (8) buah rumah perlindungan (RP) mangsa pemerdagangan orang iaitu 5 buah RP untuk wanita dan masing-masing sebuah RP untuk lelaki, kanak-kanak perempuan dan kanak-kanak lelaki. Selain itu, bagi mengiktiraf peranan penting badan bukan Kerajaan (NGO) dan organisasi lain dalam aspek ini, sebanyak dua (2) buah RP di bawah seliaan NGO telah diisytiharkan sebagai tempat perlindungan. Kerajaan juga merancang untuk membangunkan dua (2) buah tempat perlindungan baharu di negeri atau zon yang belum mempunyai RP. Sebagai tambahan, Kerajaan juga telah melaksanakan program *Victim Assistant Specialist* (VAS) yang berperanan sebagai perantara di antara mangsa, pegawai pelindung, ahli psikologi dan pegawai penyiasat di samping memberikan perkhidmatan sokongan kepada mangsa.
- iii. **meningkatkan tindakan bersepadu di antara agensi penguatkuasaan.** Tindakan bersepadu dalam kalangan agensi-agensi penguatkuasaan merupakan satu usaha yang berterusan dalam melengkapkan usaha secara unilateral yang telah dijalankan oleh agensi-agensi penguatkuasaan di bawah organisasi masing-masing.
- iv. **memberi penekanan kepada tindakan penguatkuasaan dan perundangan yang lebih tegas dalam isu-isu pemerdagangan buruh** yang dikatakan berlaku di sektor ekonomi sebagai contoh sarung tangan getah dan perladangan sawit;
- v. **meningkatkan kapasiti, sumber dan kemahiran** anggota penguatkuasa, pasukan pendakwaraya, pegawai pelindung serta entiti khusus di kementerian dan jabatan yang terlibat secara langsung

dalam penggubalan dasar dan hal ehwal pengoperasian berkaitan pemerdagangan orang;

- vi. **menambah baik sistem dokumentasi dan pelaporan berkaitan warga asing serta pengurusan golongan berisiko** termasuk pekerja asing secara holistik bagi memastikan kebajikan dan hak pekerja terutama pekerja asing dapat dilindungi; dan
- vii. **meningkatkan kesedaran awam dan aspek pencegahan.** Kerajaan melalui Majlis Antipemerdagangan Orang dan Antipenyeludupan Migran (MAPO) sedang dalam tindakan melaksanakan kempen kesedaran antipemerdagangan orang dan antipenyeludupan migran bersama-sama dengan pelbagai pemegang taruh bagi meningkatkan tahap kefahaman masyarakat mengenai jenayah ini. Antara platform promosi dan publisiti yang akan dimanfaatkan adalah temubual TV dan radio, penerbitan (risalah, artikel, rencana), paparan (*billboard*, skrin digital), program *outreach* dan media sosial (infografik, videografik). Dalam masa yang sama, Kerajaan juga sedang giat melaksanakan penerangan pindaan terkini Akta 670 yang telah berkuatkuasa pada 22 Februari 2022.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPATBELAS 2022**

**PERTANYAAN : JAWAB LISAN**

**DARIPADA : YB PUAN KASTHURIRAANI A/P PATTO  
(BATU KAWAN)**

**TARIKH : 17 MAC 2022 (KHAMIS)**

**SOALAN**

**PUAN KASTHURIRAANI A/P PATTO ( BATU KAWAN )** minta **MENTERI DALAM NEGERI** menyatakan bagaimana Muhammad Riduan Abdullah, bekas suami kepada Indira Gandhi yang dijejaki oleh pihak polis dapat mendaftar untuk 2 buah kereta pada tahun 2014 dan 2017, dan pembaharuan lesen memandu Riduan telah diproses pada bulan Mei 2021 mengikut Tuan Bhupindar Singh Pesuruhjaya Kehakiman Mahkamah Tinggi (High Court Judicial Commissioner) dalam inkuiri terhadap usaha kerajaan untuk memberkas Riduan Abdullah.

**JAWAPAN**

**Tuan Yang Di Pertua,**

Pada 08/09/2021 pihak Polis Diraja Malaysia (PDRM) telah membuat permohonan semakan urusan lesen, cukai jalan atau pembelian kenderaan dalam Sistem Jabatan Pengangkutan Jalan, Perak terhadap Patmanathan a/l Krishnan @ Muhammad Riduan bin Abdullah dan pada 10/09/2021 hasil semakan daripada Jabatan Pengangkutan Jalan Perak berkaitan Patmanathan a/l Krishnan @ Muhammad Riduan bin Abdullah mendapati lesen memandu beliau masih aktif sehingga 26/05/2022.

Pada 24/11/2021 permohonan semakan juga telah dikemukakan kepada Jabatan Pengangkutan Jalan Perak berkaitan butiran pemilikan

kenderaan dan saman atas kenderaan-kenderaan yang didaftarkan di atas nama Pathmananthan a/l Krishnan @ Muhammad Riduan Bin Abdullah. Pada 13/01/2022, pihak PDRM telah menerima laporan berhubung permohonan butiran di atas daripada Jabatan Pengangkutan Jalan Perak dan mendapati penama memiliki beberapa buah kenderaan yang telah didaftarkan atas beberapa nombor pendaftaran.

Tuan Yang Di Pertua,

Di bawah peraturan Jabatan Pengangkutan Jalan (JPJ), tiada peruntukan yang membolehkan pihak JPJ menghalang atau menahan urusan niaga di JPJ ke atas mana-mana individu termasuk melibatkan proses pendaftaran dan pelesenan kenderaan motor (selain daripada isu-isu teknikal kenderaan motor) dan juga pembaharuan lesen memandu, kecuali telah terdapat suatu Perintah yang telah dikeluarkan oleh Mahkamah terlebih dahulu, untuk menyekat sebarang transaksi, menggantung atau membatalkan sebarang urusan niaga, apabila individu berkenaan telah didapati bersalah ke atas pelanggaran mana-mana peruntukkan atau telah dijatuhkan sebarang hukuman bagi mana-mana kesalahan di bawah Akta Pengangkutan Jalan 1987.

Dalam erti kata lain, pihak JPJ hanya boleh menahan atau menggantung sebarang urusan niaga setelah mendapat Perintah, arahan atau sebarang keputusan daripada pihak Mahkamah ke atas mana-mana individu yang telah didapati melakukan kesalahan di bawah Akta berkenaan sahaja.

Dalam kes berkaitan penama di atas, tiada sebarang perintah atau rekod semasa yang menunjukkan bahawa beliau telah didapati bersalah serta telah dijatuhkan hukuman oleh Mahkamah melibatkan apa-apa kesalahan di bawah Akta Pengangkutan Jalan 1987 yang membolehkan pihak JPJ menahan, menggantung atau membatalkan sebarang urusan niaga beliau dengan pihak JPJ. Selain itu, usaha untuk mengesan kedudukan terkini penama juga masih diteruskan oleh pihak PDRM.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. LEE BOON CHYE [ GOPENG ]**

**TARIKH : 17 MAC 2022 (KHAMIS)**

**SOALAN**

**DR. LEE BOON CHYE [ GOPENG ]** minta **MENTERI PERDAGANGAN  
DALAM NEGERI DAN HAL EHWAL PENGGUNA** menyatakan apakah  
langkah-langkah yang diambil untuk mengawal kenaikan harga barang.

**JAWAPAN**

**Yang di-Pertua,**

Untuk memastikan harga barangan dalam keadaan stabil, Kementerian sentiasa membuat pemeriksaan dan pemantauan di semua peringkat perniagaan termasuk di kawasan bandar dan luar bandar. Untuk makluman, sepanjang 2022 sebanyak 90,021 premis telah dilawati dan diperiksa oleh Bahagian Penguatkuasa Kementerian bagi memastikan pematuhan terhadap undang-undang kepenggunaan. Walaubagaimanapun, sekiranya terdapat sebarang aduan diterima berkaitan kenaikan harga jualan apa-apa barangan yang terlalu melampau, notis bertulis akan dikeluarkan kepada peniaga untuk melihat sekiranya wujud kesalahan pencatutan iaitu mengambil keuntungan tinggi yang tidak munasabah oleh peniaga.

Kerajaan juga mengadakan Skim Harga Maksimum Musim Perayaan dan Skim Harga Maksimum Keluarga Malaysia bagi menetapkan harga maksimum untuk barangan tertentu pada tempoh tertentu. Kerajaan turut melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item penyumbang sumber protein utama penduduk Negara ini.

Kementerian bekerjasama rapat dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari semasa ke semasa tanpa gagal.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI PANGLIMA BUNG  
MOKTAR BIN RADIN  
[KINABATANGAN]**

**TARIKH : 17 MAC 2022 (KHAMIS)**

**SOALAN**

**DATUK SERI PANGLIMA BUNG MOKTAR BIN RADIN [KINABATANGAN]** minta **MENTERI KESIHATAN** menyatakan apakah perancangan Kementerian dalam menyuntik semangat para petugas “*frontliners*” KKM yang kian tertekan agar terus memberikan perkhidmatan yang cemerlang memandangkan mereka ini sentiasa terdedah dan berisiko dengan jangkitan virus COVID-19 semasa bertugas.

**JAWAPAN**

Tuan Yang di-Pertua,

Kerajaan menyediakan pelbagai manfaat bersifat kewangan dan bukan kewangan kepada petugas barisan hadapan yang terlibat secara langsung di dalam menangani penularan pandemik COVID-19. Antaranya :

1. pemberian **Elaun Khas COVID-19** kepada petugas barisan hadapan (contohnya doktor, jururawat dan pemandu ambulans), yang mana kadarnya telah dinaikkan daripada RM400 kepada RM600 sebulan bermula bulan April 2020. Sehingga 31 Disember 2021, sejumlah RM1.1 billion telah dibayar.

2. **Elaun Khas Petugas Penjawat Awam di Pusat Pemberian Vaksin (PPV)** sebanyak RM200 sebulan kepada anggota barisan hadapan kesihatan KKM yang diarah bertugas di dalam Program Imunisasi COVID-19 Kebangsaan (PICK). Elaun ini telah mula dibayar pada April 2021. Kadar elaun ini telah dinaikkan kepada RM600 sebulan mulai Julai 2021 hingga Disember 2021.
3. Pemberian secara *one-off* sebanyak RM500 melalui pengumuman Belanjawan 2021 yang mana merupakan ganjaran tambahan kepada Bantuan Khas Kewangan Tahun 2021 yang diterima Pegawai Perkhidmatan Gred 56 dan ke bawah.
4. Pengecualian daripada potongan Imbuhan Tetap Keraian (ITK) atau Imbuhan Tetap Khidmat Awam (ITKA) ke dalam Akaun Amanah Bencana.
5. Melanjutkan tempoh maksimum penggunaan Cuti Gantian bagi anggota barisan hadapan Kementerian Kesihatan daripada enam (6) bulan kepada 18 bulan. Pelanjutan tempoh ini terpakai bagi kerja lebih masa yang dikumpul mulai 18 Mac 2020 hingga 31 Disember 2021.

Sekian, terima kasih.